

کَلکاری

(هریائوی مضامین، فکاہیدہ داستانی، ارسنہ شاعری، محمد عیسیٰ)

افغانستان

کَلکاری

مرتب: اختر مرزا

(تراجم، انشائیہ، فکاہیہ، مضامین)

نوہرہ بلی کیشنز۔

تصویر محل۔ بہادر پور چوک۔ بوسن روڈ۔ ملتان

(جملہ حقوق محفوظ ہیں)

کَلاری	نام کتاب:
اختر مرزا	مرتب:
اختر مرزا	کمپوزنگ:
نومبر 2024	اشاعت اول:
300	تعداد اشاعت:
	سرورق:
500 روپے	قیمت:
نوہرہ پبلی کیشنز۔ تصویر محل۔ بہادر پور چوک	ناشر:
بوسن روڈ۔ ملتان	

پبلیشرز اینڈ ڈسٹری بیوٹرز:

نوہرہ پبلی کیشنز۔

مرکزی سیکریٹیریٹ: تصویر محل۔ بہادر پور چوک۔ بوسن روڈ۔ ملتان

انتساب

ہریاٹھوی ماں بولی کی خدمت کرن آٹے سارے لکھاریاں کے نام

فہرست

نمبر شمار	عنوان	لکھاری	صفحہ نمبر
1	پیش لفظ	اختر مرزا	5
4	عظیم باپ	راؤ عمر حیات	9
5	ہریاٹوی کہبت	حاجی منشاہ	17
6	ہریاٹوی لوک گیت	راؤ وقار شاہ	24
7	جت گئے بائیتے	ملک عالمگیر	33
8	میں ایک گھر آلا سوں (ترجمہ)	تنزیلا راٹا	43
9	مھارے چاچے نیں پھوٹو ٹانگیا (ترجمہ)	اختر مرزا	58
10	بھیڈا (ترجمہ)	اختر مرزا	70
11	ہرفن مولا (فکا ہیہ)	اختر مرزا	87
12	مرٹن آلے کی یاد منھ (ترجمہ)	اختر مرزا	100
13	سیرے جو کل آنکھ میری کھلی (ترجمہ)	نجمہ عثمان	133

پیش لفظ

ہریاٹوی میری ماں بولی سے اُرمئے اس پے گھٹا ماں سے۔
 دنیا کے ہر ماٹس نیں یو حق سے اک وا اپٹی ماں بولی بولے اُراس کے
 بدھاوے واسطے کام کرے۔ کوئے بی زبان اُس وقت تئیں اپٹی
 پچھاٹ قائم راکھے سے جب تائیں اس کے بلن آئے اس نیں
 بولدے رھویں سیں۔ زبان کے گیلیاں اس تے جڑے ہوئے
 ہو رکتی کام ہوویں سیں۔ مثال کے طور پے، ثقافت، رہن سہن،
 ٹوم ٹھیکری، کپڑے لٹے، رسم رواج اُس وقت تائیں رھویں گے
 جب تئیں یئھ شبدھ بولے جاویں گے۔ آج مھارے بالکاں نیں کوٹ
 بھتاوے گا اک بھینت، سینت کے ہوویں تھے۔ مھاری دادی
 ، نانی اُر ماں کاناں یئھ گوکھرو، ناک میں پورلی، گل یئھ چندن ہار اُر
 جھالرہ پھیریا کردی۔ پیراں یئھ کڑی اُر پجیب بی ہویا کریں تھی۔
 ہاتاں یئھ کڑے، سوت، چھیل کڑے بھی ہویا کردے۔ ہندستان
 تے آن آئے وینھ لوگ ایب ختم ہوندے جاویں سیں۔ نئی نسل
 اپٹی ماں بولی کے شبدھ بھولدی جاوے سے۔ دنیا ایب ایک گلوبل

ولیمج بٹ گی۔ ساریاں کے ہاتاں مینھ موبائل آگے سیں۔ دیکھن آر
سنن کا زمانہ آگیا۔ کتاباں نیں کوئے نی پوچھدا۔ مہارے تے بھی
لوگ پوچھیں سیں اک "کے کرو گے کتاب چھپوا گے؟ جد انھاں نیں
کوئے پڈھٹیا کوئی۔" مہاری جواب نیوں ہووے سے۔ جے آج
ہم نیں اپنی زبان پے مہنت کر کے اس میں اپنی ثقافت آر رسم
و رواج اپنی بولی مینھ ناں سنبھالے تو آٹھ آٹھ دس سالوں مینھ جہاں
ہریاٹوی بولن آٹھ کوئی ملے گا۔ 2017 مینھ ہریاٹوی زبان کی رکھال آر
اُس کے بدھاوے واسطے بٹن آٹھ تنظیم "نوہرہ" نیں اس کام کا بیڑا
ٹھایا سے۔ آر ہریاٹوی زبان مینھ ساری اصناف مینھ کتاب چھاپن کا
کام شروع کریا سے۔ اس سلسلے مینھ سب تے پہلاں ہریاٹوی فونکس
گلے میل کھاندے اکھر یعنی (Alphabet) بٹائے گئے۔ اس کی
ضرورت نیوں پڑی اک اردو کے حروف وینھ آواز پوری طریاں کوئی
لکھ سکدے جو ہریاٹوی مینھ بولی جاویں سیں۔ لسانیات پے کام کرن
آٹھ دوستاں نیں رل کے ہریاٹوی قاعدہ ترتیب دیا۔ پھیر ہریاٹوی
ٹائپ کرن کھاترو وینھ اکھر کی بورڈ پے لے کے آئے۔

ادب کی ساری اصناف میں ہریاٹوی ادب لکھیا جا رہا ہے۔ شاعری، افسانہ، مضامین، ترجمہ، ناول، داستان، ڈرامہ لکھیا جا رہا ہے۔ کتاباں کی ضرورت ہم میں نیوں بی سے اک ہم آج پاکستان میں رہواں ساں تو زیادہ تر اردو یا پھر علاقائی زبانوں یعنی پنجابی، سندھی، سرانیک، وغیرہ بھی بولاں ساں۔ جے مہارے پے مہاری ماں بولی کے شبدھ ار رسم و رواج، مہاری ثقافت لکھی ہوئی ناں ہوئی تو مہاری آن آلی نسل میں کیوکر بھتاواں گے۔

اس سلسلے میں ایک ہور بات بھی یاد راکھو اک جے ہم چاھواں ساں اک مہاری ماں بولی نیوں ء زندہ رھوے تو پھر اس زبان کے بدھاوے کھاتر آر اس میں محفوظ راکھن کھاتر ہریاٹوی میں بھی ایم۔ اے، ایم فل ار پی۔ ایچ۔ ڈی ہونا چاہیے۔ یو کام نیوں ء ہو سکے سے جب مہارے پے ہریاٹوی زبان میں ادب کی ساری اصناف میں کتاب ہوویں گی۔ پھر ہم یونیورسٹیاں تے کہہ سکاں گے اک ایف۔ اے، بی۔ اے ار ایم۔ اے میں ہریاٹوی کا مضمون بھی آفر کرو۔

اس کتاب مینھ ہریاٹوی مضمون، ترجمہ، فکائیہ، داستان ار
 شخصی خاکے کٹھے کرے گئے سیں۔ لکھن آلیاں نیں اپنی ماں بولی مینھ
 لکھن کا حق ادا کر دیا سے۔ ایب پڈھن آلیاں نیں چاہیئے اک اپن
 بالکاں نیں بھی ہریاٹوی لکھن آر پڈھن کاہنی لے کے آویں۔

اختر مرزا

فرح آباد۔ خان پور

0333-7493223

عظیم باپ

راؤ عمر حیات

سن 1928ء جون کی پہلی تاریخ میں ریاست ہریانا کے ضلع روہتک کے ایک گام سینپل میں جمعدار (نائب صوبیدار) راؤ نذر علی کے گھر تیسرا چھوڑا پیدا ہوا جس کا نام رحمت علی دھریا گیا، رحمت علی سے بڑے دو بھائی عالم علی آروا جلد علی تھے۔ عالم علی فوج میں آروا جلد علی کھیتی باڑی کرے تھا۔ رحمت علی سے چھوٹی دو باہن آروا ایک بھائی لطیف بی تھا۔

نذر علی میں چاء تھا اک میں اپنے اس بیٹے میں سکول میں پڑھاؤں گا، رحمت علی کی عمر جد آٹھ برس ہوئی تو پڑھن کھاتر سینپل تے چار کوس دور کلنگا کے پرائمری سکول میں داخلہ کرادیا گیا۔ آروا رحمت علی میں بڑے شوق سے سکول جانا شروع کردیا۔ رحمت علی کا گھرایا آروا چاچے کا بیٹا عبدالعزیز عرف جیجو بھی روز گیلے جانا پرواہ

سکول کے باہر بیٹھ کے سارا دن رحمت علی کا راہ دیکھدا آر دوپہر اپنے گیل گھر آندا۔ کلنگا تے پرائمری (چار جماعت) پاس کرن پانچھ کلانور کے سکول میںھ داکھلہ ہو گیا آر آگے پڈھائی شروع ہوگی۔ 1944 عینھ کلانور تے مڈل کا امتحان پاس کر لیا، جیجو کے گیل گیل جو ایک اور گہرا یار تھا واہ چماراں کا چھورا بنواری لال تھا۔ تینوں کٹھے کھیلیاں کریں تھے، کٹھے ناچ دیکھن گام دھر گام جایا کریں تھے۔ پاکستان آن پانچھ دونوں اپنے یار بنواری لال میں کھوب یاد کریا کریں تھے پر اُس بکھت نہ تو وٹس اپ تھا آر نہ اس طرح کے موبائل فون جو رابطہ ہو سکدا۔ 2017 عینھ میرا آسٹریلیا جاٹا ہویا تو اڑے روہتک سے آئے بول ہریاڑہ چینل کے نمائندے راج نرائٹ میں میرا انٹرویو چلایا، بنواری لال کے بھتیجے سندپ میں واہ انٹرویو سُن کے میرے تے رابطہ کریا آر اپنے تاؤ بنواری لال سے میری وڈیو کال پہ بات کرائی واہ منے دیکھ کے بوہت راجی ہویا جد اُس میں میرا لایا کہ میں رحمت علی کا چھورا سوں، اس کے چھ مھینے پانچھ بنواری لال فوت ہو گیا۔

جمعہ ارنذر علی کا گام میںھ چالیس ہاتھ لامبا پکا نوہرہ تھا جس میںھ سارے بڈھے، جوان آر بالک بیٹھیا کریں تھے، ڈانگر بھی بندھیں

تھے ارگڈے بھی کھڑے ہوں تھے۔ شام میں کھیتاں تے آ کے
 نوہرے مینھ کھوب محفل جمیں تھیں، بڈھے بڈے اپنے قصے سناویں
 تھے ار جوان ہوکا بھر بھر لیاویں تھے۔ ان محفلاں مینھ چھوٹے
 بڈیاں سے ادب ادآب بی سیکھیں تھے۔۔۔ ار ایک دوسرے کا آدربی
 کریں تھے، جھگڑیاں کے فیصلے آریاہ سگانی بی نوہرے مینھ ہوں
 تھے۔ والد صاحب اپنے نوہرے کا اتنا ذکر کریا کریں تھے کہ ہم اس
 اپنے آپ میں اس نوہرے مینھ بیٹھیا محسوس کراں تھے۔ ار جد
 بنواری لال کے بھتیجے سندپ نیں وڈیو کال کے ذریعے مہارانوہرہ
 دکھایا تو منے نیوں لاگیا جموں منے یوہ بوہت پہلاں دیکھ راکھیا سے، واہ
 نیوں کا نیوں تھا جس ابا جی بتایا کریں تھے، اس مینھ کوئی بدلاؤ کوئی آیا

-

رحمت علی ار اُس کے یاراں نیں سانگ (ڈرامے) دیکھن کا
 بوہت شوق تھا۔ جد بی میرالا کے تھا کہ کسے گام مینھ سانگ ہو ریا سے
 تو سانگ دیکھن پیدل ء اُس گام مینھ پوہنچ جیا کریں تھے، ار ساری
 رات سانگ دیکھ سویرے تڑکے اُلٹے آجیں تھے، سکول کی کدے
 چھٹی نہیں کری۔ گھنپت سنگھ، بندہ میر مہی، حاجن حسینہ کلات والی

اور دوسرے مشہور سانگیاں کے سانگ بوہت شوق سے دیکھیں تھے

-

رحمت علی نیں گھومٹ کا بھی بوہت شوق تھا، سانگ دیکھن
 کے شوق مینھ آر رشتہ داریاں کی وجہ تے کھوب گام پھرے جن میں
 کلانور، روہتک، کلنگا، نگانہ، سوانی، جاٹوسانہ، کھیرڑی، اول، کاہنی
 وغیرہ گھنے گام شامل تھے، ایک بردلی بی گئے۔ 14 اگست 1947ء میں
 جد پاکستان بٹیا تو اپنے دین کی کھاتر قائد اعظم کی آواج پہ لیک کہندے
 ہوئے اپنے بڈیاں کی گیل پاکستان آگے۔ جد رحمت علی کی عمر اُنیس
 سال تھی آر تعلیم مڈل تھی۔

ہجرت کے پاچھے پہلا پڑاؤ منگمری تھا، پھیر سندھ بگ گے آر
 دو سال سندھ (جیمس آباد) مینھ رہن پاچھے ریاست بھاو پور مینھ آگے
 آر لال سوہانرے کے لوے پڑاؤ گیریا۔ 1949ء میں مڈل تعلیم کی بنیاد
 پہ ریاست مینھ سکول ماسٹر بھرتی ہو گے آر دو سال پاچھے پھیر ہجرت
 کر کے ڈونگے بونگے (بھاو لنگر) بگ گے، اُت نوکری کے گیل گیل
 کاشتکاری بھی کری۔ 1963ء میں تبادلہ احمد پور شرقیہ ہویا تو پھیر اس
 شہر آگے آر اُرے اساجی لاگیا کہ آخر بکھت تک اسے شہر مینھ جندگی

پوری کردی۔ 1966ء میں اپنی تعلیم میں دو جماعتوں کا اور اضافہ کر لیا آریٹرک کی ڈگری لے لی۔ اللہ نے دو بیٹے دیئے ایک راؤ عمر دراز جو کہ پاکستان ایئر فورس میں بھرتی ہو گیا آر چھوٹا راؤ عمر حیات جس نے باپ کا پیشہ اپنا لیا۔

رحمت علی نے اپنی ماں بولی سے بچپن سے بڑھت پیار تھا، مہاراجپن ان کے ہجرت تے پہلاں کے قصے، نوہرے کی باتاں آر سانگ جوگیاں بارے سُن کے گزریا۔ پوری پوری راگنی اُن میں جبانی یاد ہوں تھی۔ پاکستان آٹ کے پاچھے بھی یوہ شوق تھوڑا نہیں ہویا۔ شرو شرو میں اُرے بھی۔ یہاں شادیاں میں گاماں میں لوگ جوگیاں میں بلاویں تھے ار راگنی گائی جایا کریں تھی۔ سانگ بھی ہوں تھے، آہستہ آہستہ نئی ٹکنا لوجی میں یہ چیجاں کھتم کر دیں۔

شعبہ درس و تدریس میں ہونے کی وجہ سے والد محترم راؤ رحمت علی لکھن لکھاؤ کا شروع سے شوق تھا، کیوں کہ سانگ کھوب دیکھے، راگیاں کھوب سنیں، میں سب جبانی یاد تھے۔ جوگیاں کی آر سانگیاں کی کیسٹاں کا گھر میں ایک خزانہ تھا۔ پورے ملک میں جت بی ماں بولی واسطے کوئی کٹھ ہو تھا تو جرور جاویں تھے۔ راجپوت برادری

کے گھنکھرے رسالے (نوائے راجپوت، ندائے راجپوت، راجواڑہ وغیرہ) مینھ اُردو آرہی اٹھویں مینھ نثر آر اشعار لکھدے رہے پر تسلی کوئی ہوئی، اس سفر مینھ جن دوستانیں ان کا ساتھ دیا ان میں ڈانوراں سے کنورنثار ایڈوکیٹ، کراچی سے کنور عبدالمجید، کلور کوٹ سے جمیل احمد راٹا ارملتان سے رانا نوشاد قاصر گیل گیل رہے ار رہنمائی بی کردے رہے۔ شروع سے جی مینھ تھا کہ کچھ بڈاکام کریا جاوے۔ اکھر کار اس شوق نیں پورا کرن واسطے ہریاٹوی افسانے لکھٹے شروع کرے آر پھیر جدیرہ چودہ افسانے مکمل ہو گے تو کتاب چھاپن کی جی مینھ آئی۔ اس کام نیں پورا کرن کھاتر والد صاحب راؤ رحمت علی کا سب سے گھٹا ساتھ جس نیں دیا ان مینھ رانا نوشاد قاصر ار راؤ محمد افضل کا نام سر فہرست سے، جے یہ دونوں ناں ہوندے تو کے برایوہ کتاب چھپ نہ سکدی۔ ار پہلی کتاب ہون کا درجہ بی نہ پاندی۔

منے یوہ فخر سے اک میں اُس عظیم ہستی کا بیٹا سوں جس نیں ہریاٹوی افسانیاں کی پہلی کتاب لکھی۔ جے میں اُس دور پہ نجر ماروں تو یوہ کارنامہ کوئے چھوٹا نہیں لاگدا اک اتنی جدید سہولت نہ ہون پانچھی بی اس کتاب کا چھاپنا واقعی ایک عظیم کام تھا۔ اس کتاب کی

کھاس بات مصنف کی جوان سوچ سے ، جس بخت کتاب چھپی تو مصنف کی عمر اٹھتر برس تھی پر کتاب مینھ اس عمر کی جھلک کتے نہیں دکھے گی کتاب پڑھ کے اِسا لاگے سے اک اس کا لکھن آلا کوئی جوان چھوڑا سے ار اس کتاب کے چھوٹے افسانے دیکھ کے نیوں لاگے سے اک لکھن آئے نیں گھٹی جلدی تھی کہ ہریانوی کتاب چھپ جے۔ منے ویں دن بی یاد سیں اک والد صاحب چھوٹے چھوٹے کاگذاں پہ کچھ نہ کچھ لکھدے رہویں تھے ار کدے کنور نثار کدے جمیل رانا ار کدے کنور عبدالمجید لوے بھیج دے رہویں تھے۔ ار جد واہ شاعری یا نثر چھپ جے تھی تو بوہت راجی ہوں تھے۔ میں اس چیز نیں بی مانوں سوں اک اپنے باپ کی جندگی مینھ منے اس کتاب ار اس کی چھپائی بارے کوئی کام نہیں کریا ، پر جد منے اپنے باپ کے مرٹ کے پاچھے یہ وہ عظیم کتاب پڑھی تو منے اپنے والد سب نیں یاد کر کے بوہت فخر ہويا ار اُسے دن منے اپنے من مینھ ٹھاٹ لی اک میں اس کتاب نیں دوسرے کے چھپواؤں گا ار اپنے عظیم باپ کے مشن نیں آگے بدھاؤں گا پر دیر ہوندی گئی ، جد پاکستان ار پاکستان سے باہر سے ہریانوی بھائیاں نیں مل کے ملتان مینھ نوھرہ تنظیم قائم کری تو

منے حوصلہ ہویا اک اب یوہ کام ہو سکے گا۔ اس کتاب کی دوسرے کے چھپائی نوہرہ پبلیکیشنز کی چھتری لے ہو رہی سے۔ اس معاملے میں شکر گزار سوں نوہرہ تنظیم کے چیرمین رانا تصویر احمد، جنرل سیکرٹری اختر مرزا، چیرمین ادبی بورڈ رانا نوشاد قاصر، اسلم رانا ایڈووکیٹ، پروفیسر نجمہ عثمان، جمشید علی رانا، راؤ فیصل خان، انور علی رانا، رانا اورنگ زیب، رانا عطاء الرحمن، احمد سجاد بابر، اکبر علی چوہان، فہیم مغل، مختار رانا، راؤ وقار شاکر آر نوہرہ کی پوری ٹیم کا جن میں میرا حوصلہ بدھایا آر میرا بھرپور ساتھ دیا۔ میں ان سب کا بھی دل سے شکر گزار سوں جن میں میرے والد محترم راؤ رحمت علی واسطے اس کتاب میں لکھیا، ان میں سے کچھ اس دنیا میں کوئی ان سب واسطے دعائیں۔ ان کے علاوہ میرے بیٹے راؤ نعمان عمر ار راؤ فیصل حیات کا شکریہ جنہاں میں اپنے دادے کی کتاب دوسرے کے چھاپن میں دلچسپی لیتی۔ دوسرے کے چھپائی میں بی کچھ گلتیاں رہ سکیں میں ان کی جبرور نشان دہی کرنا آر میرے واسطے آر میرے والد محترم راؤ رحمت علی واسطے دعا کرنا۔

ہریانوی کہبت

حاجی نشاد

بھارا ار ساتیہ مینھ کہبت کی اہمیت سدا رہی ہے۔ اپنی بات میں پر اثر بنان میں کہبتاں عام برتی جانویں سیں۔ پچھلے دور مینھ ہونے کسے واقعے یا کسے پرانی کہانی کا نتیجہ جو لگے بندھے برناں مینھ کسے نئے واقعے یا مسئلے کی بابت مثال کے طور پر بیان کریا جاوے کہبت کہاوے ہے۔

کسے تجربے میں بیان کرن آلی ہر واہ بات یا مصرع جو سدھ ہو جے ار کسے نئے واقعے میں تولں مینھ عام برتائی جاوے کہبت بٹ جے ہے۔ یا نیوں کہنا گھٹا ٹھیک ہوگا۔ کوئے جملہ مصرع یا شعر جو جیون کے بارے مینھ کسے اصول رویے یا حقیقت میں نر ملتا کیل بیان کردا ہوار سب لوگ اس میں عام بول چال مینھ آج کی تلنا کرن مارے برتن لاگ جیں تو واہ کہبت کہاوے ہے۔

اس نین ء عربی مینھ ضرب المثل، انگلش مینھ سیننگ کہیا
جاوے سے۔ کہبت ار ضرب المثل میں کوئے انتر نہی ہوندا۔
صرف بولی کا فرق ہوئے۔ کہبت کی جمع کہبتاں ار ضرب المثل کی
جمع ضرب المثل ہوئے۔

کہبت پر سدھ لوک جملہ ہوئے جس مینھ سوجھ بوجھ، سچائی،
گیان، بیوہار، تعلیم، روایتی اسٹائل مینھ پائے جاؤں ہیں جو نسل در
نسل آگے چال دے رہویں ہیں۔

کہبت، کسے بھی سوسائٹی کی علاقائی، سنسکرتی اور اردھار مک
تھیوریاں مینھ رچی بسی ہوئی بدھی مانتا پہ ٹکی ہوئی ہوئے۔

جو قدیم سماجی سوچ، لوک بدھی مانتا، سوسائٹی کے آپسی
میل جول، سبھا، ار کسے بھی سمان میں رہنئے لوگاں کی اقدار نیں
ساہمنے لیا نویں سین۔

ان تھے ہٹ کے پرانے رسم و رواج، بیہم، ار کہاٹیاں بھی
کہبتاں گیل جبری ہوئی ہوں سین۔ کہبت سے لیگو تیج مینھ نر ملتا، گھٹتا
ار کیتا آجے سے۔ کہبت ایک اسا جملہ ہوئے جس نین بدلے بنا جیوں
کاتیوں لکھیا ار بولیا جاوے سے۔ گھٹی بر کہبت بناٹیاں کے ناماں کا

عام آدمیاں میں میرا کوئی ہوندا۔ گئے چنے لوگ ہوں میں جو یو جاؤں
 میں اک یوہ کہبت کسی کوئی کی لائن سے۔ یا کونسی کہبت کس میں
 جوڑی تھی۔ کسے لینگوئج کا گیان لینا ہو تو کہبتاں میں سمجھنا انیواری
 ہو سے۔ ان کے بنا لینگوئج کے گیان ساگر میںھ اتریاء نہی جا سکدا۔
 ہریانوی میںھ بھی کہبتاں کا بہت بڈا بھنڈار لکھیا ہویا سے۔ جو لگاتار
 ہریانوی پڈھنیاں آگے دھردار ہوں گا۔

آکاں کے آنب جام جنیں آر آنیاں کے آک
 آٹا گوندے آر ہالے کیوں سے؟

آگے ڈوڑ پاچھے چوڑ

آئی تج بکھیر گئی بج

آپکا مارے گا تو چھام میں گیرے گا

ایک ہو پرینک ہو

اصل تے بیاج بیارا

اندھا آگے رووے اپٹے نین کھووے

اپکی نیند سووے اپکی نیند اٹھے

اُتر گیا گھیٹی ہو گیا مٹی

آپکا دکھ گات مینھ آردوسرے کا کاندھ مینھ
 ایک تن لاگے سوتن جائے
 آپکے لاگے جائے، کے جائے پیر پرانی
 ایک لوہار کی سو سنار کی
 آپکا ہوکا آراپکی مروڑ
 آپکی ہاتھ مینھ اوراں کی کانچھ مینھ
 گھٹی شیاٹی دوہر پووے آر پھر بھی بھوکی سووے
 جڑے جاٹ اوڑے اے ٹھاٹھ
 مندر مینھ جیلی کا کے کام
 ساسو مراوے چورا ارچور بہو کا بھائی
 جس گام جاٹا نیس اُس کا راہ کیوں پوچھے
 منگتے نیں تو ہر گھر جاٹا ہو سے
 دودھ آر پوت اللہ سب نیں دیوے
 پوت اور کپوت کے پیر تو پالٹا مینھ اے دکھ جے سیں
 ماڑا دیکھ کے لڑیے ناں آرموٹا دیکھ کے ڈریے ناں
 بیھلی نیں کاٹڑے مونڈے

بکرے کی ماں کد تک خیر مناوے گی
 روندے جاویں آرمریاں کی خبر لیاویں
 گھر کا جوگی جوگٹا آر باہر کا جوگی سادھ
 کتے کا کتا بیری
 جس کے لاگے واہے جانے
 ڈھکی نہ بچی آر نیند آوے اچھی
 گنجی کے نہاوے گی ار کے نچوڑے گی
 سرتے گنجی آر کا کراں میں کلاں
 چیل کے آٹھٹیاں میں ماس؟
 چٹ منگنی پٹ بیاہ
 توں آندری سے تو میں باہری سوں
 ہالہ میں پھالا
 گام بسیا کوئی آر منگتے پہلے آگتے
 بٹن میں مورنا چیا تو کس نین دیکھیا
 ہالیا جاوے نہ چالیا جاوے پھٹے مونھ گوڈیاں گا
 آن دوشی کا دوش

بیاہ نہ سگائی پکڑٹ لا گیا کلانی

جیسا بیج بووے گا اوسا اے جامے گا

دھی اے تنے کہہ سناؤں بیوڑتوں کان کر

ہیلی ہیلی گادڑی شکار منڈے کھائے، ایک منڈا چھوڑ گئی ار
روز ڈنڈے کھئے

مونھ لائی ڈومٹی گاوے تال بے تال

توں بھی رائی میں بھی رائی کوٹ بھرے گا گھر کا پانی

ماں بھی ادھنی دھی بھی ادھنی کون لیاوے گا مہارے پانی
کی مکھنی

جسے ہم او سے مہارے سگے، اُن کے اونٹ نہ مہارے
گدھے

سانپ کا بچہ سپو لیا

مونھ کھاوے آنکھ شراموے

ماں پھرے چوتھی چوتھی آریٹا بیوڑے ۽ بخش دے

بلی کے بھاگیں چھینکا ٹوٹیا

کلیا چھوٹی بابے گھنے

رانڈ تو رنڈ پیا کاٹ لے لنگواڑے نی کاٹ دیندے

سانپ لکڑ جا آگے تے، پٹتی پھرے لکیریں
 ہمسایہ ماں جایا
 ہانسی کی پھانسی
 نو نقد اچھے تیرہ ادھار کچھ نہیں
 بیٹھے بول کا کچھ نہ مول
 چوری کا گڑ بیٹھا
 چورائیں پڑ گئے مور
 ٹھک نے ٹھک سو کوس پے بھی پچھاٹ لے سے
 مفت کا تیل تو جھولی مینہ بھی گھلا لے
 اتر گئی لوئی کے کرے گا کوئی
 بدگیری اے تیرے کھٹے مٹھے بیر تورے تھے چاکھے کوئی لیے گوج
 مینہ گتیر
 ساسونہ سر اگھر لاگے ستھرا
 بندی بوہاری تو پنسیری میں بھی ڈکیا دے سے
 بکری دودھ دیوے گی، دیوے گی مینگن کر کے
 وقت کی نماز اربے وقت کے دھکے
 گھراں چھا ہو تو باہر بھی چھا ہو

ہریانوی لوک گیت

وقار شاکر راؤ

دنیا مینھ جتنی بھی زبان بولی جاویں سیں ہر زبان کا اپنا ادب ہوئے۔ ادب بھی دو ڈھال کا ہوئے ایک تو واہ ادب جو شہراں میں رہن آئے پڑھے لکھے لوگاں کا ادب جو لکھیا جاوے سے ارواہ کتاباں میں بھی چھپیا ہوئے۔ ار ایک ادب ہوئے گام دیہات کے رہن آئے لوگاں کا ادب یہ ادب گاماں مینھ رہن آئے سیدھے سادھے ان پڑھ لوگاں کا ادب ہوئے اس مار کا یہ کدے بھی لکھیا ہویا نھی ملدا۔

یوہ تو بس پیڈھی دھریڈھی چالے جا سے ایک پیڈھی ابٹے سے پہلڑی پیڈھی سے سٹ کے یاد کرے سے ار پھیر اُن پہ سے اُن کی اگلی پیڈھی لے لیے سے۔ یوہ ادب نیویں چالدا رہوئے۔ ہریانوی زبان کے بولن آئے ہجرت کر کے پاکستان آئے تو ابٹے گیل یوہ لوگ ادب بھی لیائے۔ بکھت گجر دا رہیا ار ہجرت کر کے آں آلیاں کی چوتھی پیڈھی آئی۔ ہریانوی لوک ادب 1990ء لگ تو سارا نیوے چالدا رہیا

پاچھ لوگ ادب نیں چھوڈ دے گئے ارایب آکے تو حالت یوہ ہوگی کہ
 نئی نسل نیں نہ تو ایٹے لوک ادب سبیا رہیا نہ رسم رواج سے ہم نیں
 سوچیا کہ ہم آخری پیڈھی ساں جن نیں اپنا لوک ادب کا بیرا ہے۔
 جے یوہ ہم نیں لکھیا نھی تو آن آلی نسلاں پہ یوہ سب کچھ کھتم ہو جے
 گا۔ اس ماری اس لوک ادب نیں لکھ کے سامبھن کی کو سس کر
 رہے ساں۔ ہریانوی لوک ادب میںھ کہانی، قصے، لوری، گیت سب
 ء کے سے۔ پہلاں ہم بات کراں گے ہریانوی کے لوک گیتاں کی۔
 گیت بھی گھٹی ڈھال کے سیں۔ ہر خوشی کا موقع کے نیارے گیت
 سیں۔ گیت ہر رسم کے نیارے ہویا کریں سیں۔

ار رسم رواجاں کے حساب تھے ہم باری باری ساریاں کا
 ذکر کراں گے ار گیل گیل جڑی مڑی بات ان رسم رواج کی بھی
 کراں گے۔

(گود بھرائی کی رسم)

ہم سب تھے پہلاں بات کراں گے گود بھرائی کی رسم کی،
 ہو کا پہلی پیر بھاری ہون کا بیرا لاگن پاچھ گود بھرائی کی رسم ہو سے ہو

کے باپ کیاں سے بہو کے بڑا کے ارسارے گھر کیاں کے کپڑے
مٹھائی آوے سے۔

بہوئیں سنگار پہر ایچ مینھ بٹھا دیں سیں بڈ بوڈھی سر پہ ہاتھ پھیر
کے دعا دیوں اردیرانی، جٹھانی نڈ گیت گاویں سیں، ارنڈ اپٹی بھا بھی
سے بدھائی مینھ کے مانگے میں بھاوج اپنی نڈاں جو مرے پوگے دان
کرے سے۔ گود بھرائی کی رسم میں ایک گیت جس مینھ بھاوج اپنی نڈ
سے تکرار کر ری سے ہنسی مجاق مینجھ
(گود بھرائی کا گیت)

روپیا مانگے نندی لال کی بدھائی
روپیا مانگے نندی لال کی بدھائی
ایک روپیا میرے سرے کی کی کمائی
اٹھنی لے لے نندی لال کی بدھائی
روپیا مانگے نندی لال کی بدھائی
ایک اٹھنی میرے جیٹھ کی کمائی
چونی لے لے نندی لال کی بدھائی
روپیا مانگے نندی لال کی بدھائی

ایک چونی میرے دیور کی کمائی
 دوونی لے لے نڈی لال کی بدھائی
 روپیا مانگے نڈی لال کی بدھائی
 ایک دوونی میرے بیا کی کمائی
 ٹھوسا لے لے نڈی لال کی بدھائی
 روپیا مانگے نڈی لال کی بدھائی

اس گیت میں بھوج اپنی نڈ گیل ہانسی مجاق میں دان کرٹ
 پہ تکرار کرے سے اریوہ تکرار گیت کی صورت میں جدائیں سٹے سے تو
 اصلی مجا تو پھر آوے سے۔ میں گیت محاری ثقافت میں ان گیتاں
 گیل خوشیاں کا مجا گھنا بدھ جے تھا اسے اسے موکیاں پے ساہا
 سال کے لڑے ہوئے بھی اپنی لڑائی بھول کے ان خوشیاں کا سواد
 لیا کریں تے۔

(گود بھرائی کی رسم)

جچا کی چٹوری جیبھ جلیبی مانگے سے

جچا کی چٹوری۔۔۔۔۔

اس کے سرے نیں گہنے دھریوالے

اِس کی سا سو کا لادیو مول جلیبی مانگے سے

چچا کی چٹوری جیبھ -----

اس کے دیو رنیں گہٹے دھر دیوالے

اِس کی دیو ارانی کا لادیو مول، جلیبی مانگے سے

چچا کی چٹوی جیبھ ---

اس کے بالم نیں گہٹے دھر دیوالے

ایب کے ساری ء لبتا دیوں کھول جلیبی مانگے سے

چچا کی چٹوری جیبھ جلیبی مانگے سے

اس گیت مینھ سکھی سہیلی کسی سوہٹی طریاں ناچ گائے بجا

کے سر اڑ آلیاں نیں ساریاں نیں کیو کر رگڑا لادیے سین ار بے

ساین سسنے تو سن داعر بے۔

(جنم گیت)

روہتک مینھ بٹے سے مٹھائی

چچا نیں بھاوے بالو شاہی

سر میرے پے کیسے منگو اوں

سرے کی مندی کمائی

چچا نیں بھاوے بالو شاہی
 روہتک مینھ بیٹے سے مٹھائی
 چچا نیں بھاوے بالو شاہی
 جیٹھ میرے پے کیسے منگواؤں
 جیٹھ کی اوت لگائی

چچا نیں بھاوے بالو شاہی
 روہتک مینھ بیٹے سے مٹھائی
 چچا نیں بھاوے بالو شاہی
 دیور میرے پے کیسے منگواؤں
 دیور نیں کرلی لڑائی

چچا نیں بھاوے بالو شاہی
 روہتک مینھ بیٹے سے مٹھائی
 چچا نیں بھاوے بالو شاہی
 نندو یا پے کیسے منگواؤں
 نندو لو بھن بھتائی

چچا نیں بھاوے بالو شاہی

روہتک میں مینھ بٹے سے مٹھائی

چچانیں بھاوے بالو شاہی

پتی میرے پے اے میں منگو اوں

پتی کی بیل بدھائی

چچانیں بھاوے بالو شاہی

روہتک مینھ بٹے سے مٹھائی

چچانیں بھاوے بالو شاہی

سائی تے اولیا یا اے مٹھائی

گیل مینھ لیا یا حلوائی

چچانیں بھاوے بالو شاہی

روہتک مینھ بٹے سے مٹھائی

جتانیں بھاوے بالو شاہی

ہریانوی لوک گیتاں مینھ بات، مجاق سب کا ہووے سے ار

ان گیتاں کے مینھ بھی۔ رشتیاں کا ماٹ سمان ہووے سے۔ جیو کر

اس گیت میں جد سر کی بات کری تو گیلے اس کی تھوڑی کمائی کہہ دی۔

ار جیٹھ کی بات آئی تو جیٹھ نیں چھوڈ کے جٹھانی یہ بول مار دیا جیٹھ کا
رشتہ بڑا تھا اس کا ماں راکھ لیا ار جٹھانی اوت بنادی۔

نڈویا کا ذکر کریا تو نڈ کی اتی بھتاوی اک واہ تو لو بھٹ
سے۔ ساریاں سے پچھ آ کے منھ کہہ دیا کہ میں تو اپنے پتی پے اے منگنا
والیوں، اسے کی تو بیل بدھائی سے مطلب اسے کی نسل بڈھی سے ار
پھیر اس کی بڈائی بھی کر دی اک واہ تو بیانی کی مٹھائی بناٹ آ لے
حلوائیاں اسے گھراں میں تو مہارے لوک گیتاں نیں جے سٹ کے
دیکھ تو بیرا لاگے نیں بکھت ماری لگائی رل کے نیں گاریں سیں تو
بو جھومت کیسا سواد آوے سے۔

گود بھرائی کے گیتاں سے جو کبھی بات ہولی ایب اگلی رسم
ہو سے بالک جامٹ کے باد "چھٹی" کی جد بالک چھ دن کا ہو جے تو پھیر
اس کے بال تروائے جاویں سیں ار بالک نیں نھواویں سیں۔ ار
گیل گیل گیت بھی گاویں ساری لگائی رل کے۔ ار چھٹی پے بال
تارٹانانی بھی بالک آئیاں پے مونہہ مانگیا دان لیوے سے۔ اس رسم
کا چھٹی کا ایک گیت گھٹا سترہا جو اس رسم پہ گایا جاوے تھا۔
(چھٹی کا گیت)

تاتا پانی اے سمندراں کا
 پوتا نہائیو اے مہارے دادا کا
 تاتا پانی اے سمندراں کا
 بیٹا نہائیو اے مہارے تاؤ کا
 تاتا پانی اے سمندراں کا
 بیٹا نہائیو اے مہارے باپو کا
 تاتا پانی اے سمندراں کا
 بیٹا نہائیو اے مہارے چاچا کا
 تاتا پانی اے سمندراں کا
 بھائی نہائیو اے مہارے بھائیاں کا
 تاتا پانی اے سمندراں کا
 بیٹا نہائیو اے مہارے پھوپھا کا
 تاتا پانی اے سمندراں کا
 بھینجا نہائیو اے مہارے ماما کا
 تاتا پانی اے سمندراں کا
 سالانہائیو اے مہارے جیجا کا

جِت گئے باٹے

ملک عالم گیر

آج کا بہت گھٹی ترقی آتا دور تے پہلاں رات سوٹ تے
پہلاں بڈے بزرگاں پے تے کوئے قصہ کہاٹی سٹنا اے بالکاں واسطے
بڈی انٹرٹینمنٹ ہويا کرے تھی۔ میرا تعلق بھی اس آخری نسل تے
ہے جس نین اپنے بڈیاں پے تے کوئی قصہ سُن کے ۽ نیند آیا کرے
تھی۔

مہارے بزرگ ہم نین صرف جن بھوت اور پریاں کی کہاٹی
۽ نہیں بلکہ اپنے آپ گلے بیتے ہوئے قصے بھی سٹنایا کریں تھے۔ ان
آپ بیتیاں مینھ سب تے گھٹی ان کی ہجرت اور ہندوستان مینھ ان
کے گزرے بکھت کی بات ہويا کریں تھی۔ کیونکہ ان بزرگاں نین
1947ء میں پاکستان ہجرت کرنی پڑی تھی۔ ان نین اپنی آنکھیاں
کے سامنے اپنے پیارے کٹدے دیکھے تھے اور اپنا گھر بار کام کاروبار
سب کچھ چھوڈ کے پاکستان آٹا پڑیا تھا اور نوا سیرا تے زندگی شروع
کرنی پڑی تھی۔

تو ان باتاں کا ان کی زندگی پے بہت گھٹا اثر تھا اور وینھ اپنے پوتا پوتی اور دیوتا، دیوتیاں نیں وینھ قصے یعنی اپنی آپ بیتی سٹاندے رھیاں کریں تھے۔ پچپن وینھ میری دادی بھی منے روز راجہ رائی اور جن پریاں کی کہانی، آدمؑ اور حواؑ، ابراہیمؑ اور نمبرود، موسیٰؑ اور فرعون اور پیغمبر حضرت محمدؐ کی زندگی تے سچے اسلامی قصے اور اپنے ہندوستان کے گام، گھر ار کھیتاں کی بات سٹایا کردی کہ کیوکر چٹا ارباجر کی فصل نیں ہرن مرگ، خرگوش اور موراں برگے پسو پنچھیاں تے بچاؤ واسطے کھیتاں میں جو نڈیاں پے چڈھ کے گپھیے چلایا کریں تھے۔ (کھیت کے بیج وینھ چار موٹے اور اونچے لاکڑ گاڈ کے ان پے گھاس پھوس، کانے اور لکڑاں کی چھات لا کے اونچی جگہ بنائی جاسے جس پے چڈھ کے کھیت کی رکھوالی کری جے سٹے اس نیں جو نڈا کہیں سنیں۔ اور ایک موٹا کپڑا کا چھوٹا سا ٹکڑا کے دونوں سریاں پے موٹی موٹی دور سی باندھی سیں اور اس کپڑا کے بیج وینھ ماٹی کے چھوٹے ڈلے یا گولی رکھ کے زور تے گھما کے ایک سہرا چھوڈ دیا جے سٹے جس تے گھٹی آواز گلے واماٹی کا گولا دور تک پھینکیا جاسکے سٹے۔ اس نیں

گوپھیہ کہیں سنیں) اور پھر سب کچھ چھوڑ چھاڑ کے پاکستان آٹا پڑیا ر
کیو کر پنچے، دادی بتاوے کہ ہندوستان میں مہار ا گام کا کرڈ تھا جو ضلع
سنام اور تحصیل نروانہ میں پڑے تھا۔ ڈاکخانہ اچاٹا تھا ار نچار کھیڑادرو
ہند کھیڑا، سربراہ، بھنبھوری اور چھوٹا اچاٹا وغیرہ پڑوس کے گام
تھے۔ کا کرڈ گام میں سب تے گھنٹے تو ہندو جاٹ تھے ار باہمنٹاں کے
بھی گھنٹے ء گھر تھے، باقی جو بڑے چمار اور لوہار تھے۔

مسلمان تھوڑے تھے جن میں سب تے گھنٹے تو کھار تھے باقی
تیلی اور چھمبیاں کے کچھ گھر تھے دو چار گھر مراٹھاں کے بھی تھے اور
لوہار مسلماناں کا بھی ایک گھر تھا۔

لگ بھگ سارا اے گام کھیتی باڑی کرے تھا۔ مسلماناں
میںہ تیلی اور چھمبیاں پے اچھی بھلی زمین تھی ارو میںہ کھیتی اے کریں
تھے باقی مسلمان بے زمین ہندواں کی طرحاں محنت مزدوری کریا
کریں تھے۔ سارا اے گام مل جل کے ریا کرے تھا کوئے فرق کوئی
تھا مہارے گھر کے دھورے سیو چند باٹیا کی حویلی تھی ہم سارے
بالک سارا دن حویلی میںہ کھیلدے ریا کریں تھے و میںہ کدے کسے بالک

نیں کوئی روکیں تھے۔ گلے اے نشی باٹیا اور گدھیلا جاٹ کی دوکان تھی جس پے تے سودا سلف لیا کریں تھے۔ گلے اے فتح سنگھ اور چنگی کھاتی کے گھر تھے۔ چنگی کھاتی کے گھر آئی بہت بھلی لگائی تھی پر اللہ نیں ان کے کوئے اولاد کوئی دیسی تھی واسا را دن منے کھلایا کرے تھی۔ مہارے گھر کے ڈونگر ذیلدار کی حویلی کی چھت پچھیت لاگے تھی۔

دھربا جاٹ، نشی، برسالا، منہیا اور سیہ جاٹ کے گھر پڑوس میں تھے۔ سیہ جاٹ کی گھر آئی لینا کی ماں بہت اچھی لگائی تھی، میرا بھائی عمر دین کی سگائی آئے آگئے چھاتر گام تے تو واسندیں دیسی گھی لے کے آئی کہ بیوؤ آرے سنیں گھر میں پتہ نہیں گھر میں گھی پڑیا سنے کہ نہیں۔

دھربا جاٹ کی بیٹی بھاگاں اور ڈونگر ذیلدار کی بیٹی کیسرا اور کئی اے چھوری ہم ساری اے مل کے کھیلیں جایا کریں تھی سارا اے کچھ بہت اچھا تھا پھر ہندو مسلمان کی بل چل ہونٹ لاگ گی اور

سنٹ لاگے بھی مسلماناں کا نیارا دیس بٹے گانیوں کوئی بیرا تھا کہ نیوں مار کاٹ ہو جے گی اور ہم نیں ہندستان تے جا ما پڑے گا۔

پھیر پاکستان بٹ گیا اور شہراں مینہ بہت گھٹی مار کاٹ شروع ہوگی۔ ہوئی ہوئی یا مار کاٹ شہراں تے گاماں تک ہوگی اور روزاے سنٹ لاگے آج واگام کاٹ دیا آج واگام پھوک دیا۔ کئی گاماں میں اتنی گھٹی آگ لاگی کہ ڈونڈے مہاراگام تک دیکھیں تھے لوگ ذیلدار کی حویلی اردڑپاں پے چڈچڈ کے دیکھیا کریں تھے۔ حصار مینہ نیا ٹا مسلمان جاٹاں کا گام تھا اس پے دھانسو کے بسوٹیاں نیں چڈھائی کردی گلے اور گاماں کے ہندو بلارا کھے تھے، ان نیں سااگام جلا دیا جو لوگ آگ تے باہر لکڑن لاگے وینہ برچھی بھالیاں گلے کاٹ دیے۔

مہارا دھورے اے دندو داگام پے چڈھائی ہوئی اوڑے تیلی، بلوچ، لوہار اور میراٹی مسلمان تھے گھر گھنکھرے تو کاٹ دیے تھوڑے بہت بچ کے پاکستان آگئے کچھ اوڑے کے اے ہندواں نیں بچا لیے جن گلے ان کا اچھا آٹ جاٹ ہووے گا۔ وینہ آج بھی

اوڑے اے ستیں رہیڑہ گام پے چڈھائی ہوئی، نیلیاں آلی کھیڑی پے
چڈھائی ہوئی وا مسلمانان کا تگڑا گام تھا۔ تیلی مسلمان تھے ان نیں
توپ بٹا رکھی تھی۔ بیشتر آگالیا ان نیں دھیڑ کا پھیر بھی ان نیں گام
چھوڈٹا پڑیا اور پاکستان آٹا پڑیا۔ موٹھ لوہاری پے دلی تک کے جاٹاں
نیں چڈھائی کری روہتک کانی کونیں بھر گے لگایاں گلے جن نے عزت
بچاؤ واسطے کونیاں میں ڈانک مار مار کے جان دے دی۔ ماجر اگام
مینھ میرا چاچا رہیا کرے تھا۔ میرا چاچا کی بیٹی اپنی بھابھی کا چھلا
کراٹ آری تھی اس کے آپے بھی بالک ہوٹ آٹا تھا، موٹھ لوہاری تے
واپس آندے ہندو ان کے گام مینھ پڑ گے، ان کے گھر مینھ آدمی تو
کوئے پائے کوئی وینھ کھیتاں مینھ جارے تھے وینھ دونوں نڈ بھابھی
نیں گام تے باہر جو ہڑ پے لے گے پکڑ کے اور کپڑے پاڑ دے دونوں
کے اربو لے ناچو سارا ماجر اگام کھڑیا دیکھے تھا پر کسے مینھ روکٹ کی
جرات کوئی تھی پھیر وینھ دونوں ماردی ان کے سیٹ مینھ تلوار ماری
بالک باہر پڑے آگے ایک نیں بالک بھالا پے ٹانگ دیے اور بولیا پہنچا
دی ہیں گاڑی تو پاکستان۔

مہاراگام مینھ ایک آدمی اور لگائی آئے جنگل۔ پٹیاہ کانی کے ویں
لوے ہی مہارا ساراگام کاٹ دیا ہم بچ کے بھاج آئے ہم نیں راکھ
ہو کوئے پر کسے نیں کوئی راکھے سارے ڈریں تھے نی کدے ہندو ہم
نیں مار دیں مینھ بچارے بگ گے دو دن بعد ان دونواں کی لباس
متلوڈا کے ٹپیاں مینھ پڑی پائی مار دیئے بچارے کسے نیں۔

مہارے گام آلیاں کا اللہ بھلا کرے مہاراگام بہت اچھا رہ
گیا۔ مہارے تے کسے نیں کچھ نہیں کہیا بس دو لونگاڑے چھورے
تھے ایک جے کرن کا چھورا تھا جس کے ماں باپ مر لیتے تھے اور بہن
بھائی کوئے تھا نہیں اس نے کوئے پوچھن آلا کوئی تھا، پردھرم جاٹ
ایک بہت بھلا ماٹس تھا جد اس کے سامنے اس کے بیٹا نیں کہیا کہ
مسلماناں نیں ماراں گے تو وہ بہت غصہ تے بولیا "تھم پاکستان کے
ساٹے لاگو سو، کل تک کوئی مارے تھم نیں مسلمان آج ان کا بھکت
ڈگ گیا تو تھم بد معاش بنو سو پیں سدا کے ارے اے تھے اور زمیناں
کے مالک ہیں خبردار رہو کسے نیں کچھ غلط حرکت کری تو میرے تے
برا کوئی ہووے گا کوئے۔"

ایک منگل کا نا بھی تھا وینھ کہندے پھریں تھے کہ ہم موٹھ
 لوہاری تے ایک رانگڑی لہاواں گے جس کی گھٹی مینھ تے پانی چالدا
 دکھے گا ارگام آلے مسلمان تے بھی بڑلیاں گے ارفقیریا تیلی نیں بھی
 بڑاں گے (فقیریا تیلی دادی کا باپ تھا) دوسرا بولیا فقیریا تیلی تو بھلا
 ماٹس سنے (دادی کا باپ جھاڑے پھونکے کرے تھا تو سارا گام اس
 کی قدر کرے تھا) تو دوسرا بولیا۔ فقیریا تیلی کا کے بھلا و اتو بکریاں کی نیڑ
 گرک سی اڈا کے رکھ دے سنے (قربانی کے جانور ذبح کرے تھا و ا)
 اسکا بھی علاج کروں گا۔

مہارے گام مینھ دربار بھی تھے گھونگر بابا اور کلی گر بابا کے
 دربار گھونگر بابا زندہ دھرتی مینھ سمایا ہوا تھا اور اس کے مزار پے بالو
 بانک کا ایک بابا مجاور تھا ایک دن اس نیں سارا گام کی پنچاوت بلائی
 اور کہیا کہ ارگام واسطے بابا کا ستر بسے ہے کہ کا کرگام کا کوئے ہندو پانے
 گام کے مسلمانان نیں کچھ نا کہوے، تا کہ مسلمانان گام پے چڈھائی
 کرن جاویں جے کہے نیں اسا کچھ کریا تو وا خطا کھاوے گا اور گام کے
 مسلمانان واسطے سندیسے سنے کہ گام کے مسلمانان نیں پاکستان جاٹا

پڑے گا اور ویں صحیح سلامت پاکستان پہنچیں گے اور ان کا کوئی نقصان کوئی ہوئے بلکہ راہ میں بالک پیدا ہووے گا اور چاولاں آلی جگہ پے پہنچو گے۔"

سارا گام نیں با بے کی بات دھیان تے سٹی اور دل تے مان لی پرانی نیں نیاں نین مذاق اڑایا دو چار دن بعد مومن کھار کا چھورا ڈونگر ذیلدار کے کھیت مینھ گھاس پاڑا پھرے تھا۔ ڈونگر ذیلدار نیں دیکھیا کہ چنرا اورے کرن آلا چھورا بھی اوڑے اے پھریں تھے تو وا ذیلدار مومن آلا چھورا دھور آیا اور بولیا جلدی سی گھراں بھاج جا کدے میں تیرا کوئے نقصان کا کردیں ڈونگر تو اس چھورا نیں سمجھاں آگیا تھا پیچھے سے اس کی بندوق چڑانے ٹھالی اور جے کرن آلا تے بولیا یا کیو کر چالے گی رے۔

جے کرن آلا کہوے دھیان را کھیے اے کدے میرے اے ٹھوک دیے میرا تو کوئی بہن بھائی بھی کوئی اور۔ اراتنہ مینھ اے چھورے پے بندوق چل گی ار گولی سیدھی جے کرن آلا کے لاگ گی ذیلدار آواز سن کے گیا تو واڑ پھٹ لاگ ریا تھا اس نیں گام مینھ لے

کے آئے اتنے مینھ و امر لیا ذیلدار نین سوچیا جے تھائے مینھ بتایا تو
 گام مینھ پولیس آوے گی اور گام کے مسلماناں نین بیرالاگ جے گا
 اور کوئے مسئلہ نابٹ جے۔ اس نین چترا کا بابو دھرما جاٹ کے 100
 روپے جرمانہ کر کے چپ کر کے واٹو کن دے دیا۔ اس نین انت
 ٹھار کھی تھی و امر گیا۔ کرڑکی گھاٹی اس کے بعد چترا کڑیاں چاھل گیا
 اور دوبارہ گام مینھ کوئی دیکھیا۔

میں ایک گھر آلا سوں

تنزیلا راٹا

(پطرس بخاری کے مضمون "میں ایک میاں ہوں" کا ہریاٹوی ترجمہ)

میں ایک گھر آلا سوں۔ کہنا مانٹ آلا^۱ اپنی گھر آلی روشنی میں اپنی ہر ہر بات کے بارے میںھ جان کاری دیوں سوں مَنے نوں لاگے سے بھنی یو ء میرا سب تے پہلا فرض ہے یو ء اے مھاری جنڈگی کا اصول سے۔ بس اللہ مھارا انجام اچھا کرے۔

میری لگائی میرے جگرمی یار دوستاں کی ساری عاداتاں میں خوب جانے ہے جسکا نتیجہ یو ء ہے کہ مَنے اپنے یار جتنے اچھے لاگے ہیں میری گھر آلی کی نظراں میں بچارے اُتنے رڑکے ہیں۔ میرے یاراں کی جو عاداتاں مَنے بھاویں سیں میری لگائی انھاں میں ایک سدے سادے بندے واسطے بے عزتی کا کارٹ سمجھے ہے۔

ایب تمھ یو ء نہ سمجھ لیو بی میرے یار دوست کوئی اسے اُسے آدمی
سیں کہ جنکا نام بندہ کسے چج کی جگہ لیوے تو پچھتا پڑے۔ کچھ
بیچارے اپنے کام کی وجہ سے کچھ میرے برگے یاراں کے گیل رہن
کی وجہ سے سارے ء بیج کے طبقے سے ہیں لیکن ایب کے کروں کہ
ان سنگیاں کی یاری میرے گھر کے سکون واسطے خطرہ بندی جاری
ہے۔

جس طرح ایب تھم اپنے مرزا صاب نیں ء دیکھ لو اچھا بھلا بندیاں
برگابندہ ہے۔ وَا ہے تو جنگلاں کے محکمے میںھ اچھی جگہ لیکن سکل
اسی بھولی سے کہ نُون لاگے ہے جَنُونِ میحت کا امام ہوئا۔ جُوا وَا
نی کھیلدا۔ گلی ڈنڈے کا شوق اس نیں کوئی۔ کسے کی گوجھ کاٹدا
بھی کدے نیں پکڑیا گیا البتہ کبوتر ضرور پال را کھے سیں ان میںھ ء جی
لاگے ہے اسکا۔ میری لگائی تو اسے نرم دل آلی سے اک محلے کا کوئی
بد معاش جو اکھیلدا پکڑا جاوے تو اس کی ماں دھورے ماتم کرن چلی
جاوے ہے۔ گلی ڈنڈا کھیلدے کسے کی آنکھ پھوٹ جے تو اسکی نلم
پٹی کرن چلی جاوے گی، کوئی قسمت کا دھٹی جیب کاٹدا پکڑا جاوے

تو سارا دن بیٹھی روندی رُوے گی لیکن وَابھلا مائس جس نیں ساری
 دنیا مرزا صاب کہندی نہی تھکدی میرے گھر میں "مرٹ جوگا کبوتر باز"
 کے نام سے جائیا جاوے ہے کدے بھول کے بی آنکھ اوپراں نیں
 کر کے کسے چیل، کاگ، گدھ، شکرے نیں دیکھدا مل جوں بس فیر
 روشنی نیں لاگے گا کہ میرا لوگ ایب کبوتر باز بنیا کہ ایب۔

اس کے باد مرزا صاب کی شان منھ ایک قصیدہ پڑھیا جاوے گا آر
 گیل ء میری بی تعریفاں کے پل باندے جاویں گے۔

ایک دن جدیوے ہويا تو مَنے پکا ارادہ کر لیا بھئی اس کمبخت کے
 دھورے دوبارہ کوئی پھٹکوں، آخر تو گھر کا سکھ چین سب سے بدھ
 کے ہے۔ گھر آلی کے سامنے یار دوست گے ہیں؟ میں گیا گسے منھ
 بھریا ہويا مرزا صاب کے گھر آر کوڑ بجایا۔ بولا اندر آجا۔ مَنے کہیا
 نہیں آندا! میں بار آ۔ کھیر میں اندر چلا گیا۔ سارے وجود پہ تیل تلے
 ایک کبوتر کی چوڑ منھ منھ لیے دھوپ سیکٹ لاگ را۔ مَنے بولا بیٹھ
 جا۔ مَنے کہیا نہ بھئی بیٹھوں تو کوئی۔ آخر بیٹھ گیا۔ اُن نیں بی میرے

تیوراں کا بیر ا تھا بولا۔ "کیوں بھئی گھیر تو ہے؟ مَنے کہیا کچھ نہی۔ بولا
کیو کر آیا سَے؟"

ایب میرے جی میں آیا ایک دم اے ساری رام لیلّا سُنّاؤں آر گھر
جاؤں فیر سوچیا کہ نیوں کہوں تو مذاق ءنا سمجھ لے چلو کسے ڈھنگ
سے بات کروں ہوں۔ فیر سمجھ میں ء کچھ نہ آیا تو میں بولیا۔
مرزا۔ بھئی کبوتر بوہت مہنگے ہووے ہیں؟"

یہ سُنْدے ء مرزا نیں چہین تے لے کے امریکہ تک کے سارے کبوتر اں
کے بارے میں بھتا نا شروع کر دیا فیر داٹے کے مہنگے ہون کا بھتا نا
لگ گیا فیر دانے آر کبوتر اں نیں چھوڈ صرف مہنگائی پہ آگیا۔ اُس دن
تو میں چپ کر کے گھر آگیا لیکن اِ بے بی کھٹ پٹ کا ارادہ تھا۔ خدا
کا کرنا اِسا ہو یا کہ شام نیں گھر آئی مان گی تو مَنے کہیا۔ "ایب مرزا
صاب سے بگاڑن کی گے ضرورت ہے؟" یوں مرزا سے بھی منہ سدا
کر لیا۔

میری جندگی کڑوی کرن واسطے ایک ناں ایک دوست ہمیشہ تیار
رہوے ہے۔ میری گھر آئی نیں ہر وقت میرے مینھ کسے نہ کسے

دوست کی بُری عاداتاں نظر آندی رہوے ہیں اُورے تک کہ میری اپنی سیرت تو جماء کھتم ہوگی ہے۔

شادی تے پہلے میں گدے دس بچے سو کے اٹھوں تھا گدے گیارہ۔
 ارایب کتنے بچے اٹھوں ہوں؟ اس کا اندازہ صرف وینھء لوگ لگا
 سکیں ہیں جنکے گھراں یئھ سیرے کا ناشتہ زبردستی سات بچے کروا
 دیں ہیں۔ اگر میں گدے انسان ہون کی وجہ سے تڑکے جلدی نہ
 اٹھوں تو فوراً گھر آلی کہوے گی۔ "یہ اُس نکھٹویار نسیم گیلیاں رہن
 کا نتیجہ ہے۔"

ایک دن میں تڑکے ء تڑکے نہا رہیا تھا جاڈے ہون کی وجہ سے ہاتھ
 پیر کانبن لاگ رے تھے۔ لگاؤں تھا صابن سِرہ ارجا وے تھاناک
 میں 'مَنے اللہ ء جائے گے سوچ کے گاٹا گاٹا شروع کر دیا' توری چھل
 بل ہے نیاری۔۔۔ "بس فیر کے تھا پہلے تو میرے سے کھوب لتاڑیا
 ارفیر اس کا سبب میرا یار پنڈت جی بتایا گیا۔

تھوڑے دن اُورے کی بات ہے ایک اِسا حادثہ ہویا کہ مَنے سارے
 یار دوستاں سے چھوڈن کی قسم کھالی۔

تین چار دن پہلے کی بات ہے روشنی نہیں میرے سے اپنی ماں کے گھر
 جان کا پوچھیا۔ جد سے مہاری شادی ہوئی تھی روشنی ایک دو باری
 ء ماں باپ کے گئی تھی ا ر فیر اُس نے کچھ اس طراں پوچھیا کہ
 میرے سے انکار کرنا مشکل ہو گیا۔ بولی۔ "فیر میں ڈیڈھ بچے کی گاڈی
 سے چلی جاؤں؟"

مَنے کہیا۔ "اور کے؟"

و ا جان کی تیاریاں مینھ لگ گی ا ر میں اپنی آزادی کے بارے مینھ
 سوچن لاگ گیا کہ ایب بیشک میرے دوست آویں، بیشک ہم ادھم
 مچاواں، بیشک گائے گاواں، جد جی کرے گا اٹھوں گا جد جی کرے
 گا سوؤں گا، جد دل کرے گا تھیٹر دیکھن جاؤں گا۔ یائے بات
 سوچدے سوچدے میں بولیا۔

روشنی جلدی کرنا تو گاڈی لکڑ جے گی۔

ساتھ اے اسٹیشن گیا اس نے بٹھاں۔ جد گاڈی مینے چڈھا دیا تو کہن
 لگی "کھت لکھدے رہیو"

مَنے کہیا "ہر روز۔ ا ر تیں بی لکھدی رہیے"

"روٹی کھاٹ مینھ دیر ناں کرے" آ رہاں صاف ستھری جراباں آ
رومال الماری کے نچے آٹے خانے مینھ راکھے ہیں"

فیر ہم دونوں چپ ہو گے آ ایک دوسرے کی شکلاں دیکھدے
رہے۔ اُسکی آنکھاں مینھ آنسو آگے میرے بی جی کے کچھ ہونٹ لاگا۔
آخراً گاڈی چلی گئی آ میں گھٹی ء دیر لاری اڈے پہ کھڑا رہیا۔

فیر ایستا ایستا چالدا ہویا کتاباں کی دکان تک آیا آ رسالیاں کے صفحے
پلٹ پلٹ کے تصویراں دیکھدا رہیا۔ ایک اخبار کھریدا گو جی مینھ
گھالیا آ کھر کاہنی جاٹ لگا فیر خیال آیا ایب جرے کھر جاٹا ضروری
کوئی ایب جرے جی مینھ آوے جا سکوں ہوں 'جی کرے تو ٹہلدا
رہوں، جی کرے تو قلابازیاں لاند ا پھروں۔

کہوے ہیں جد افریقہ کے جانگلیاں سے کسے تمیز آٹے ٹلک مینھ رکھیا
جاوے ہے تو اُنہاں نیں واسارا کچھ بہت اچھا لاگے ہے لیکن جس
طریاں ء واپس جنگل مینھ آویں ہیں تو کھشی کے مارے چیکاں مارٹ
لگیں ہیں۔ کچھ اسی ء حالت میری بھی ہو ری تھی۔ میں فٹا فٹ
اسٹیشن سے باہر لکڑیا، تانگے آٹے سے بلایا، آ چھلانگ مار کے اس

مینھ بیٹھ گیا۔ لاتاں کھوب کھول لی اُر اُس تے کہیا، بھئی کلب لے چال۔

رستے مینھ ایک ضروری کام یاد آیا تو تانگہ مڑوا کے گھر گیا اربار سے ء نوکر سے آواز دیئی:

"ارے امجد!"

"جی ہجور!"

"دیکھیے نائی نے کہہ دیے کل گیارہ بجے آوے"

"اچھا جی۔"

"گیارہ بجے کاسٹ لیا نا؟ کے روز کی طریاں فیہرچھ بجے نہ آجے۔"

"جی بہت اچھا ہجور۔"

"اُر جے گیارہ بجے سے پہلے آجے تو دھکے مار کے بار کر دیے۔"

کلب پہنچا آج تک گدے دن کے دو بجے کلب نہیں گیا تھا اندر گیا تو کوئی نہ کو کو۔ بندہ نہ بندے کی ذات۔ سارے کمرے دیکھ مارے۔ بلیئر ڈالا کمرہ کھالی، شطرنج آلا کمرہ کھالی۔ صرف کھاٹا آٹے کمرے مینھ ایک ملازم چھریاں تیز کرن لگ را۔

اس سے پوچھا "کیوں بھئی آج کوئے کوئی آیا؟"

بولا "ہجور تھم نہیں سیرا اے ہے اس وقت بھلا کون آوے ہے؟"
 جی بڑا کھٹا ہوا۔ بار نکل کے سوچیا ایب کے کروں؟ کچھ سمجھ نہ آیا تو
 مرزا صاب کے گھر جا پہنچیا۔ اوڑے جا کے سنن میں ملیا کہ ابے دفتر
 سے ء کوئی آیا۔ دفتر چلا گیا۔ مئے دیکھ کے بڑا ہیران ہوا۔ مئے اس
 سے ساری بات بھتائی !

کہن لا گیا۔ "تیں بار کرے مینھ بیٹھ" میں ابے آیا کام کھتم کر کے
 تیرے ساتھ چلوں گا شام کا کے پروگرام ہے؟"
 مئے کہیا "تھیٹر"

بولا چل ٹھیک ہے "تیں بیٹھ میں آیا"

بار کرے مینھ ایک گرسی پڑی تھی میں اُس پہ بیٹھ گیا آر انتظار کرن
 لگ گیا۔ گوجی میں تے اخبار کاڈھ کے پڈھٹا شروع کر دیا۔ الف سے
 یے تک سارا پڑھ دیا فیر پی چار بجن مینھ گھنٹہ رہا تھا مئے دوبارہ پڈھنا
 شروع کر دیا 'سارے اشتہار پڈھ لیے آر فیر سارے اشتہاراں سے
 دوبارہ بی پڈھ لیا۔

آخر کار اخبار پھینک کے بے تکلف ہو کے جمائیاں لین لگ گیا، جمائی پہ جمائی۔ دے جمائی پے جمائی۔ اورے تک کہ جبرے دکھن لاگ گے۔

فیر ٹانگاں ہلاٹا شروع کر دی، اس تے بی تھک گیا۔

فیر میز پہ طبلہ بجاندا رہیا۔

بہت ۽ تنگ آگیا تو دروازہ کھول کے مرزا سے کہیا "ایب چالے گا بی کہ مَنے باٹ کرا کرا کے ۽ مارے گ۔ امرود دکتے کا سارا میرا دن برباد کر دیا"

اوڑے سے اٹھ کے مرزا کے گھر گئے۔ شام بڑی ۽ اچھی گزری روٹی کلب مینہ کھائی۔ فیر اوڑے سے دوستان کے ساتھ تھیٹر چلے گئے، رات میں ڈھائی بجے واپس گھر پوہنچے سرہانے پہ سر رکھا آر بے ہوشیاں کی طراں سو گے۔ تڑکے آنکھ کھلی تو کمرے مینہ کھوب دھوپ تھی گھڑی دیکھی تو پوٹے گیارہ ہو رہے تھے۔ میز سے سگرٹ اٹھا کے سلگایا آر فیر اونگھن لاگ گیا۔

گیارہ بجے امجد اندر آیا آر بولا "ہجور! حجام آیا ہے۔"

مَنے کہیا "اُرے اے بلا لے"

یہ عیشِ مدّت بعد نصیب ہوئی تھی کہ بستر میں اے پڑے پڑے
 حجامت بنوالی آرام سے اٹھیا نہادھو کے بار جان واسطے تیار ہویا
 لیکن طبیعت روزِ جسی نہ تھی۔ جس کی امید لگائے بیٹھا تھا کہ آج تو
 سارا کچھ مَن مرضی سے کرا ہے جی بڑا کُخش ہو جے گا۔ جانے
 جانے الماری سے رومال کا ڈھیا تو اللہ اے جانے جی میں کے آئی
 کہ پاگلاں کی طرح وہیں کرسی پہ بیٹھ گیا آر رومال سے دیکھدا رہیا۔
 الماری کا ایک خانہ کھولا تو سرمئی رنگ کا ایک ریشمی دوپٹہ نظر آیا۔ بار
 کا ڈھیا ہلکی ہلکی عطر کی کھشبو آری تھی۔ بڑی دیراں تک ہاتھ پھیردا رہیا
 'دل بھرا آیا' گھر ایک دم سُنّا لگن لگ گیا۔ بھتیرا اپنے آپ سے
 سمجھایا لیکن آنسو ٹپک اے پڑے۔ بس آنسو آں کا گرٹا تھا کہ بیتاب
 ہو گیا آر سچی مچی روٹ لگ گیا۔ سارے جوڑے کا ڈھ کا ڈھ کے
 دیکھے پر رب جانے اِسا کے یاد آیا کہ کھود سے سمبھال اے نہ سکیا۔
 اکھیر ہوگی گھر سے نکلا آر سدا تار ر گھر گیا۔ اوڑے جا کے تار دیا کہ میں
 بہت اداس ہوں جلدی آجا !

تار دیٹ کے بعد تھوڑا حوصلہ ہویا یقین تھا کہ روشنی جتنی جلدی آسکی
 آجے گی۔ دل نے کچھ آرام آیا آر ایک بڑے بوجھ سے نجات مل گی۔

دوسرے دن دوپہر میں مرزا کے گھرتاش کھیلٹ جاٹا تھا۔ وہاں پہنچے تو پتا چلا کہ مرزا کے باپ سے ملن مہمان آرے ہیں۔ اس سے ساریاں نہیں کہیا کسے اور کے گھر چالو۔ اپٹا گھر تو خالی تھا اے سارے یار دوست وہیں آگے۔ امجد سے کہہ دیا کہ حقے میںھ تھوڑی سی بی دیر ہوئی تو تیری گھیر کوئی۔ آر پاناں کا سلسلہ بھی بغیر کسے وقفے کے چلدا رہنا چاہیے۔

ایب اس کے بعد کے ہویا اس میں صرف مرد اے سمجھ سکیں ہیں۔ شروع شروع میںھ تو تاش عین اسواں کے مطابق کھیلدے رہے فیر گھڑی دو گھڑی بعد مستی شروع ہوگی 'یاراں میں ایک دوسرے کے پتے دیکھٹے شروع کر دیے ایب حالت یوہ ہوئی کہ آنکھ بچا بچا کے پتے اڈاٹے شروع کر دیے آر ساتھ اے ہنسی کھیل بی۔

تین گھنٹے بعد حالت یوہ تھی کہ کوئی گوڈا ہلا ہلا کے گاٹ لگ را ہے، کوئی فرش پہ باں ٹکائے گت بجا را ہے۔ کوئی تھیٹر میںھ سٹیا ہویا کوئی جملہ بار بار گا را ہے۔ آر ساتھ اے تاش بی کھیلٹ لگ رے ہیں۔ تھوڑی اے دیراں بعد دھمال شروع ہوگی آر ایک مسخرے میں انوکھا اے کھیل بتایا جس کے آخر میں ایک جٹا بادشاہ بٹ جے ہے۔

دوسرا جٹا وزیر آرتیسرا کو تو ال آر جو سب سے ہار جے ہے وا چور بن جے ہے۔ ساریاں نے کہیا "واہ! کے بات کری" ایک بولا "فیر آج جو چور بنے گا اُس کی تو شامت اے آجے گی"

دوسرے نے کہیا "اور نہی تو کے بھلایوے کوئی اِسا اُسا کھیل سے۔ سلطنتاں کے معاملے ہیں سلطنتاں کے!"

کھیل شروع ہویا، آر قسمتاں کا ماریا میں چور بن گیا۔ ایب جتنے منہ اتنی باتاں کہ ہر بندہ اپنی مرضی کی سزا چور واسطے بتانھ لاگ گیا۔ کسے نے کہیا "ننگے پیر بھاگداجا وے آر حلوائی کی دکان سے مٹھائی لے کے آوے" کوئی بولا "نہی بھئی ساریاں کے پیر پڑے" آر ساریاں سے ایک ایک دو دو تھپڑ کھا

ایک اور منچلا بولا "نہ بھئی ایک پیر پہ کھڑا ہو کے ہمارے سامنے ناچے۔"

آخر میں بادشاہ سلامت بولیا "ہم حکم دیواں ہاں کہ چور سے کاغذ کی ایک لمبوتری نوک دار ٹوپی پہنائی جاوے آر اس کے منہ پہ کالک ٹل دو۔ آریہ اسے حالت میں اندر جا کے حقے کی چلم بھر کے لیاوے۔"

سارے بولے " کے عقل ہے بادشاہ سلامت کی ۔ کے سزا دیتی چور
سے واہ! واہ! "

میں بھی مستی میں تھا مئے کہا تو کے ہے؟ آج میں ہوں کل نے کوئی
اور ہووے گا ۔ بڑے مزے سے اپنا مونہہ آگے کریا ۔ ہنس ہنس کے
وایہودہ سی ٹوپی بی پہن لی فیر چلم اٹھائی آر زنا نے مینہ چولہے کا نہی
چلا گیا ۔ میرے پیچھے سارے ہنس رہے تھے ۔

اے صحن مینہ پہنچا اے تھا کہ بار کا کواڑ کھلا آر ایک عورت برقعہ
پہنے اند آئی ۔ جو نقاب اُلٹایا تو روشنی !

میرا تو سانس کھشک ہو گیا ، بدن کانٹ لگ گیا آر زبان تالو کے جا لاگی
سامنے وا اے روشنی تھی جس سے تار دے کے بلوایا تھا اک میں
بہت اداس ہوں تیں جلدی آجا آر ایب اپنی حالت یوے تھی کی منہ پہ
کالک تلی ہوئی ، سر پہ کاغذ کی ٹوپی ، ہاتھ میں چلم آر مردانے سے مسلسل
آندی ہوئی ہانسٹ کی اوازاں ۔

اپنی تو سیٹی گم ہوگی آر سارے حواس ساتھ چھوڑ گے ۔ روشنی
تھوڑی دیر تو چپکی کھڑی رہی فیر بولی ۔۔۔ لیکن گے بتاؤں آر کس

طراں بتاؤں کہ کے بولی؟ اس کی آواز تو جس طراں میں بیہوش ہو کے
سن ریا تھا۔

اے تک تمھ نے یو تو پتا چل اے گیا ہوگا کہ میں آپ تو بہت شریف
ہوں اَر دُنیا میں میرے جسا کوئی گھر آتا نہی ہوگا۔ میرے سسرال
آٹیاں کا بی ساریاں کا یو اے کہتا ہے اَر میرا اپنا دین ایمان بی یو
اے ہے لیکن ان دوستاں میں میرے سے کتے کا نہی چھوڑیا ذلیل
کر کے رکھ دیا۔ بس اسے واسطے ایب مَنے پکا ارادہ کر لیا کہ ایب گھر
رہوں یا کام پہ جاؤں نا تو کسے سے ملوں گا نا اے کسے میں اپنے گھر
آن دیوں گا سوائے ڈاکیے اَر نانی کے۔ اَر ان سے بی کم سے کم بات
کروں گا۔

"خط ہے؟"

"ہاں جی"

"دے جا چلا جا۔"

"ناخن کاٹ دے۔"

"بھاج جا۔"

مہارے چاہے نیں پھوٹو ٹانگیا

(سید امتیاز علی تاج کے مضمون "چچا چھکن نے تصویر ٹانگی کا ہریاٹوی ترجمہ)

ترجمہ: اختر مرزا

مہارا چا کدے کدے ء اپٹے ذمے کام لیا کرے سے۔ ار
جد بھی وا اپٹے ذمے کوئے کام لیوے سے تو سارے گھر نیں ناچ نچا
دیوے سے۔

"ارے او چھورے، اورے آ۔ اڑے جا، یو کر دے، وا
کر دے" گھر بجار ایک ہو جے سے۔ دور کیوں جاؤ سو، پرسوں پرلے
دن کا جکرا سے۔ دوکان پے تے پھوٹو کا چوکھٹا لاگ کے آیا تھا۔ آٹن
سیتی پھوٹو دیوان خانے میں دھر دیا تھا۔ کیل نیں چاچی کی نظر اس
پھوٹو پے پڑی۔

نیوں بولی۔ "چھٹن کے بابو، یا پھوٹو کد لگ اورے دھری رہ گی۔؟ بالکاں کا گھر سے۔ جے ٹوٹ گی تو بیٹھے بٹھائیں دو پییاں کا دھکا لاگ جے گا۔ کوٹ ٹانگے گا اس نیں؟"

"رے بولی۔" ٹانگے کا کوٹ۔"

"میں آپ ٹانگوں گا۔ کوٹ سی دودھ کی نھر کا ڈھٹی سے۔ توں رہن دے۔ میں آپے سارا کام کر دیوں گا۔"

نیوں کہندے ء۔ چاچا شیروانی کے بٹن کھول کے پھوٹو ٹاکنٹ لاگ گیا۔ گھر کے نوکر امامی تئیں کہیا۔ "میگم پے تے دو آنے لے کے چوبھے لے آ۔" ایسے وabarٹے تے لکڑیا تھ۔ مودے تے واج دے کے کہیا۔ "مودے۔۔ رے مودے۔۔ توٹا جا اُس امامی کے پچھے۔ اس نیں کہیے، تین انچ کے کو کے لیاٹے سیں۔ دیکھئے۔ بھاج کے نیں توٹا جا۔ ار راہ ء مینھ پکڑ اُس نیں۔"

لیتو جی۔ نیوں پھوٹو ٹانگنٹ کا کام شروع ہو گیا۔ ار ایب آوے گی سارے گھر کی شامت۔

نخے تئیں رکا ماریا۔

نیوں کیہو۔ وا جوٹسا راجھ ہے ناں جس کے گیلیاں سیدھ
دیکھیا کریں سیں۔ وادے دیوے۔ مڑی سی پھوٹو ٹانگٹی سے۔"

" جائیے میرے لال۔ پردیکھتے سلام جرور کرے۔ ارٹانگ کا
پوچھنا ناں بھول جائیے۔۔۔ اچھا؟"

" ارے للو۔۔۔ توں کڑے چالیا مائس۔۔۔۔ تیرے متیں
کہیا سے ارے مریارہ۔۔۔۔ پیڑی پے منے چاندٹا کون دکھاوے گا؟"
" ارے آگیا کے امامی؟"
" لے آیا کوکے؟"

"مودا مل گیا تھا اک نہیں۔"
"تین تین انچ آٹے ہیں ناں؟"
"بس جمنائے ٹھیک ہو گیا۔۔۔"
"لے بھائی۔ سنتلی منگو اٹا تو بھول آ گیا۔ ایب کے کروں؟"
"جائیے میرا بیر اتوٹا سا۔۔۔"
"ہوا کی طریوں جا۔ ار بس ایک گز سنتلی بوہت سے۔ ناں
گھٹی موٹی ہو ار ناں گھٹی پتلی۔"

"نیوں کہہ دیئے پھوٹوٹانگٹنیں چاہیے۔۔۔"
"ارے وڈو۔۔۔۔۔ رے وڈو۔۔۔۔۔ کڑے مر گیا۔۔۔"
"ایک تو اس گھر میںھ ساریاں نیں اپ اپنی پڑری سے۔"

"نیوں نی اک آ کے مڑا کام کراں دیں۔"

"اُرے آ۔۔۔۔۔ کرسی پے چڈھ کے پھوٹو پکڑا منے۔"

بھائیو۔۔۔۔۔ اللہ اللہ کر کے پھوٹو ٹانگن کا وقت آگیا۔ پر

ہوئی نیں کوٹ ٹالے۔۔

چاچا پھوٹو ٹھا کے اُسکا وزن کرے تھا۔ پھوٹو ہاتھ مینھ تے

پُھٹ گی۔ تے پڑ دیں ء شیشہ کرچی کرچی ہو گیا۔ ساریاں کے مونھ

تے ہائے ہائے لکڑیاں آر ایک دوسرے کا مونھ دیکھن لاگ گے۔

چاچا کچھ شرمندہ ہو کے شیشے کے ٹکڑیاں نیں دیکھن لاگ

گیا۔ بس وقت کی بات اک شیشہ آنگلی مینھ چُجھ گیا۔ ار خون کی تیری

بندھ گی۔

پھوٹو نیں بھول کے رُمال ٹوہن لاگ گیا۔ رُمال کڑے تے

پاوے تھا؟ رُمال تو شیروانی کی گوجھ مینھ تھا۔ ار شیروانی تار کے

کڑے دھری تھی۔ کوئے بیرا کوئی تھا۔

ایب نیوں ہویا اک پھوٹو ٹانگن کا سامان تو ایک کاہنی دھر

دیا۔ ار شیروانی ٹوہٹا شروع۔۔۔۔۔ چاچا کوٹھڑے مینھ ناچدا پھرے

تھا۔ کدے اِس کے ٹکڑے مارے ار کدے اُس کے۔

"سارے گھر میں کسے نہیں اتنی ہوش کوئی اک میری
 شیروانی ٹوہ دیں۔"
 "ساچی کہوں سوں ساری عمر اتنے نکلے لوگاں گیل واسطہ
 کوئی پڑیا تھا۔"

"ارے۔ کے میں جھوٹ کہوں سوں؟
 "چھ چھ مائیں سین اُرے۔ ار ایک شیروانی نہیں ٹوہ
 سکدے۔ جو نسی ایسے پانچ منٹ پہلاں منے تار کے دھری تھی۔"
 اتنی دیر میں چاچا کسے جگہ تے بیٹھے بیٹھے اٹھیا تو دیکھیا اک
 شیروانی پے ء بیٹھیا تھا۔ ایب زور زور تے رُگے مار کے کہن
 لاگیا۔۔۔

"رے رہن دیو۔ منے شیروانی ٹوہ لی سے۔"
 "تھم نہیں تو آنکھیاں آگے کھڑیا بند بھی کوئی دیکھیدا۔"
 آدھے گھنٹے میں آنگلی پے پاٹی بندھدی رئی۔ نیا شیشہ منگوا
 کے چوکھے میں جڑیا گیا۔ ارنیوں دو گھنٹیاں کے بعد پھوٹو ٹانگل کا کام
 پھیر شروع ہويا۔ راجھ آئے۔ پیڑی آئی۔ چوکی آئی۔ موم بتی

منگوائی۔ ایب چا چا پیڑی پے چڈھے تھا ار سارا گھر چو گردے کھڑیا
دیکھے تھا۔ ار راجھ ٹھائیں مدو دین نیں تیار تھے۔

دوماٹساں نیں پیڑی پکڑی، پھیر چا چا پیڑی پے چڈھیا۔ اوپر
پونچھیا۔ ایک جٹے نیں کرسی پے کھڑے ہو کے کوکے پکڑائے۔ ایک
کوکا پکڑ لیا۔ دوسرے نیں تھوڑا پکڑایا۔ ایبے تھوڑا سنبھالیا تھا اک
کوکا ہاتھ میں تے چھٹ کے تلے پڑیا۔

ہاٹس دے ہوئے بولیا۔ "لے لیو دھار۔۔۔۔۔ یو سائلے کا
کوکا ڈھے پڑیا۔"

"دیکھو! کڑے گیا رے۔"

ایب سارے جٹے گوڈے دھرتی میں ٹیکس کوکا ٹوہن لاگ
رے سیں۔ ار چا چا پیڑی پے کھڑیا مونھ ۽ مونھ میں بولن لاگ رہیا
سے۔

"مل گیا؟"

"رے ٹوہ لیا کے؟"

"ایب تیں تو میں سو بریاں ٹوہ لیوں ایں۔"

"ایب کے میں ساری رات اُورے کھڑیا کھڑیا سوکھ جوں

گا؟"

"ارے آندھیو! جے نہیں پانداتو دوسرا دے دیو۔"

یا بات سُن کے ساریاں کی جان مینھ جان آئی، اتنی ہاں مینھ
پہلڑا کوکا ۛ پا گیا۔ ایب کوکا چاچے تے پکڑایا تو بیرا پاٹیا اک اس ٹوہن
ٹاھن مینھ تھوڑا کھویا گیا سے۔

"یو تھوڑا کڑے گیا؟"

"ایسا کڑے دھر دیا تھا مَنے؟"

لا حول ولا قوۃ۔ اُلوکی ڈھال موئھ بانیں مَنے کیوں دیکھو سو؟
"سات جٹے اُورے گڈیں سیں ار کوئے نہیں بھتا سکدا اک

مَنے تھوڑا کڑے دھریا تھا۔"

گھٹی ۛ ہاٹ کی کتے کھاٹی کے بعد تھوڑے کا بیرا پاٹ گیا۔ ار
کوکا گاڈن کی باری آئی۔ ایب چاچانیوں بھول گیا اک پھوٹو ٹانگن کھاتر
کاندھ پے کڑے سی نشان لایا تھا۔ سارے جٹے باری باری کر سی
پے چڈھ کے دیکھن کی کوشش کرن لاگ رے سیں اک نشان کڑے
سی لایا تھا۔ ہر کسے نیں نشان نیاری نیاری جگہ پے دیکھے سے۔ چاچا

ساریاں تئیں باری باری کدے آو، کدے گدھا کہہ کہہ کے کرسی پے
تے تاردا جاوے سے۔

آخر دوبارہ تے لاکڑی کے بھٹے گیلیاں ناپ کے، کاندھ پے
پھیر نشان لایا۔ سیامھی آلا پھوٹو کون تے 35 انچ دور لاگ رہیا تھا۔
"بارہ بارہ کے انچ ہوئے رے۔؟"

بالکاں تئیں زبانی حساب کا سوال ملیا۔ انہاں نیں زبانی
سوال حل کرنا شروع کریا تو کسے کا جواب کچھ ارکسے کا کچھ۔ ہر کسے
نیں دوسرے تئیں غلط بھتایا نیوں سارے بھول گے اک اصل منھ
سوال تھا کہ۔ نیوں نئے سرے تے ناپ لیٹا پڑیا۔

ایب چاچے نیں فیصلہ کریا اک لاکڑی آئے بھٹے گیلیاں نیں
بلک نیں سوت گیلیاں ناپوں گا۔

پیڑی پے کھڑے کھڑے 45 درجے کا زاویہ بٹاندے ہوئے
کاندھ کی کوٹ منھ سوت کا سرا پکڑاندے ہوئے سوت ہاتھ تے
چھٹ جے تھا۔ اسے لیا دینی منھ جھک کے سوت پکڑدے ہووے
چاچا پیڑی پے تے تلے ڈھے پڑیا۔ کوٹ منھ بجاٹ آلا ستار دھریا تھا۔

چاچا اس کے اوپر ڈھیا تو اس کے بوجھ تے ستار کے سارے تار ٹوٹ گے۔

ایب چاچے کے مونھ تے جو نئے لفظ لکڑیں تھیں وینھ بھتاں لانک کوئی۔

چاچی کہن لاگی۔ "اپنی عمر کانیں تو ان بالکاں کا ءکھیاں کر لے"

اللہ اللہ کر کے دوسرے کو کے گاڈن کا کام شروع ہویا۔ نئی جگہ ٹوہی گئی۔ چاچے نیں کبھے ہاتھ وینھ کوکا پکڑ کے سبے ہاتھ گیلیاں تھوڑا پکڑ رکھیا تھا۔ پہلی ءچوٹ ہاتھ کے گونٹھے پے لاگی۔ چاچے نیں زور دے "سی" کر کے تھوڑا ہاتھ وینھ تے چھوڑ دیا اروا تھوڑا تلے کھڑے ہوئے کسے کے پیر کے آ کے پڑیا۔ ہائے ہائے شروع ہوگی۔

چاچی یو سب کچھ دیکھ کے، جل بھن کے کہن لاگی۔
 "جے نیوں ءکو کے گاڈن کا پروگرام ہو تو بھاگو ان، منے پہلے بھتا دیا کر۔ میں بالکاں نیں لے کے ماں باپ کے گھراں ڈگر جا کروں۔"

چاچا کچھ شرمندہ سا ہو کے بولیا:

"لوگائیاں کی ذات بھی چھوٹی سی بات کا بتنگڑ بنالے سے۔"

"آخر اس کے ہو گیا جوینھ طعنے دیں لاگ گی۔"

نیوں تو پھیر نیوں ء ٹھیک۔"

"منے توبہ کر لی۔ ایب مینھ کسے کام کے ہاتھ نہیں لایا کروں

گا۔"

کام پھیر نئے سرے تے شروع ہو یا۔ کو کے پے دوسری
چوٹ پڑی تو کاندھ کا پلستر نرم تھا۔ سارا کوکا ار آدھا تھوڑا کاندھ مینھ
دھنس گیا۔ کاندھ مینھ تھوڑا دھنسٹ کے زور تے مہارے چاچے کا
مونھ کاندھ تے ٹکرایا۔ جے ناک غیرت آئی ہوندی تو پچک ء جاندی،
پر بچ گی۔

پھیر دوبارہ لاکڑی کا پھٹے ار سوت کی رسی ٹوھی گئی ار کوکا
گاڈن کی نئی جگہ دیکھی گئی۔ نیوں لگ بھگ آدھی رات کالی کر کے
پھوٹونگ ء گیا۔

آر بیر اسے کیو کر؟۔۔۔ پھوٹو اتنا ٹیڈھا ار تلھانن نیں جھک رہیا تھا
جٹوں ایب سر پے آکے پڑے گا۔ پھوٹو کے چاروں کاھنی کاندھ پے
نیوں مورے ہو گے جٹوں فوج نیں چاند ماری کری ہو۔

چاچے کے سوا گھر کے سارے جٹے نیند آر تھکاوٹ گیلیاں
ٹولم ٹول ہو رہے تھے۔ چاچا ایب پیڑی کے آخری پینتے پے تے تلے
کو دیا تو بجاری نو کرائی کے پیر پے پیر دھریا گیا۔ اُس غریب کے پیر
پے ڈیل ہو ری تھی۔ بس اُس کی تو جان ء لکڑلی۔ ار اُس نیں زور
کی چرٹی ماری۔ چرٹی کی واج سٹ کے چاچا مڑا سا پریشان تو ہو یا۔ پھیر
ڈاڈھی پے کو ہاتھ پھیر دے ہوئے کہنٹ لا گیا۔

"بس اتنی سی بات تھی۔ لیو! لاگ گی تھاری پھوٹو۔ لوگ اس کام
کھاتر گھراں مینھ مستری بلوایا کریں سیں۔"

بھیدا

(غلام محمد و امیق کی لکھی گئی داستان کا ہریاٹوی ترجمہ)

اختر مرزا

(ہریاٹو کے ایک ٹھاہڈے سپوت کی رُو آں رُو آں کھڑیا کرن آلی کاہٹی)

جیند کی عدالت نیں اُس تے پھانسی کی سجا سٹائی تھی۔ وا
کال کو ٹھہری مینھ پڑیا اپنے پاچھلے دناں نیں یاد کرن لاگ رہیا تھا۔ ار
وینھ گجرے ہوئے پل ایک پھلم کی طریوں اُس کے شیا می تے جاٹ
لاگ رے تھے۔ اُس کی عمر ستر سال تے ٹپ لی تھی۔ گات مینھ ہلکی
ہلکی کانٹی لاگی رہیا کر دی۔

وانیوں سوچے تھا۔ ایبے کیہل کی بات سے۔ کالوے گام
مینھ اُس کا ڈنکا باجے تھا۔ کسے کی مجال کوئی تھی اک اُس کاہنی لکھا
سکے۔ اُس کی آنکھیاں مینھ لال رنگ کے ڈورے تو ایب بی دیکھیں
تھے۔ وا سوچن لگیا اک جندگی کے دن تو اُوں بی پورے ہوئے لئے
سیں۔ جے ایب پھانسی ہو بی گئی تو پھیر کے سے؟ اُس نیں اپنی جندگی

گھٹے اینڈی طریقے تے گجاری تھی۔ واسات پھٹ کا ایک سوھٹا گابرو
تھا اَر اُس جسا ٹھاہڈا اَر بے کھوپھ چھورا آسے پاسے کے گاماں مینھ
کوئے اور کوئی تھا۔ اِس کے کاناں مینھ چاندی کے باٹے تھے۔ لال
، چٹے مونھ پے بڈی بڈی مونچھ، جو اُس کے اوپر آٹے ہونٹ نیں
ڈھکے ریھیا کردی، اُس کا لڑاکا اَر شکاری ہونٹ کا پتہ دیا کردی۔

کالوا اَر آس پڑوس کے گاماں مینھ اُس کی بہادری کا ڈنکا باجے
تھا۔ کوئے مائس اُس کے گھر آگے کو گھوڑے پے بیٹھ کے کوئی
لکڑے تھا۔ (کے بیرا اُس کے احترام مینھ) واہر کسے کے درد کی دارو
تھا۔ گام کا ہر مائس اپنے اپنے جھکڑے اُس پے اے لے کے آیا کرے
تھا۔ اَر بدماں مائس اُس تے دور تے اے گیار کاٹ کے جایا کریں
تھے۔ اُس کی گال مینھ، اُس کے گھر کے شیا می آٹے گھراں کی آکھری
لین کے کوئے پے بنی ہیلی کے شیا می ایک پتھر پے اُس کا پھوٹو بنا
راکھیا تھا۔ واہیلی ایک ہندو بائینے کی تھی پر اُس کا پھوٹو سارے گام
کی اوڑتے احترام اَر موہتا کی نسانی تھی۔

اُس کا نام تو "غلام حسین" تھا پر سارے اُس نیں "بھیدا"
کہیا کریں تھے۔ آریو نام اُس کی بہادری آٹے کام کے کارن تھا۔ اُس

نیں گجرے ہوئے جمانے کا وا منخر یاد کریا۔ جب ڈانگراں کے گھیر
 مینھ تے روج ء ایک ڈانگریگب ہونٹ لاگ گیا۔ گام کے لوگ بڈے
 پریشان ہوئے اک یو کے ہو گیا؟

"کون ہے جو گھیر مینھ تے ڈانگڑھا کے لے جے سے؟"

اُن بکھتاں مینھ ڈھور ڈانگر راکھن واسطے ایک کھلے میدان مینھ
 کانڈیاں آٹے درکھت کی ڈالیاں گیل ایک گھیر بٹا دیا کردے۔ جس مینھ
 بھید، بکریاں اردوسرے ڈانگر رات نیں باڑ دیا کریں تھے۔ اس گھیر کا
 بارٹا بس نام کا ء ہو یا کردا۔ جس تیں گھاس پھوس یا پھیر لاکڑے کے
 پھٹے لا کے ڈھک دیا کریں تھے۔ جب وارداتاں نیں بدھاوا لیا تو گام
 کے سارے لوگ گلام حسین دھورے آئے۔ کہن لاگے اک اس
 مسئلے کا کوئے اُپا کا ڈھے۔ اُس نیں کیہا "چور پکڑن کھاتریں ایکلار ات
 نیں پہرہ دیوں گا۔" جاڈیاں کا موسم تھا۔ واگھراں تے ایک سوڑے
 کے ار اپنے اوپر گیر کے گھیر کے دھورے بیٹھ گیا ار سوچنٹ لا گیا اک
 میں دیکھوں گا آج یو کوٹسا چور سے؟ جو روجھ رات نیں ایک بکری لے
 جے سے۔ رات ہلٹوے ہلٹوے لنگدی رتی پر کوئے نی آیا۔ رات
 کے آکھری پہر جد و اما یوس ہو لیا تھا تو اُس نیں کھٹکا سُٹیا۔ ایک دم وا

تیار ہو گیا۔ پر اُس نیں یو دیکھ کے مایوسی ہوئی اک گھیر مینھ کوئے چور
 نیں، پر کوئے گاڈر کی طریاں کا جنور بڑے سے۔ بھیت بڑے ء اُس
 نیں ایک بکری کا گل مونھ مینھ دایا۔ گلام حسین مینھ اپنی لاٹھی چک
 کے اُس کانی جو رتے ماری۔ اُر اُس جنور نیں گلام حسین کانی ڈانک
 ماری۔ گلام حسین اُس گیلیاں لپٹ گیا تو اُس نیں بیر الا گیا اک یو جنور
 کسے سادھارن نیے گاڈر جسا کوئی۔ اس مینھ تو اتنی طاقت تھی اک گلام
 حسین مین اپنے گات کی ہاڈی ٹوڈی ہوئی دکھن لاگی۔ اُس جنور نیں اپنا
 مونھ کھولیا اُر گلام حسین کی نیر کانی جھپٹا ماریا۔ گلام حسین نیں سوڑاپٹے
 ہاتھ پے لپیٹ کے ہاتھ اُس کے مونھ مینھ دے دیا۔ اُر اُس جنور
 کے داند سوڑ مینھ پھنس گے۔ نیوں اُس کا مونھ گلام حسین کے کابو
 مینھ آگیا۔ پھیر گھٹی دیر تیں اُن کی آپس مینھ کشتی ہوندی رئی۔ گلام
 حسین جسا ٹھاٹھا مائس ہیران تھا اک یا کہ بلا سے؟ جوٹسی کابو مینھ ء
 کوئی آندی۔ اُر ناں چھوڈ کے ء بھاجدی۔ کردے کراندے سبیر
 ہوگی۔ گھیر دھورے ء میجت تھی۔ نماجی لوگ میجت کاہنی آٹ
 لاگے تو انہاں نیں یا لڑائی ہوندی دیکھی۔ مائس کٹھے ہو گے۔

گلام حسین جورتے بولیا۔ "دیکھو کے سو؟ اس کُتے کے لٹھ مارو۔" لوگاں نیں بھتیا۔ "یو کتنا کوئی۔ بھیدا سے۔" پھیر گام کے ماٹساں نیں لٹھ ٹھالنے ار بھیدے کے مارن لاگ گے۔ جب وا ادھ مریا ہولیا تو ایک اوڑنیں ڈھے پڑیا۔ نیوں او بھیدا مریا۔

اس واقعے کے بعد گلام حسین نیں سارے بھیدا کہن لاگ گے۔ بھیدانیوں تو ہر پھن مولا تھا۔ پر ڈنگ پٹاں نیں اُس پے تھوڑی سی جمین تھی جس پے وا کھیتی کریا کرے تھا۔ پر اُس کے دو کام جن تے اس نیں گھٹاؤ تھا۔ اُن یئھ تے ایک تو تھا بیڑ یئھ تے لا کڑی کاٹ کے لیاٹا ار پھیر ان لا کڑیاں تے کھاٹ کھولی ار دوسرا پھر نیچر بٹا کے بیچ دیتا۔ دوسرا کام جس گیلیاں اُسکا گھٹاؤ اسق تھا۔ وا تھا ہر طریقوں کے سانپ پکڑنا ار اُن کے جیہر ار اُن کی کھال گیلیاں کئی ڈھال کی دوائی بٹاتا۔ سانپ کے ڈسن کا علاج کرنا۔ گلام حسین کسے سانپ کے ڈسے ہوئے ماٹس کے جکھم پے مونھ دھر کے جیہر چوس لیا کردا۔ اگر بگڑ کے گاماں کے لوگ اُسے ماٹساں نیں اس کے دھورے لے آیا کردے۔ ار وا اپنی بٹی ہوئی دوائیاں گیلیاں انھاں نیں ٹھیک کر دیا کردا۔ نیوں کدے بی بیرا کوئی پاٹیا اک یو کام اس نیں کڑے تے

سیکھیا تھا۔ کیوں جے وا کوئے سپیرا تو کوئی تھا۔ اُس کے بڈیاں نیں
 بی کدے سانپاں کے ہاتھ کوئی لایا تھا۔ پر اُس نیں سانپاں مینھ گھٹی
 ۛ موہ تھی۔ جے اُس نیں بیرا پاڈا، اک کسے علاقے مینھ کوئے نئی
 نسل کا سانپ دکھیا سے۔ تو وا سانپ پکڑن پونچ جاندا۔ اُس کے
 دھورے ایک "بین" بی تھی۔ اُس کے گھراں کئی ڈھال کے سانپ
 ماٹی کی ہانڈیاں مینھ یا پھیر گھڑے مینھ ہویا کردے۔ اُس نیں بڈے
 بڈے موٹے سانپ بی پال را کھے تھے۔ سانپاں کے رہن آلی جگہ
 پے بالو ریت بچھا را کھی تھی۔ گرمیاں مینھ ریت ٹھنڈی کرن کھاتر
 پانی کا چھڑکا کرایا جاوے تھا۔ بالکاں تے سانپاں تے دور رہن کا کہہ
 را کھیا تھا۔

وا سانپاں کے جیہرا اُن کی دوسری چبجاں تے ایک کھاس
 سُر مہ بی بٹایا کرے تھا۔ جس نیں وا آپ بی اپنی آنکھیاں مینھ گھالیا
 کرے تھا۔ نیوں اُس کی آنکھیاں مینھ ایک چمک پیدا ہوگی تھی۔ اس
 سُر مے تے نخر کدے بی کجورنی ہووے تھی۔ اُس سُر مے کی تاثیر یا بی
 تھی اک کوئے گیر لگائی سُر مے آٹے کا ہنی دیکھ لیندی تو اُسے کی ہو
 جاندی۔ اس طریاں کی کھاٹیاں گھٹے ۛ ماٹس سٹایا کریں تھے۔ اُس

نیں بس تین نکاح کرے تھے۔ آرتینوں لگائیاں ایک ۛ گھر میںہ رہیا کریں تھی۔ ان میںہ تے ایک ارائیں کھاندان کی تھی۔ باد میںہ اُس تے چھوڈ دیا تھا۔

ان لگائیاں تے اس کی بوہت اُلاو ہوئی۔ جن میںہ چھوری گھٹی تھی۔ ار چھورے بس چار تھے۔ بڈا بیٹا علی سیر بالک پٹ میںہ ۛ مر لیا تھا۔ اُس تے چھوٹا نواج علی جس کا ہنارا اپٹے باپ پے تھا۔ آربا کی طریوں دلیر بی تھا۔ اُس بیٹے کا بیاہ ہو لیا تھا۔ علی نواج گام کے ایک میٹے میںہ بھاری بوجھ ٹھاٹ تے گات میںہ کسے کھرابی تے بیمار پڑیا آرٹے دناں باد اللہ نیں پیارا ہو گیا۔ اُس تے علاوہ اُس کے دو ہور چھورے بی تھی۔ ایک کا نام محمد سر پچھ آر دوسرے کا سیر محمد تھا۔

گلام حسین جد گھوڑی پے بیٹھ کے لکڑا تو گام کے مائیں اُس کا ہنی دیکھ کے ایک دوسرے کے کاناں میںہ کہندے۔ "یو بھیڈا سے۔" ایک رات وا اپٹی گھوڑی پے بیٹھیا جاوے تھا اک ایک گام میںہ کو لنگھدے ہوئے ہندوواں کے ایک گھر میںہ تے روٹ پیٹیں کی واج سٹی۔ اُس نیں گھوڑی روکی۔ پوچھیا تو بیرا پاٹیا اک ایک گابرو چھورا

سانپ لڑن تے مر گیا سے۔ ارایب اُس کا کِریا کرم کرن کی تیاری سے
 اُر اُس نیں جلاں کھاتر چھلیاں مینھ لے کے جاویں سیں۔ وا اُن تئیں
 بولیا۔ "جے تھامیں کہو تو میں اِس نیں جندہ کرن کی کوسس کروں۔"
 اُس چھورے کے دھٹی بولے اک مرڻ کے باد کوں جندہ ہووے
 سے؟ پھیر بی توں جو کرٹا چاھوے سے، کر لے۔ ایب اس تے جیادہ
 تو کوئے نقصان ہون تے رہیا۔

بھیڈے نیں اپنی گوجی مینھ تے ایک سیسی کاھڈی۔ اُر اُس مینھ تے
 دو تین ٹپکے مرڻ آلے کے مونھ مینھ گیرے۔ اُر سانپ کا جیہر بی
 چوسیا۔ تھوڑی ہاں مینھ مرے ہوئے گات مینھ ہرکت پیدا ہوئی۔ ار
 اُس چھورے نیں آنکھ کھول دی۔ بس پھیر کے تھا!

موت آلے گھر مینھ ڈھول باجن لاگ گے۔ وانیوں کہوے
 تھا اک سانپ لڑن کے باد ماٹس چوبیس گھنٹے جندہ ہووے سے ار اُس
 تئیں بچایا جاسکے سے۔ اُس بات کا ملال رہیا اک اتنی آچھی حکمت
 ار انمول نگھسا "بھیڈے" کی اگلی نسل مینھ کوئی آیا۔

جیل کی کال کوٹھڑی مینھ اپنی موت کی باٹ دیکھدے ہوئے
 اپنئے بارے مینھ سوچے تھا۔ اس کا باپ غوث بخش دھٹاٹہ گام مینھ

رہوے تھا، جڑے اس کی خوب کمیری زمین اس کے چار بھائیاں
 نیں قبضہ کر کے اس تے کاڈھ دیا تھا۔ نیوں اس کا باپ حالات تے
 مجبور ہو کے اپنا گام دھٹانہ چھوڈ کے اپنی سسراڑ کے گام "کالوا" مينھ آ
 کے بس گیا ار اسے گام مينھ اس کا جنم ہویا۔

وا سوچے تھا آم مہارے سکے بھائی بھی دنیا کو موہ مينھ "برادران
 يوسف" کیوں بٹ جیں سیں۔ ار اس دنیا کے لالچ مينھ اپٹے سکے ار
 خونی رشتے بھول جیں سیں۔ انیہں خیالاں مينھ اس نیں اپنا ایک ہندو
 ڈھبی یاد آیا۔ اس کا نام ہری چند تھا۔ جس نیں اُس کے کہن پے اپنا
 دھرم چھوڈ کے اسلام قبول کر لیا تھا۔ یو بھی ایک گھٹاء عجیب واقعہ
 تھا۔ ہری چند کئی بریاں گلام حسین تے پھیٹن اس کے گھراں آیا
 کرے تھا۔ وینھ کٹھے بیٹھ کے بات کر دے، روٹی کھاندے۔ ایک دن
 ہری چند نیں گلام حسین تیں اپنے گھراں آن کی دعوت دینی۔ جو اس
 نیں قبول کر لی۔ پر جب گلام حسین ہری چند کے گھراں گیا تو اس نیں
 دیکھیا، اس کے گھراں سور بندھ رے تھے۔ ان تیں دیکھ کے اُسکا
 جی خراب ہو گیا۔ اُس نیں ہری چند تے کہیا اک میں اس وقت تک

تیرے گھراں نیں آسکدا جب تک تیرے گھراں سور بندھ رے
سیں۔ نیوں گلام حسین واپس ہو لیا۔

وقت نیوں ء پُدارنیا۔ ایک دن ہری چند اس تے پھینٹن آیا
ار بولیا اک بھائی غلام حسین، منھ تیرے دھرم نیں سچا مانوں سوں۔
توں مئے مسلمان بٹالے۔ یا بات سن کے غلام حسین کی خوشی کا
کوئے ٹھکانہ نہ رپیا۔ اُس نیں ہری چند تے مشورہ دیا اک اسلام کی
اچھی تعلیم واسطے دلی چلیا جاوے۔ اس تیں دلی کے مدرسے کا نام
بھی بھتا دیا۔ ہری چند دلی بگ گیا۔ اُس کے مسلمان ہون پے اُس
کے گھر آلیاں کی کے سوچ تھی، اس کا گلام حسین نیں کوئے بیر اکونی
تھا۔ مسلمان ہون کے بعد ہری چند کا نام "عبدالقادر" رکھیا گیا۔ کچھ
سال کے بعد عبدالقادر عالم بٹ کے واپس ایٹے گام منھ آیا۔ تو غلام
حسین نیں اس کا سواگت کریا۔ ار ایٹے گھراں دعوت پے بلایا۔ وا آیا
تو اس نیں غلام حسین تے کیہیا اک بھائی دیکھ میں تیرے کہن پے
مسلمان ہو گیا، ایب توں بھی میری ایک بات مان لے۔ اک توں
کاناں منھ پھیرے ہوئے بالے جو ہندو دھرم کی علامت ہیں۔ منھ
کاڈھ دے۔ ار تیری مونچھ جو گھٹی ء لامبی سیں۔ منھ بھی کٹوا دے۔

کیوں جے روٹی کھانڈیاں ہاں جو چیز بھی مونچھاں گیلیاں لاگ کے
 مونھ مینھ جاوے سے، واہرام ہو جے سے۔ یا بات سن کے گلام
 حسین ہائیاں ار اسے ٹیم بالے تار کے رکھ دینے ار مونچھ بھی کٹوالی۔
 اس بات کا دھیان آندے ے بھیڈے کے مونھ پے اطمینان ار
 ہونٹھاں پے ہانسی آگی۔

دھیان کسے اور پاسے لاگیا تو اس کے شیا می ایک ہو ر منظر
 آیا جب وا اپنی گھوڑی پے بیٹھ کے کڑیاں تے واپس گھراں آن لاگ
 رہیا تھا۔ رستے مینھ ایک قبرستان مینھ کو لنگھیا تو یو دیکھ کے بڈا حیران
 ہویا اک ایک لوگانی جمائے اگھاڑی، جونڈے بکھیرے کھڑی ہوئی
 ایک بالٹی مینھ تے پانی لے کے نہاں لاگ ری تھی۔ او کھڑیا ہوگیا،
 گھوڑی پے تے اتریا ار اس لوگانی دھورے گیا۔ او، ناں تو ڈریا ہویا
 تھا ار ناں ے اس نیں وا لوگانی کوئے چڑیل لاگی۔ وا لوگانی اس تے
 دیکھ کے ڈراں واسطے جو رکی چنگھاڑی۔ ار بولی۔ "بھاج لے ار اپنی
 جان بچا لے۔ میں چڑیل سوں ار تیرا خون پی جوں گی۔" پر بھیڈے
 نیں تو ڈرنا کوئی سیکھیا تھا۔ اس نیں آگے ہو کے اسکا ہاتھ پکڑ لیا۔
 اپنا کھنڈکا تار کے اس کا ہنی بگایا اک اپنا گات ڈھک لے۔ لوگانی نیں

نیوں ۛ کریا۔ پھیر بھیدے نیں سخت آواز ینھ پوچھیا۔ "کوٹ ہے
توں؟ بھتا!۔ نیں تو میں تے اورے ۛ ماریوں گا۔ والوگانی ایب
گھٹی ۛ ڈرگی۔ واروٹ لاگ گی ار بھتیا اک واپھلاٹے گام کی رہن آلی
سے۔ ار پھلاٹے بندے کی لوگانی سوں۔ بیاہ نیں کئی سال ہو لے پر
ایب لگ اولاد کوئی ہوئی۔ مھارے پیر ساب نیں بھتیا تھا اک
پھلانے وقت، رات کے ٹیم قبرستان ینھ کسے پرانی قبر پے جا کے نہا
لے تو اولاد ہو جے گی۔ یا بات سٹ کے بھیدے نیں اس تے سمجھایا
اک جٹاں نیوں ناں کرے۔ تیرے تے دھوکا دیا گیا سے۔ اولاد دین
آلی ذات تو رب تعالیٰ کی ہے۔ اسے تے ہر چیز مانگٹی چاہیے۔ وائے
دعا قبول کرن آلا سے۔ پھیر اسی غلطی ناں کرے۔ ایب چال، میں
تے تیرے گھراں چھوڈ دیوں۔۔" لوگانی نیں متاں کرنی شروع کر
دی۔ کہن لاگی۔ "توں یہ سب کچھ میرے گھر آلیاں تے ناں
بھتائیے۔ نیں تو وائے طلاق دے دیوے گا۔ یا پھیر مار دے گا۔ اُس
نیں وعدہ کر لیا۔ ار لوگانی تے گھوڑی پے بٹھا کے اُس کے گھراں تار
دیا۔ والوگانی جس طریوں گھرتے لکڑی تھی اُسے طریوں واپس گھر
میں بڑگی۔ ار پڑدے کی بات پڑدے ینھ ۛ رہ گی۔

جیل مینھ بھیڈے کی زندگی کے گزرے ہوئے واقعات
 کاغذاں کی طریوں پلٹدے جاٹ لاگ رے تھے۔ موت بھی نیڑے ء
 دکھے تھی۔ ایک اور بات سوچ کے اس کا من دُکھی ہویا اک ایسے
 کچھ دن پھلوں اسکا چیللا، منوہر لعل جو جاٹ تھا، اس کے دھورے
 آیا۔ بولیا۔ "استاد جی، کچھ دناں خاطر اپنی بندوق مئے دے دیو۔ مئے
 اپنے ڈھبیاں گیلیاں شکار پے جاٹا سے۔ بھیڈے نیں اس بات پے
 مڑا خیال کر کے سوچیا۔ پر منوہر نیں استاد کی اسی تسلی کروائی اک
 بندوق کسے غلط کام مینھ کوئی استعمال ہووے۔ ارنیوں وانبندوق لے
 گیا۔ بھیڈے نیں اپنی بندوق پے کچھ اسے نشان بٹا رکھے تھے اک
 وینھ اسکی شناخت بٹ گے تھے۔ منوہر کئی دن تئیں واپس کوئی
 بوڑھیا۔ پھیر نیوں بیر اپاٹیا اک منوہر کڑیاں لھک گیا سے۔ بیر اپاٹیا اک
 منوہر نیں اپنے ڈھبیاں گیلیاں رل کے ایک گام کے ہندو سیٹھ کے گھر
 پے دھاوا بولیا ار گھر لوٹ کے آگ لادی۔ کچھ گھر کے لوگ قتل
 بھی کر دیئے۔ اس واردات مینھ بھیڈے کی بندوق پولس کے ہاتھ
 لاگ گی۔ پولس نیں چھاپے مارٹے شروع کر دیئے۔ ار بھیڈا بھی لھک
 گیا۔ واپنے پرائے گام "دھٹاٹھ" مینھ جا کے لھک گیا۔ واکئی مھینیاں

تئیں اوڑے لکھیا رہیا پر اس سارے راسے مینھ اس کے بالک
بھو کے مرٹ لاگ کے۔ اوپر تے روز پولس آ کے اونھاں نیں تنگ
کرٹ لاگ گی۔

آخر بھیڈے نیں اپنے آپ تے جیند پولس کے حوالے کر دیا۔
بھیڈے کے بیان دیٹ کے بعد منوہر ار اسکے ڈھبی بھی پکڑے گئے۔
پر بھیڈے کی بندوق اس کے کھلاپھ سب تے بڈاثوت تھی۔ عدالت
مینھ مقدمہ چالیا۔ منوہر ار اسکے ساتھیاں کے کھلاپھ کوئے پکا ثوت
کونی تھا۔ وینھ یا بات مانٹ پے تیار کونی تھے اک وینھ یا بندوق شکار
واسطے لے کے گئے تھے۔ انھاں نیں بھتیا اک یا ساری کاروائی
بھیڈے نیں ء کری سے۔ حج نیں بھیڈے تئیں موت کی سزا سنائی ار
باقی لوگاں تے بھی کچھ سالان کی سزا ہوئی۔

بھیڈے کی ایک چھوری "شریفن" گھٹی ء سیاٹی تھی۔ اس
کی عمر چودہ، پندرہ سال تھی۔ واسرکاری وکیل تے ملی۔ وکیل "کالوا"
کا رہن آتا تھا۔ اس تے ساری کھاٹی سنائی۔ وکیل بھی بھیڈے نیں
آچھی طریقوں جانے تھا۔ شریفن نیں اپنے باپ کی سزا ختم کراٹ واسطے
وکیل تئیں ترے کرے۔ وکیل نیں اس کی مدد کرٹ کی ہاں کرلی۔

وکیل نہیں بھتیا اک جج ساب گھٹا ۛ رهم دل ار ایماندار ماٹس سے۔
 میں تے جج ساب کے گھر کے باهر لے چالوں سوں۔ جب وا
 سُبیرے عدالت جان واسطے گھرتے لکڑے تو اس کے آگے کھڑی ہو
 جئے ار ہاتھ جوڑ کے اپٹے باپ واسطے انصاف مانگئے۔ واضرورتیری مدد
 کرے گا۔

شریفن نیں نیوں ۛ کریا۔ واجج کے پیراں مینھ ڈھے پڑی۔ ار
 بھتیا اک میرا باپ جمنے بے قصور سے۔ وا ایب بوڈھا ہو لیا ار
 کدے بی رات نیں باهر کوئی لکڑا۔ ناں ۛ اس مینھ اتنا ہانگا سے اک
 واڈاکہ مار سکے۔ یو کام تو میرے باپ کے شاگرد منوہر نیں کریا سے۔
 جو اس کی بندوق شکار کا بھتا کے لے گیا تھا۔ جج نیں اس پے گھٹا ۛ
 ترس آیا ار کان لا کے اسکی بات سٹی۔ مدد کا وعدہ کریا ار وکیل تیں
 کیہیا اک کیس کی دوبارہ سٹوائی واسطے اپیل کرے۔ نیوں بھیڈے
 کے کیس کی دوبارہ سٹوائی شروع ہوگی۔

کیس کی سٹوائی مینھ کچھ اور ثبوت بھی شیا می آئے ار کیس
 کمزور ہو گیا۔ آخری سماعت آئے دن جج ساب نیں بھیڈے تے اسکی
 بندوق دے کے کیہیا۔

"غلام حسین، یارئی تیری بندوق، ایب توں نشانہ لے کے دکھا، دیکھاں توں کسا نشانہ لاوے سے۔"

بھیڈے نیں کامبدے ہاتاں گیل بندوق ٹھانی ار نشانہ لیٹ لاگیا۔ پھیرجج ساب نیں والے بندوق منوہر تے پکڑائی ار کیہا۔
 "ایب توں نشانہ لے کے دکھا۔" منوہر نیں بندوق پکڑی ار نشانہ لے کے دکھایا۔ پھیرججج نیں کیہا۔ تھم ساریاں نیں دیکھیا اک ایب غلام حسین کے ہاتھاں منہ اتنی طاقت کوئی اک واسیدہا نشانہ لے سکے۔
 اس کے تو ہاتھ کاہٹ لاگ رے سیں۔ تو اس حالت منہ یو کس طریاں ڈاکہ لا سکے سے ار کسے نیں قتل کر سکے سے۔ پھیر تھم نیں منوہر تیں بھی دیکھیا کہ اس نیں کتنی ستھری ڈھال بندوق پکڑی ار سیدہا نشانہ لایا۔ یا بات پکی ہوگی اک قتل ار ڈکیٹی غلام حسین نیں نیں بلک نیں منوہر نیں کری سے۔ تو غلام حسین نیں میں بری کروں سوں ار اصل مجرم منوہر تے موت کی سزادیوں سوں۔ ار اس کے ساتھیاں نیں عمر قید۔"

غلام حسین گھراں واپس آگیا ار اس کے بعد دس گیارہ سال زندہ رہیا۔ اس نیں اپنی بیٹی شریفن کا بیاہ کردیا۔ ار شریفن شادی کے

بعد اپنے خصم گیلیاں شملہ چلی گئی۔ جڑے اسکا خصم ریلوے مینھ کام کرے تھا۔ پاکستان آن کے بعد اسکا خصم مر گیا۔ اس کا دوسرا بیاہ ٹنڈو آدم مینھ فتح محمد گیلیاں ہويا۔ بھيڈے کا بڈا بیٹا، نواز علی (جوٹسا وزن ٹھاٹ کے مقابلے مینھ مر لیا تھا) کی بدھوا کا نکاح اپنے دوسرے بیٹے محمد شریف گیلیاں کر دیا۔

بھيڈا اسی سال کی عمر میں مر یا۔ اس کے مرٹ کے دو تین سال پاچھے پاکستان بنیا۔ سارا خاندان اٹاری ہوندا ہويا والٹن کیمپ پوھنچیا۔ ہجرت کے ٹیم بڈے بیٹے شریف کی عمر اکیس، بائیس سال تھی ارچھوٹا بیٹا تیرہ، چودہ سال کا تھا۔ شیر محمد دنیا داری تے دور ایک درویش مانس تھا۔ والٹن کیمپ تے یو خاندان محراب پور (سندھ) آیا۔ - ارایب تائیں اسے شھر مینھ ۶ رھوے سے۔

ہر فن مولا

اختر مرزا

میں جد بھی کسے متین نام کے کسے ماٹس نہیں ملو سوں یا
پھیر اس کا ذکر سنوں سوں تو مئے اپنا متین یاد آجے سے۔ جے متین
صاحب نہیں ہر فن مولا کہیا جاوے تو یا بات غلط کوئی ہووے بلکہ یو
نام اس کی شخصیت گیلیاں بلکل ٹھیک لاگے گا۔

بھائیو۔۔۔۔۔ جے تھامے کسے بھی مسئلے کا ذکر متین آگے
کرو گے تو ایک منٹ تے پہلاں اسکا حل تھارے شیا می پاوے گا۔
پر ایک بات دیکھی۔ جے تھام نہیں کسے کے کام کی تعریف متین آگے
کردی تو متین بھی اس میدان کا کھلاڑی بن کے تھارے شیا می آجے
گا ار گیلیاں مثال بھی لے کے آوے گا۔

اس تے پہلوں کہ میں متین کے کارنامے تھارے تیں سنا
ؤں۔ پہلاں میں اس بندے کے خاندان، گام ار اس کے حلیے کے

بارے میں بھتا دیوں۔ کیوں جے جد تھامے اس کے کارنامے سٹو تو
تھارے شیا می اس کی پھوٹو بھی آجے۔

جد میں پہلی بریاں متین گیلیاں ملیا تو اس کی عمر 65 سال کی
ہو وے گی۔ قد درمیانہ سا تھا۔ رنگ سانولا، ناک لامبی ار مڑی ہوئی۔
سر پہ بال ناں ہونٹ کے برابر تھے۔ بس کاناں کے اوپر دونوں پاسے
ایک جھالر سی لٹکے تھی ار اس نیں بھی تیل لا کے بٹھان کی کوشش
کریا کرے تھا۔ کرتا پجامہ پہریں دیکھیا۔ جب بھی دیکھیا۔ پجامہ کھلے
پینچیاں آلا ہو وے تھا۔ متین کی آنکھ چھوٹی چھوٹی تھی۔ متین
ہندوستان کی ریاست بھوپال کا رہن آلا تھا۔ ار اپنا تعلق ریاست
بھوپال کے نواب حمید اللہ گیل جوڑیا کرے تھا۔ ار اس بات پہ گھنا
ء ماٹ کریا کرے تھا۔

ایک بات جو منے متین کی سب تے گھٹی آچھی لاگی۔ اسکی
خودداری تھی۔ وا کلا ے رہوے تھا ار اس عمر میں بھی کسے پے اپنا
کام نہیں کروایا کرے تھا۔ اس کا گذار اپراٹے ڈھیاں کے آسرے
پے تھا۔ ار اس کے ڈھبی بھی آدر ماٹ گیل اس کی مدد کریں تھیں۔

ایک امیرِ مَترِیں رہن کا ٹھکانہ دے راکھیا تھا ارکھاں پین کا بھی انتظام کر دیا تھا۔

اس تے پہلاں متین بلدیہ کمیٹی یمنہ چونگیاں کے محکمے یمنہ نوکری کرے تھا۔ اصل یمنہ میرا ملٹا بھی میرے استادِ اسلم ار چونگیاں کے بڈے افسر سلطان محمود ڈاھر کے دفتر یمنہ ہویا تھا۔ اس ملاقات تے پہلاں منے متین کے کئی قصے سن راکھے تھے۔ ار میرا بڈا جی کریا کرے تھا کہ میں بھی متین گیلے ملوں۔

آخر ایک دن یو کام ہو گیا۔ میں اپنے استاد کے گھراں ملن گیا تو بیرا پاٹیا۔ اک متین بھی تھوڑی دیر یمنہ ان کے گھراں آوے گا۔ پر اس کے آن تے پہلاں استاد نیں کچھ باتاں پے عمل کرن کا کہیا۔

1- متین کی بات سُنڈے ہوئے جہاں چُپ کر کے بیٹھٹا

سے۔

2- اس کی بات سُنڈے ہوئے ہانسٹ پے پابندی سے ،

کیوں جے اس نیں بیرا پاٹ گیا اک ہم اس کی باتاں نیں بس سواد

لین کھتر سٹا ساں۔ تو وا بھائی ساب کوئے بات کوئی سٹا وے اریرا
نی کد لگ روسیا رہوے۔

متین پے کچھ سنٹ کھتر کچھ ماحول ار موڈ بٹاٹا پڑیا کرے
تھا۔ ایک دن ہم نیں لکھنؤ کے لوگاں کے نازک ہوٹ کا ذکر چھیڑ
دیا۔ کہن لاگیا۔

"میرا بیرا! تھم نیں پھیر نواب حمید اللہ خان ساب کے
بارے مینھ کوئی سٹیا ہوگا۔ ایک دن نواب ساب ہاتی پے بیٹھ کے
سیر کرن لکڑے۔ نواب ساب کی طبیعت اتنی نازک تھی اک تھم
نیں کے بھتاؤں۔ بزار مینھ کو جان دے ہوئے ہاتی کے پیر تلے موٹی کا
پتہ آگیا۔ بس اُسے ٹیم نواب ساب کے زکام ہو گیا۔"

بس بھائیو! یا تو وائے بات ہوگی

کیلا کھانے سے میرے دانت ہلے جاتے ہیں

فرش مخمل پے میرے پاؤں چھلے جاتے ہیں

ایک بریاں ہم نیں باتاں باتاں مینھ ہوٹ آلی بسنت کا نام

لے کے کہہ دیا اک لاہور کے لوگ بڈی دھوم دھام تے بسنت منایا

کریں سیں۔ کئی لوگ پتنگ اڈاں کھاتر تانبے کی تار استعمال کریں
سیں۔ آر کچھ لوگ تو پتنگ گیلیاں ڈھیم بھی باندھ کے اڈادیں سیں۔
(یو سٹوپھیر)

کہن لاگے۔ "ہونہہ! وزن باندھ کے!"
بھوپال ینھ ہم اڈایا کراں تھے پتنگ"
"ساراسارادن ار ساری ساری رات پتنگ اڈیا کرے تھی۔
اور تو اور، ینھ ینھ بھی پتنگ اڈدی رہیا کرے تھی۔"
ہم نین پوچھیا۔ "بھائی ینہہ ینھ کیو کر اڈے تھی۔"
کہن لاگیا۔ "رے میرے یار۔ یو بھی کوئے مشکل کام ہے؟
جے پتنگ پے تیل لادیو، تو ینہہ کا کوئے اثر کوئی ہوندا۔"
"سانجھ نین پتنگ کی ڈور کیل گیلیاں باندھ دیا کراں تھے۔"
"آر سبیرے سبیرے پھیر تار لیا کراں تھے۔"
"میرے بھائی۔ ہم نین تو پتنگ پے دس سال کا چھورا بھی
بٹھا کے اڈا دیا تھا۔"

یا بات سن کے میں تو ڈھینڈے ڈھینڈے بچیا تھا۔ اربڈی
 مشکل تے ہانسی روکی۔ پھیر بھی کچھ بے یقینی تے پوچھیا۔
 "متین ساب! دس سال کا چھوڑا پتنگ پے؟"
 کہن لاگیا: "ہاں بھائی۔ کیوں نہیں ہو سکا؟ گانٹھ آٹا بانس لیا
 دو منے۔"

ایسے بٹا کے دکھا دیوں گا۔"
 (ایب مہارے جسے ماہترانیں کے میرا، گانٹھ آٹا بانس
 کڑے تے ملے گا اریو کوٹسا مانگے سے)
 یا تو وائے بات ہوئی۔

نہ نو من تیل ہوگا، نہ رادھانا چے گی
 کوئے بھی اِسا کھاتا کوئی تھا جس کے بارے میں متین ناں
 جاڈا ہو۔ ار اس کام کا تجربہ اس نین ناں کر رکھیا ہو۔ اس کے
 دھورے تو بھائیو۔ اس کے دھورے تو ہر بات کا جواب ہووے تھا
 وا بھی ثبوت گیلیاں۔ منے پھلے ء تھارے تیں بھتا دیا تھا اک متین

شہر کی چونگیاں کے محکمے میںھ نوکری کریا کردا۔ ار اوڑے کے ماٹساں
 نین بھی اس کی عاداتاں کے بارے میںھ بیرا تھا۔ ایک برانہاں نین
 متین تے ایک نصیحت کرن کی کوشش کری۔ جس میںھ و امردا مردا
 بجیا۔ پر آفرین ہے اس پے اک اُس نین اپنی عزت پے کوئے
 حرف نین آن دیا۔

ہویا کچھ نیوں۔ دسمبر کا میھنا تھا ار جاڈا بھی کڑا کے کا پڑے
 تھا۔ ایک جٹے نین اس تیں کہیا۔

"یار متین! یو جوٹسا چاچا اقبال سے نی۔"

"یو سردیاں میںھ بھی ورزش کر کے ٹھنڈے پاٹی گیلیاں
 نہاوے سے۔"

بیرانی اس کا کے دماغ خراب ہو ریا سے۔

(چاچے اقبال کی عمر بھی لگ بھگ 50 سال تھی) پر اس کا
 ورزش کرن ار ٹھنڈے پاٹی گیلیاں نہاٹ کا دور دور تیں کوئے واسطہ
 کوئی تھا۔

بس بات سننے کی دیر تھی۔ متین بولیا: "ہاں بھائی، سیرے
سیرے ٹھنڈے پانی تے نہاؤں تے گات منہ کاہلی کوئی آندی۔"
"میں بھی روز سیرے نیں ورزش کر کے ٹھنڈے پانی
گیلیاں اٹھایا کروں سوں۔"

"اریں تو روز آئے 100 ڈنڈ بھی پیلیاں کروں سوں۔"

اسے بات پے شرط لاگ کی چاچے اقبال گیلیاں۔

دن ارونقت بھی بندھ گیا۔ دو دن بعد متین ہاتھ منہ تیل کی
شیشی ارنکندھے پے جانگہ دھر کے پونچ گیا۔ چاچے اقبال نیں کڑے
آٹا تھا۔ ایب متین نیں پہلاں تو کپڑے تار کے جانگہ پھریا۔ گات
پے سرم کا تیل لایا۔ مالش کری۔ چونگی پے بیٹھے سارے لوگ واہ
واہ کریں تھے۔ اقبال کے ناں آئے پے اُس تینیں ڈرپوک اریرانیں
کے کے کہوین تھے۔ کہ اقبال تو ڈر گیا۔ بھاج گیا ارنکھو متین موجود
ہے۔ متین نیں کچھ اُلٹی سیدھی ورزش کری ارنپھر تلکے تلے بیٹھے کے

نھاٹ لاگ گیا۔ نتیجہ پھیرنیوں لکڑیا اک متین کے نمونیا ہو گیا ارچہ
پندرہ دن تیں کھاٹ مینھ پڑیا رہیا۔

کدے کدے تو متین اتنے گرنگ پیل دے تھا اک ہم نین
ہضم کرنا مشکل ہو گیا کرے تھا۔ ار مھاری برداشت کی حد ہو گیا
کرے تھی۔

سردیاں کے دن تھے۔ ار سارے جٹے بیٹھے مالٹے کھاویں
تھے۔ مئے کہیا۔ "یار متین! سٹیا سے اک ہندوستان مینھ کنوں،
مالٹے کوئی ہوندے۔ اوڑے تو نارنگی ہوویں سیں۔"

متین بولیا:

"ارے مریار! کے یاد کروا دیتے۔"

"بس کے بھتاؤں؟"

"کے دن تھے وینھ بھی۔"

"جوانی پاٹی پڑے تھی۔ ایک بر مالٹے کھاٹن میں جی کر گیا۔
شام ہونٹ آلی تھی۔ سوچیا اک اپنے یار نواب صاب کے باگ میں
تے تازے مالٹے توڑ کے کھائے جاویں تو سواد سا آجے گا۔"

"بس پھیر کے تھا۔"

میں پوچھ گیا نواب کے باگ میں۔"

"ار لاگ گیا توڑن مالٹے۔۔۔"

"ایک دم نیوں ہوا اک بادل آگے ار مینہ برسٹ لاگ گیا۔

نیونے تے بالھ بھی جوراں کی چالٹن لاگ گی۔"

"بڈی مشکل تے مالٹے کٹھے کر کے چادر مینہ باندھے۔ ار سر

پے دھر کے چال پڑیا۔ رستے مینہ کتے بھی ملے۔ تولا تولا باگ کے

گیٹ پے پوچھیا تو دیکھیا گیٹ بند۔ بس پھیر کاندھ پے کو کو داری۔

(ایب نیوں اندازہ لاؤ اک نواب اسکا ڈھبی تھا)۔

سر پے مالٹیاں کی گٹھڑی۔ کتے بھی پاچھے لاگ رے تھے۔

ان تے بھی لڑوا آیا۔ گھراں پوچھیا تو اندھیرا ہو لیا تھا۔"

"بابو گھٹا ۛ گتے مینھ تھا۔ پیشی پڑگی۔"

بابو بولیا: "کیوں رے موتی کے بچے! کڑے گیا تھا۔"

میں بولیا: "بس نیوں ۛ مالٹے کھاٹ نیں جی کرے تھا۔ نواب

صاب کے باگ تئیں گیا تھا۔"

بابو ایسے بھی گتے مینھ تھا، بولیا:

"کچھ لے بھی آیا اک نیوں ۛ جھک مار کے آگیا۔"

میں بولیا: "لیا یا سوں بابو۔"

پوچھیا: "کتنے سین؟"

میں بولیا: "وینھ پڑے سین بھیتلے کوٹھے مینھ۔ آپے دیکھ

لیو۔"

ارجب مالٹے تولے گتے تو پورے سوٹھ مل لکڑے۔

منے گھٹی ۛ کوشش کرمی اک کوئے تو کام اسا ہو جس مینھ

متین نیں ہارٹا پڑے۔ پریارو! وامتین ۛ کے جوہار مان لے۔ آخر

سوچ سوچ کے ایک اساکام ٹوھیا۔ جس مینھ مئے لاگے تھا اک میتین
ہار جے گا۔

مئے کہیا: "یار متین! آج کل ڈاکے ارچوریاں بوھت ہوٹ
لاگ گی سیں۔ پر پولس آٹے بھی گھٹے آتیز ہو گے سیں۔ ار نئے نئے
طریقیاں گیلیاں چوراں نیں پکڑ لیویں سیں۔ چوری بھی براد کر اوں
سیں ار چور نیں جیل بھی ہو جے سے۔"

کہن لاگیا: "ارے بھائی! بڈی چوریاں کر راکھی سیں۔ پر
کوئے سسر اپولس آٹا نئیں پکڑ سکیا متین نیں۔"
"پاکستان بٹن تے پہلاں کی بات سے۔"

(یاد راکھیو، متین پاکستان بٹن تے پہلاں ریاست بھوپال
مینھ رہیا کردا)

"مینھ منجن آباد ار ڈونگہ بونگہ کے گاماں مینھ چوری کر کے
واپس آجیا کردا۔"

پولس ٹوھندی ۽ رہ جاندى۔"

پولس کے افسر میرے تے اتنے تنگ آ گے اک جب کسے
چوری کا کوئے تھا ٹھکانہ نہیں ملدا تو فائل پے نیوں لکھ کے فائل بند کر
دیویں تھے۔۔

"یو موتی ڈاکو کا کام سے۔"

تو میرے بھائیو۔ ایب ہو رکوئے گنجائش کوئی بچی تھی اک
میں کچھ اور بھی پوچھڈا۔ آج تے کوئے دس سال پہلاں متین
مہارے شہر تے صادق آباد بگ گیا تھا۔ ار اس کے بعد منے اُس کے
بارے میںھ کوئے بیر اکوئی۔

جے متین جیوے ہے تو رب تعالیٰ اس کی عمر لامبی کرے ار جے مر
لیا ہو تو رب تعالیٰ اس تیں جنت الفردینھ جگہ دیوے۔ (آمین)

مرن آٹے کی یاد میں

(پطرس بخاری کے مضمون "مرحوم کی یاد میں" کا ہریاٹوی ترجمہ)

اختر مرزا

ایک دن میں آرمجاساب میرے گھر کے برینڈے میں دھورے
 دھورے کرسیاں پے چپ چیتے بیٹھے تھے۔ نیوں کہیا کریں میں اک
 جب دوستی گھٹی پرائی ہو جے تو پھر آپس میں بولن بالن کی بی کوئے
 جرورت کوئی رھندی۔ ڈھبی آپس کی چپ تے بی سواد لے لیویں
 میں۔ یائے حالت میری بی تھی۔ ہم دونوں اپ اپنی سوچاں میں
 دُوبے پڑے تھے۔ مرجاساب کی تو میں کہہ نہیں سکدا اک کے سوچے
 تھا، پر میں جمانے کی گدم گھاٹی پے سوچن لاگ رھیا تھا۔ دور پراں
 سڑک پے مڑی هاٹ کے بعد کوئے کارلنگ جے تھی۔ میں کچھ اس
 طریاں کا ہوں اک جب بی میں کسے کارنیں دیکھوں سوں۔ منے اس
 دنیا کی گدم گھاٹی کا کھیال ڈنگ مارن لاگ جے سے۔ آرمیں کوئے اسی
 ترکیب سوچن لاگ جیوں سوں اک جے وا ترکیب میرے دھورے

ء گیانی سے۔ کہہ دے گا، جنور جگالی کریں سیں۔ توں جگالی کونی کردا۔ اُن کے پوہنجڑ ہو سے۔ تیری کونی۔ پر ان باتاں تے کمیں کونی ہوندا۔ ان تے تو نیوں لاگے سے اک وینھ میرے تے گھٹے آچھے سیں۔ پر ایک بات یینھ، میں آروہنھ جتاں برابر ساں۔ وینھ بی پیدل چالیں سیں۔ میں بی پیدل چالوں سوں۔ اس بات کا تیرے دھورے کوئے اُترے؟ کونی ناں؟ کمیں سے تو بھتا! بس پھیر چُپ کر جا۔ جب تے میں جامیا سوں، پیدل باٹ کردا آیا سوں۔ کہہ سے! تے پیدل کا مطلب کونی بیرا۔۔۔۔۔! پیدل چالٹ کا مطلب ہو سے اک اس دھرتی کی چھاتی پے نیوں ہرکت کرٹا اک دونوں پیراں یینھ تے ایک ناں ایک جرور دھرتی پے رہوے گا۔ ساری عمر میرا چالٹ کا طریقہ نیوں ء رہیا سے۔ ایک پیر دھرتی پے دھروں سوں تو دوسرا ٹھا لیوں سوں۔ دوسرا دھروں سوں تو پہلا ٹھا لیوں سوں۔ ایک آگے، ایک پاچھے۔ ایک پاچھے، ایک آگے۔ سوں اللہ پاک کی! اس طریاں کی جنگی تے دماغ سوچٹ کے قابل نہیں رھندا۔ سوچٹ کی طاقت مر جے سے۔ مائس گدھے برابر ہو جے سے۔"

میری اس ساری رام کتھا سُنڈے ہوئے مرجا ساب نیوں
 بے پروائی گیلیاں سرگٹ پیندا رہیا اک ڈھیاں کی اس بات پے
 روٹ جے جی کر جے سے۔ مئے گھٹی ۽ گھٹ آئی آر مونھ اس کے کاہنی
 تے پھیر لیا۔ نیوں لاگے تھا اک مرجا ساب نیں میری باتاں پے یقین
 ۽ کوئی آیا تھا۔ جٹوں میں اپنی تکلپھ بھتاؤں تھا وینھ ساری بس میری
 ۽ سوچ تھی۔ یعنی مئے جو پیدل چالٹ کی شکایت کری اُس کا کوئے
 مطلب کوئی تھا۔ آرینھ کسے بی سواری پے چڈھن کا حق دار کوئی تھا۔
 مئے اپنے من ینھ کیہیا۔ "اچھا مرجا ساب! نیوں تو پھیر نیوں ۽ سہی
 - ایب دیکھ - میں کروں کے سوں۔"

مئے داند بھینجے، ارگرسی کے ہاتھ پے کو جھک کے مرجا
 ساب کے نیٹے ہو لیا۔ مرجا ساب نیں بی میرے کاہنی مونھ کریا۔
 میں مُسکرایا پر میری مُسکراہت ینھ جیہر بھریا تھا۔ جب مئے دیکھیا
 اک ایب و امیری بات سُنٹ نیں تیار سے تو مئے ایک ایک شبدھ پے
 جو ردے کے کیہیا۔

"مرجا ساب! میں ایک کار لیں جاؤں سوں۔"

نیوں کہہ کے میں ان جاٹ ہو کے دوسری اوڑ ڈکھٹ لاگ گیا۔

مرجا ساب بولیا: "کے کہوے سے توں! کار لیوے سے؟"
میں بولیا: "سُنیا کوئی کے؟ میں موٹر کار لین لاگ رہیا سوں۔
موٹر کار ایک اسی گاڈی سے، جس میں کچھ لوگ موٹر کہویں سیں آر
کچھ کار۔ پرتوں جہاں ماٹی کا مادھو سے۔ اس مارے مئے دونوں شبہ
بولے سیں۔ اک تئے سمجھٹ مینھ کوئے دقت ناں آوے۔"

مرجا ساب بولیا: "ہوں۔۔۔۔۔"

ایب کے میں بے پروائی تے سرگٹ پیٹ لاگ گیا۔ سیلی مئے
اوپر نیں ٹھالی۔ سرگٹ آلا ہاتھ نیوں کر کے مونھ تیں لیاند جٹوں
میں کوئے سنیا کا ایکٹر ہوں۔

مڑی ہاٹ مینھ مرجا ساب نیں پھیر "ہوں" بولیا۔

مئے سوچیا اس پے اثر ہونٹ لاگ رہیا سے۔ مرجا ساب
پے رعب پڑ گیا سے۔ میں تو چاہوں تھا اک مرجا ساب کچھ بولے آر
مئے بیر اپاٹے اک کتناک رعب پڑیا سے۔ پر مرجا ساب نیں پھیر بولیا:

"ہوں"

منے کیہیا۔ "مرجا ساب ! جڑے تئیں منے میرا سے ، تے
 اسکول، کلج آر گھرینھ دو تین جبان سیکھی سیں۔ اران تے نیارے
 بی تے کچھ شبدھ آویں سیں جو کسے اسکول، کلج یا کسے شریف گھرینھ
 کوئی بولے جاندے۔ پر اس بکھت توں جو "ہوں" تے آگے کوئی
 جاند ا۔ منے لاگے سے یو "جلیو" سے۔ اس بکھت تیری جو حالت سے
 اس نیں عربی منھ "حسد" کہویں سیں۔"

مرجا ساب کہن لاگیا۔ "ناں ! یا بات کوئی۔ میں تو بس
 کھریڈن کے شبدھ پے سوچوں سوں۔ تے کیہیا اک توں ایک کار
 لین جاوے سے۔ تو میرے یار ! کھریڈنا ایک اساکام سے جس کی
 کھاتر پینیاں و گیرہ کی جرورت ہو سے۔ و گیرہ کا بندوبست تو تیں کر لے
 گا۔ پر پینیاں کا کے کرے گا۔ کت تے لیاوے گا؟"

یونکتہ تو منے بی کوئی سوچیا تھا۔ پر منے ہمت ناں هاری۔ منے
 کیہا۔ "میں اپنی کوئے مہنگی چجیچ دیوں گا۔"

مرجا ساب بولیا۔ "کوئن کوئن سی سیں تیرے پے مہنگی چجیچ؟"
 میں بولیا۔ "ایک تو میں اپنا سرگٹ دھرٹن آٹا ڈیاچ دیوں گا۔"

مرجا ساب بولیا۔ "چلو۔ دس آنے توینھ ہو گے۔ باقی کے
ڈھائی تین ہجار کا انجام بی نیوں ء ہو جے گا تو سارے کام ٹھیک
ٹھاک ہو جیں گے۔"

پھر مئے لاگیا اک بات چیت نیں کچھ دیر واسطے روک دینا
چاہئے۔ آر میں چُپ ہو گیا۔ یا بات ایسے بی سمجھ کوئی آئی تھی اک
لوگ رینے کڑے تے لیاویں سیں۔ گھٹا ء سوچن پاچھے اس نتارے
پے پوہنچا اک مائس چوری کریں سیں۔ نیوں سوچ کے مڑا دھڑا
سکون ہو یا۔

مرجا ساب بولیا۔ "ایک بات بھتاؤں۔۔۔۔۔ ایک سائیکل
لے لے۔"

میں بولیا۔ "رینیاں کا مسئلہ تو پھیر لی رہوے ء گا۔"

کہن لاگیا۔ "مُپھت مینھ ملے تو؟"

مئے کیہیا۔ "مُپھت ! او کیو کر؟"

کہن لاگیا۔ "مُپھت ء سمجھ۔ کسے ڈھبی پے پیسے لیٹا بی کوئے

سراپھت کوئی۔ پر جے توں احسان ناں لیٹا چاھوے تو تیری مرجی۔"

اسے اسے موقعے پے میری ہاٹسی مینھ ایک بالک کی
 معصومیت، ایک گابھرو کی کھسی، پھواریاں کی پھوار کے راگ،
 بلبل کا گیت سارے کٹھے ہو جیں سیں۔ آرمیں نیوں ۽ ہاٹسیا۔ تو
 میری گلا پھو جو چوڑے ہو کے کھنچ گے تھے وینھ گھٹی ۽ دیر اپنی جگہ
 پے واپس کوئی آئے۔ جب منے یقین ہو گیا اک چاٹ چک کسے کھسی
 کی کھبر سٹن کے بعد دل کا دورہ پڑن کا جو کھترہ ہو سے، میں اُس تے بچ
 گیا سوں، تو منے پوچھیا۔ یا سائیکل ہے کس کی؟

مرجا ساب بولیا۔ "میرے پے ایک سائیکل پڑی سے۔ توں

لے لے۔"

میں بولیا۔ "ایک بر پھیر بولینے۔"

کہن لاگیا۔ "بھائی! ایک سائیکل ہے میرے دھورے۔"

جے و امیرے سے تو تیری بی ہوئی۔ توں لے لے۔"

یقین مانو، میرے پے تو گھرے بھر پائی پڑ گیا۔ لاج کے
 مارے پورے گات پے پسینہ آگیا۔ چودھویں صدی مینھ بھلا اسی بے
 گرج دوستی کڑے دیکھن مینھ آوے سے۔ منے گرسی سرکا کے مرجا

ساب کے ہور نیڑے کر لی۔ سمجھ مینھ کوئی آوے تھا اک اپنی بے
بسی ار سرم کا کیو کر جکرا کروں۔

میں بولیا۔ "مرجا ساب ! سب تے پہلاں تو میں اپنی گلتی
مانوں سوں جو منے بڈا بول بولیا ار تیرے تے مونھ پھیر کے بات
کری۔ دوسرا آج میں تیری شیا می اس بات نیں ماٹن لاگ رہیا سوں
اک میں تنے ایک کھد گرج، کمیٹھ، لالچی ار چلاک ماٹن سمجھوں تھا۔
منے ماف کر دینے۔ دیکھ یار !۔ نراج ناں ہوئے۔ گلتی ماٹساں پے ء
ہویا کرے سے۔ پر آج تنے اپنی سراپھت ار یاری نبھاں کا ثبوت
دے دیا سے۔ ار میرے تنیں ثابت کر دیا سے اک میں ایک نہپھرت
کے قابل، چھوٹی سوچ آلا ار چھوٹا ماٹن سوں۔ منے ماف کر دے
میرے یار۔"

میری آنکھیاں مینھ آنجھو آگے۔ اس تے پہلاں اک میں اپنا
سیر مرجا ساب کی گودی مینھ دھردیوں ار اُس کے ہاتھ پے ایک پیار
کروں۔ مرجا ساب بولیا۔

"یار اس میں میری سکھاوت جسا کچھ کوئی۔ میرے پے ایک
سائیکل سے، جسا میں اس پے بیٹھیا۔ اساء توں بیٹھیا۔"

میں بولیا۔ "مرجا ساب! مپھت مینھ کوئی لیوں۔ یوں کام میرے پے کوئی ہووے۔"

مرجا ساب۔ "بس مئے یو ء ڈر لاگے تھا۔ مئے پیرا سے اک توں کسے کا احسان کوئی لیندا کدے بی۔ رب گواہ سے، اس مینھ احسان کچھ بی کوئی۔"

میں بولیا۔ "بس کچھ بی سمجھ لے۔ مئے اس کی قیمت بھتا دے۔"

مرجا ساب۔ "ایب توں قیمت پوچھ کے مئے کانڈیاں مینھ ناں رگید، میرے یار۔ ارجب مئے لی تھی تو اس کی قیمت گھٹی ء تھی۔ ارایب تو واتنے کی رہی بی کوئی۔"
مئے پوچھیا۔ "تئے کتنے کی لی تھی؟"

کہنٹ لاگیا۔ "مئے تو پوٹے دو سو رپیاں کی لی تھی۔ اُس جمانے مینھ سائیکلاں کا رواج مڑا سا گھیٹ تھا۔ نیوں کر کے مہنگی ملیں تھیں۔"

مئے پوچھیا۔ "گھٹی پرائی سے کے؟"

میں بولیا۔ "ناں مر جا سب! پیسے تو تنے لیٹے پڑیں گے۔
اچھیا نیوں کر۔۔۔ میں تیری گوجی منھ کچھ پیسے گیر دیوں سوں۔ توں
گھراں جا کے گن لئے۔ جے ٹھیک لاگیں تو کیل نیں سائیکل بھج
دیئے۔ نئیں تو پیسے اُلٹے موڑ دیئے۔ ایب اورے میں تیرے گیلیاں
گا ہکاں آلی بات کروں تو کیسں آچھا کوئی لاگے۔"

مرجا ساب۔" چلو جیو کر توں کہوے سیے نیوں کر لیاں
ساں۔ میں تو ایسے بی کہوں سوں اک رہن دے پیسیاں نیں۔ پر میں
یا بات بی جاؤں سوں اک توں مانے کوئی۔"

میں اوٹھ کے نیں بھیت کوٹھڑے میںہ آیا۔ منے سوچیا، مائس
پرانی چج کی آدھی قیمت دیا کریں سیں۔ پر جب منے کیہیا تھا اک میں
تو آدھی قیمت بی کوئی دا سکدا۔ تو مرجا ساب نیں اس پے کوئے اُتر
کوئی دیا تھا۔ بلک نیں وا تو نیوں ء کہندا رہیا اک مُپھت میںہ لے جا۔
پر مُپھت میں کیو کر لیوں تھا۔ آکھر نیں سائیکل سے۔ سواری سے۔
بکسا کھولیا تو بیرا پاٹیا اک اس میںہ کل ملا کے چھیا لیس رپئے سیں۔
چھیا لیس رپئے تو کمیں ٹھیک نی لاگدے۔ پنتالیس یا پچاس ہوئے
تھے۔ ایب پچاس تو ہونئیں سکدے۔ ار جے پنتالیس ء دیئے ہیں تو
چالیس کیوں ناں دے دیوں۔ جن پیسیاں کے آکھر میںہ صفر لاگ
جے سے وینہ گھنے لاگن لاگ جے سیں۔ بس یا بات ٹھیک سے۔
چالیس دے دیوں سوں۔ اللہ کرے مرجا ساب قبول کرلے۔
باہر آیا۔ چالیس رپئے مُٹھی میںہ بند کر کے منے مرجا ساب کی
گوجھ میںہ گھال دیئے ار بولیا۔

"مرجا ساب! ان پیسیاں نیں سائیکل کی قیمت ناں سمجھنئے۔
جے اپنٹے ایک گریب ڈھبئی کے دیئے ہوئے ینھ تھوڑے سے رپینے
تئے سمجھ ینھ آجیں تو سیرے سائیکل بھجوا دیئے۔

مرجا ساب جاں لاگیا تو مئے ایک بریاں پھیر کہیا۔ اک کیل
نیں جرور سائیکل سیرے سیرے بھج دیئے۔

بارٹے تے لکڑی ہاں پھیر کہیا۔ "کیل نیں سیرے آٹھ نو
بجے تیں پوہنج جے۔ دیکھیے! دیر ناں کرینے۔۔۔۔۔ رب سوہنے
کے ہوالے۔۔۔ ارمرجا بھائی۔ میرے ان تھوڑے سے بیتیاں
نیں ءگھٹا سمجھ لئے۔ تیرا بوہت بوہت شکریہ۔ ارکوئے بات بھونڈی
لاگی ہو تو ماف کر دیئے۔

مرجا ساب بولیا۔ "مڑا سا جھاڑ جھوڑ لنتے اس نیں۔ اریل
بھی دے لئے۔ جے میرے نوکر نیں پھرست ہوئی تو میں آپے کروا
دیوں گا۔ نیں تو میں آپے کروا لئے۔"

میں بولیا۔ "ہاں، ہاں! وایں سب کر لیوں گا۔ توں
سیرے بھج دیئے۔ ار دیکھئے۔ آٹھ بجے یا پھر ساڈھے سات بجے
تیں بھج دیئے۔"

رات نیں کھاٹ پے لوٹیا تو سائیکل پے گھومٹ پھرٹ کا
 پروگرام بٹاندا رہیا۔ نیوں سوچیا اک دو تین دن مینھ آسے پاسے کی
 ساری مشہور آرپرائی جگہ دیکھ لیوں گا۔ آراگلے سال جے ہو سکیا تو
 کشمیر کی سیر بی اسے سائیکل پے کروں گا۔ سیرے سیرے ہوا کھاٹ
 کھاتر نھر کاہنی جایا کروں گا۔ میں بی سیدھی سرڑک پے کو ہٹکے ہٹکے،
 چُب چیتے ہاتی داند کی ایک کھینڈو کی ڈھال لنگ جوں گا۔ جب
 ڈھلدے سورج کی چمک سائیکل کے چمکدے پیہیاں پے پڑے گی تو
 سائیکل چمک جے گا آریوں لاگے گا جٹوں کوئے راج ہٹس دھرتی
 کے گیلیاں اڈیا جاوے سے۔ ایک ان ڈیکھی سی مسکراہت میرے
 ہونٹاں پے کھیلٹ لاگ ری تھی۔ کئی بریاں من مینھ آیا اک بھاج
 کے جاؤں ارجا کے مرجا ساب نیں گل تے لالیوں۔

رات نیں سُننے مینھ دعا مانگدا رہیا اک یا سچے مالک۔ مرجا
 ساب سائیکل دیٹ پے راجی ہو جے بس۔۔۔"

سیرے نیں اوٹھیا تو اوٹھدے گیلیاں نوکرنیں کھسی کی کھر
 سٹائی اک جناب سائیکل آگی سے۔

میں بولیا۔ "اتنی سیرے؟"

نوکر نہیں کیا۔ "واتورات نہیں آگئی تھی۔ توں سو گیا تھا۔
مَنے جگاٹا اچھیا کونی سمجھیا۔ ارہاں! گیلیاں مرجا سب کا مائس یو
ڈھیریاں کسٹ واسطے چابی بی دے گیا سے۔"

مَنے ہیرانگی تو ہوئی اک مرجا سب نیں سائیکل بھیجنے
اتنی تول کیوں کری۔ پر میں اس بات پے پوہنچیا اک مائس ایماندار
ار سرپھ سے۔ جب رپئے لے لئے تو پھر سائیکل کیوکر رول لیندا۔
مَنے نوکر تے کیا۔ "دیکھ رے! یا چابی اورے ء چھوڑ
دے۔ ار جا کے سائیکل نیں کسے کپڑے گیلیاں اچھی طریاں پونجھ
پانجھ دے۔ گلی کی ٹکڑ پے جو سائیکلاں آئی دکان سے، اس پے تے
سائیکل مینھ گیرٹ آتیل لے آ۔

"ارے اوریل کار! بھاجیا کڑے جاوے سے۔"

"میری بی سُن لے راجھ!"

"سائیکل آٹے پے تیل کی ایک کپی لے آئے۔ ار جرے
جرے تیل گھالٹن کی جگہ ہو۔ اوڑے تیل گھال دے۔ اردکان آٹے
تے کہیے، گھٹیا تیل نادیوے۔ اساناں ہو اک سائیکل کے پُرجے
کھراب ہو جیں۔ سائیکل کے پُرجے گھٹے ناجک ہوویں سیں۔

سائیکل باہر کاڈھ کے رکھ۔ میں ایسے کپڑے بدل کے آؤں سوں۔
 ار پھیر تیرے تے کہوں سوں۔ صابھ کر دیتے۔ ار گھٹا ہانگابی ناں
 لائے، کدے سائیکل کی پالس رگڑ رگڑ کے تار دے۔"

منے تول مینھ چاء پی۔ گسل کھانے مینھ مجے مجے تے "چل
 چل چنبیلی باغ میں" گاند ارھیا۔ کپڑے بدلے۔ چابی گوجھ مینھ گھالی
 ار کرے تے باہر لکڑ آیا۔

برینڈے مینھ آیا تو اوڑے ایک عجیب سی مسین پے نجر
 پڑی۔ ٹھیک طریقوں پراٹ مینھ کوئی آیا اک یا کے چج سے۔ نوکرتیں
 پوچھیا۔ "کیوں رے! یو کے راجھ سے؟"

نوکر بولیا۔ "جناب! سائیکل سے۔"

منے کہیا۔ "سائیکل! کس کی سائیکل؟"

کہن لاگیا۔ "مرجا ساب نیں بھجوائی سے۔ تھاری کھاتر۔"

منے کہیا۔ "ار جوٹسی سائیکل رات میں بھیجی تھی۔ وا
 کڑے گئی؟"

کہن لاگیا۔ "یائے تو ہے۔"

منہ کیہا۔ " کے بکو اس کرے سے۔ جو سائیکل مر جا سب
نیں کیل رات میں بھیجی تھی۔ وایائے سے؟ "

بولیا: " ہاں جی۔ "

میں بولیا۔ " اچھیا۔ " ار پھیر سائیکل دیکھنٹ لا گیا۔

" سائیکل صاپھ کیوں نی کری؟ "

" جناب ! دو تین بریاں کری سے۔ "

" تو یا میلی کیوں سے۔ "

نو کرنیں اس بات کا جواب ء کوئی دیا۔

" توں تیل لے آیا؟ "

" ہاں جی ! لیا یا سوں۔ "

" دے دیا۔ "

" جناب ! وینھ جو تیل دیٹ کے مورے ہوویں سین ناں۔

وینھ دیکھے ء کوئی۔ "

" اس کی کے وجہ؟ "

" جناب ! سائیکل کے دھریاں پے میل ار جنگال اتنا جم

رہیا سے اک وینھ مورے کڑیاں بچ مینھ ء دب دبا گے سین۔ "

ھلوے ھلوے میں اُس چیچ کا ہنی گیا جس تے میرا نوکر
سائیکل بھتاوے تھا۔ اُس کے کئی پُرجیاں تے جتاں نیڑے جا کے
دیکھیا۔ تو اتنا تو ثابت ہو گیا اک سائیکل سے۔ پر جو اس کی حالت ہو
ری تھی تو نیوں لاگیا جنوں یا چیچ ھل، رھٹ آر چر کھے جسی چیچاں
تے بی پہلے کی بی ھوئی سے۔ پیہہ گھما گھما کے واماورا ٹوہیا جس مینھ
کسے جمانے مینھ تیل دیا جاوے تھا پر ایب او مورے مینھ کو تیل آٹن
جاٹن کا سلسلہ بند ہو لیا تھا۔

نوکر بولیا۔ "جناب! تیل گھالیا تو مورے مینھ جاٹن کی بجائے
آسے پاسے لکڑے سے۔ مورے مینھ تو جاندا ء کوئی۔"
منے کہیا۔ "اچھیا۔ اوپر اوپر گیر دے۔ اس کا بی فیدہ ہو
سے۔"

پھیر اللہ کا نام لے کے سائیکل پے چڈھیا۔ ایسے پہلا پیر
چلایا تھا تو نیوں لاگیا جنوں کوئے مردہ ماٹس اپنی مرجی کے کھلا پھ ٹھان
پے اپنی ہاڈیاں کی تڑک تڑک اواج کا ڈھ کے گسے کرنٹ لاگ گیا سے۔
میرے گھرتے لکڑے ء تھوڑی سی اترائی سی ہے۔ اوڑے پوھنچ
کے سائیکل آپے آپ چالٹ لاگ گی۔ پر نیوں چالی جنوں سرڑک پے

تار کول چالدا هو۔ ارگیلیاں ۽ سائیکل کے کئی پُرجیاں مینھ تے طراں
طراں کی اواج آن لاگ گی۔ ان اواجاں کے کئی گروپ بٹائے جا
سکیں سیں۔

چیں، چاں، چوں کی اواجاں گھٹی کر کے گدی کے تے تے
ارپا چھلے پھینے مینھ تے لکڑیں تھی۔

کھٹ، کھڑ، کھڑ، کھڑ کی طریاں کی اواج مڈگاڈاں مینھ تے
آوے تھی۔

چر۔ چرکھ، چر، چرکھ کی اواج کے سُر سائیکل کی چین اریڈل
مینھ تے آوے تھی۔

چین ڈھیلی ڈھیلی تھی۔ جد میں بیڈل پے جور لاند اتو جنجیر میں
ایک انگڑائی سی اوٹھے تھی۔ اروا تن جاندی ار چڑچڑ بولن لاگ
جاندی۔ ار پھیر ڈھیلی هو جاندی۔ پاچھلا پھیر گھومن کے گیلیاں
جھومن بی لاگ رھیا تھا۔ نیوں سمجھ لیواک آگے نیں تو واپالے تھا
پرگیلیاں ۽ سبے تے کھبے ار کھبے تے سبے نیں بی ڈولے تھا۔ جے کوئے
سائیکل کی لکیر نیں سرڑک پے دیکھدا تو اس نیں نیوں لاگدا جنوں
شراب کے نشے مینھ ایک سانپ جاندا هو۔ مڈگاڈتھے تو، پرپھیاں کے

جہاں اوپر کوئی تھے۔ ان کا فیدہ بس یو تھا اک ماٹس جے اُتر کاہنی سیر
کرٹ جاندا ہوا سورج پچھم سینھ ڈوبدا ہو تو مڈگاڈاں کے ہونٹے
سائیکل کے ٹیر دھوپ تے بچے رہویں گے۔ اگلے پھینے کے ٹیر سینھ
ایک بڑا سارا ٹیر پاٹن تے دوسرا جڑ رہیا تھا۔ جس کے کارنٹ پیہ ہر
چکر سینھ ایک بریاں جو رتے اوپر نیں اوٹھے تھا آر میرا سر پاچھے نیں
جھٹکا کھاوے تھا۔ نیوں لاگے تھا جٹوں کوئے میری ٹھوڈی تلے نلے
مارن لاگ رہیا ہو۔ پاچھلے ار اگلے پھینے نیں بلا کے چوں، چوں،
پھٹ۔۔۔ چوں، چوں، پھٹ، چوں، چوں، پھٹ کی اواج آن لاگ
ری تھی۔ جب اُترائی پے سائیکل مڑی سی تیج ہوئی تو جٹوں ایک
بھوکپ آگیا۔ ار سائیکل کے کئی پُرجے جو ایب لگ سوٹ لاگ رے
تھے ایب وینھ بی جاگ گے۔ نیڑے کو لنگدے لوگ گھوم کے دیکھن
لاگ گے۔ ماواں نیں اپنے بالک چھاتی تے لالے۔ کھرڑ، کھرڑ کی
اواج کے یچ سینھ پھیاں کی نیاری ء اواج آوے تھی۔ پر ایب
سائیکل تیج ہوگی تھی۔ جیاں کر کے چوں، چوں، پھٹ کی اواج ایب
بدل کے نیں چچوں، پھٹ، چچوں پھٹ، چچوں پھٹ ہوگی تھی۔

ساری سائیکل مینھ تے جنوں کسے اپھریکی ملک کے جُبان کی گردان
سُنٹ مینھ آوے تھی۔

اتنی تیج رپھتاری نے سائیکل کی طبیعت گھٹی ء کھراب کر
دی۔ اَر ایک دم اس مینھ دو تبدیلی دیکھن مینھ آئی۔ ایک تو ہینڈل ایک
کاہنی مڑ گیا جس کا نتیجہ نیوں لکڑیا اک جاؤں تو میں تھا سچے پاسے پر میرا
گات سارے کا ساری کھبی اوڑ کاہنی ہو رہیا تھا۔ سائیکل کی گدی
چھ انچ تلتاں ہولی تھی۔ جب میں پیڈل مارن کھاتر اپنی ٹانگاں نیں
اوپر تلے چلاؤں تھا تو میرے گوڈے میری ٹھوڈی کے آلاکس تھے۔
کڑ میری دوہری ہو کے باہر نیں لکڑ رہی تھی۔ ارا گلے پھینے میں جوڑ
کے کارن میرا سہری جھٹکے کھاٹ لاگ رہیا تھا۔

گدی کا تلتاں ہونا گھٹی ء مُصیبت دے گیا تھا تو منے جائیا اک
اس نیں ٹھیک کر لیوں۔ منے سائیکل ڈائیا ارتلے اتر آیا تو نیوں لاگیا
جنوں دنیا مینھ ایک دم ساں سپ ہوگی۔ نیوں لاگیا جنوں میں ریل
کے ٹیسن تے باہر لکڑ آیا ہوں۔ منے گو جھی مینھ تے چابی کاڈھی۔
گدی اونچی کری، ہینڈل بی ٹھیک کریا ارا پھیر سائیکل پے بیٹھ لیا۔

ایسے دس قدم بی کوئی چالیا تھا تو ہینڈل ایک دم نیچا ہو گیا۔
 اتنا نیچا اک گدی ایب ہینڈل تے ایک پھٹ اونچی ہوگی۔ میرا گات
 ایب آگے نیس جھک رہیا تھا۔ گات کا سارا بوجھ دونوں ہاتاں پے
 آلیا تھا۔ ہاتھ ہینڈل پے تھے ار جھٹکے لاگن لاگ رے تھے۔ تھامے
 میری حالت نیس سوچو۔ تو بیرالاگے اک میں دور تے نیوں لاگوں تھا
 جنوں کوئے لگائی آٹاگوں دی ہو۔ ار مئے اپنی اس حالت کا احساس
 کچھ گھٹا تھا تو میرے ماتھے پے پسینہ آگیا تھا۔ میں سبے، کھبے کھڑے
 لوگاں نیس آنکھیاں کے کوئیاں مینھ کو دیکھدا جاؤں تھا۔ نیوں تو ہر
 ماٹس مئے میل بھر پہلاں ء پاچھے مڑ مڑ کے دیکھن لاگ جے تھا پر ان
 مینھ تے کوئے بی اسا کوئی تھا جو مئے نیوں سائیکل پے بیٹھیا دیکھ کا
 ہائیساناں ہو۔

ہینڈل تو تے ہو گیا تھا، گدی ایک بریاں پھیر نیچی ہوگی۔
 ار میں جہاں دھرتی کے نیڑے لاگ لیا۔ ایک چھو رے نیس کہیا۔
 "دیکھو رے دیکھو! یو ماٹس کے کرے سے۔"

اُس لنگواڑے کے بھائی، میں کوئے بادی گر تھا ار کوئے
کلا دکھاں لاگ رہیا تھا۔ منے ایک بر پھیر تلے اتر کے گدی آر ہینڈل
اونچا کریا۔

پر این مینھ تے ایک ناں ایک پھیر نیچا ہو جاندا۔ وینھ پل، جد
میرا گات ار میرے ہاتھ دونوں ایک ء اونچائی پے ہوں، وینھ
بوہت ء کم تھے۔ ار ان حالات مینھ بی، میں نیوں ء سوچدا رہوں تھا
اک ایب کے گدی پہلاں نیچی ہووے گی اک ہینڈل۔ نیوں میں بے
ڈر کے ناں رہ سکوں تھا۔ بلک نیں گات نیں گدی تے مڑا اوپر ء
راکھدا۔ پر نیوں کرن تے ہینڈل پے گھٹا جو رپڑدا ار ہینڈل پھیر نیچا ہو
جاندا۔

جب دو میل لنگ لئے ار سائیکل کی اوٹھک بیٹھک مینھ ایک
باقاعدگی آگی۔ تو منے سوچیا کسے مستری پے تے پیچ کسوا لینے چاہئیں۔
ار نیوں میں ایک دکان پے آگیا۔

سائیکل کی کھڑکھڑیں سُن کے جتنے لوگ دکان مینھ کام کریں
تھے سارے میرے کاہنی دیکھن لاگ گے۔ پر منے ہوٹسلہ سا کر کے
کیہیا۔

"بھائی! مڑی اس کی مرمت کر دیو۔"

ایک مستری آگے نیں آیا۔ اُس کے ہاتھ مینہ ایک لوہے کا سر یا تھا۔ اُس گیلیاں مستری نیں سائیکل کے بے دردی گیلیاں ٹھوکا ٹھاکا کری۔ نیوں لاگے تھا جٹوں اس نیں گھٹی جلدی جلدی سارے حالات کا انداجا لایا ہو۔ پر پھیرنی منے پوچھن لاگیا۔

"کون کوٹسے پر جے کی مرمت کرائی سے؟"

منے کہیا۔ "گھٹا ینڈی لاگے سے اُستاد! دیکھدا کونی بس گدی ارہینڈل کسوا کے اوپر ٹھاٹا سے۔ اور کے؟ انہاں نیں ٹھیک کر دے ار پیسے بھتا کتنے ہوئے۔"

مستری کہن لاگیا۔ "مڈ گاڈی ٹھیک کر دیو؟"

منے کہیا۔ "ہاں۔ کر دے۔"

کہن لاگیا۔ "جے باقی چیجاں بی ٹھیک کرا لیو تو اچھا ہووے

گا۔"

منے کہیا۔ "اچھیا۔ کر دیو۔"

بولیا۔ "نیوں ایسے تھوڑی ہووے گا۔ دس پندرہ دن کا کام

سے۔ اس نیں مہارے دھورے چھوڈ دیو۔"

"ارپیے کتنے لیو گے؟"

کہنٹ لاگیا۔ "بس تیس چالیس ریپے لائیں گے۔"

منے کہیا۔ "بس کر رے انجینئر! جوٹسا کام کہیا سے۔ کر

دے آر پھالتو کا کام ناں کاڈھے۔"

مستری نیں تھوڑی دیرینھ ہینڈل ارگدی پھیر اونچی کر کے

کس دی۔ میں چالٹ لاگیا تو مستری بولیا۔ "کس تو دی ہے۔ پرچ

سارے گھس گے سیں۔ ایہ تھوڑی دیرینھ پھیر ڈھیلے ہو جیں

گے۔"

منے کہیا۔ "دیکھ رے اس مائس نیں! تے دو آنے پھیر

کیاں کے لئے سیں۔"

بولیا۔ "جناب! تھام نیں سائیکل بی تو مُپھت ملی ہووے

گی۔ یا سائیکل تھارے ڈھبی مِرجا ساب کی ھ

ناں؟----- رے کالے! یا وائے سائیکل سے ناں

جوٹسی مِرجا ساب پاچھلے سال بیچنٹ کھاتر آیا تھا۔ سیاں لی تے؟۔

بھائی! صدیاں لنگ گی پر اس سائیکل کی سجا ماپھ کوئی ہوئی۔"

منے کیہیا۔" یا کے بات کری رے! مِرجا ساب کو چھورا
اسے پے تو کلج جایا کرے تھا۔ ار اس نین ایے کلج چھوڑے دو
سال بی کوئی ہوئے۔"

مستری بولیا۔" وابات تو ٹھیک سے۔ پر مِرجا ساب جب
آپ کلج جایا کرے تھا تو اسے سائیکل پے جایا کرے تھا۔"
یابات سُن کے میری حالت کچھ مُردنی سی ہوگی۔ میں
سائیکل نین پکڑ کے ہلوے ہلوے پیدل چال پڑیا۔ پر پیدل چالنا بی
اوکھا ہو گیا۔ اس سائیکل کے چلانٹ ینھ گات کے اسے پٹھیاں پے
جو رپڑے تھا جو دوسرے سائیکل چلانٹ میں استعمال کوئی ہوندے۔
جیاں کر کے، ٹانگ، کاندھے، کڑا رها تھاں میں جگہ جگہ درد ہونٹ لاگ
رھیا تھا۔ مِرجا ساب کا کھیال رو رو کے آنٹ لاگ رھیا تھا۔ پر میں
کوس کر کے اس کھیال نین دل تے کاڈھ دیوں تھا۔ نین تو میں پاگل
ہو جاندا۔ ار اس پاگل پن کی حالت ینھ میرے پے پہلا کام یو ہوندا
اک میں مِرجا ساب کے مکان کے آگے بیچ بجار ایک جلسہ کردا جس
ینھ مِرجا ساب کی بے ایمانی آر دگا باجی پے ایک لامبی سی تقریر کردا۔
اس دنیا کے آر آنٹ آئی دنیا کے ماٹساں تیں مِرجا ساب کی ناپاک

پھطرت کھول کے بھتاندا۔ پھیر ایک چتا بال کے اُس چتا مینھ اپنا آچا پھوک لیندا۔

گھٹی ء سوچ بچار کے بعد میں اس نتیجے پے پوھنچ ء گیا اک جیو کر بی ہو سکے، ایب اس سائیکل نیں اوٹے پوٹے پیسیاں مینھ بیج دیوں آر جو کچھ بی مل جے، اُس پے صبر کر لیوں۔ چولہے مینھ جاوے منافع، دس پندرہ روپیاں کا نقصان بی ہو جے تو کھیر سے۔ چلو چالیس کے چالیس روپے تو گدھے کی گوٹ مینھ کوئی جاویں۔ راہ مینھ ایک اور سائیکل آٹے کی دکان آگی۔ میں اوڑے ڈٹ گیا۔

دکان دار بھاج کے میرے کاھنی آیا۔ پر میری جیبھ تو جھٹوں تالوے کا لاگ گی۔ بولیا ء کوئی جاوے تھا۔ تالا سا لاگ گیا۔ ساری عمر مینھ ایب لگ کوٹے چچ نیچی ء کوئی تھی۔ منے بیر ء کوئی تھا اک اسے موقعے پے کے کیہیا کریں سیں۔ گھٹی ء سوچا ساچی کے بعد بس میرے مونھ تے نیوں ء لکڑیا۔ "یا سائیکل سے۔"

دکان دار بولیا۔ "پھیر! میں کے کروں؟"

میں بولیا۔ "لیوے گا؟"

کہنٹ لاگیا۔ "کے مطبل؟"

منے کیہیا۔ "بچوں سوں میں۔"

دکان دارنیں میرے کاہنی نیوں دیکھیا۔ منے لاگیا اک وا
میرے اوپر چور ہون کا بسواس کرے سے۔ پھیر سائیکل کاہنی
دیکھیا۔ ایک بر پھیر میرے کاہنی دیکھیا۔ جٹوں اس بات کا پھسلہ نہیں
کر سکيا اک ماٹس کون سا سے آر سائیکل کون سا۔

پر پھیر بول ۽ پڑیا۔ "کے کرے گا رے، توں اس نیں بیج
کے؟"

رب جائے اسے سوالاں کا جواب کے ہو سے۔ منے
کیہیا۔

"کے توں نیوں پوچھنا چاہوے سے اک جوٹسے ریے
سائیکل بیج کے ملیں گے، میں ان کا کے کروں گا۔"
کہن لاگیا۔ "وابات تو ٹھیک سے۔ پر اس نیں لے کے کوئے
کرے گا کے؟"

میں بولیا۔ "اس پے چڈھے گا، اور کے کرے گا؟"

کہن لاگیا۔ "اچھیا۔ چڈھ بی گیا۔ پھیر؟"

منے کیہیا۔ "پھیر کے؟ پھیر چلاوے گا۔ اور کے؟"

دکان دار بولیا۔ "اچھیا۔ ہوں۔۔۔۔۔ رے خدا بخش!

اورے آئیے مڑا سا۔ یا سائیکل بکن آئی سے۔"

جس مانس کا نام خدا بخش تھا۔ اس نین دور تے ء سائیکل

کاہنی نیوں دیکھیا جنٹوں سائیکل کی بانس سونگھے سے۔

پھیر اُن دونوں میں آپس میں کوئے مسکوٹ کرمی۔ اَر پھیر

جس کا نام خدا بخش کوئی تھا۔ میرے دھورے آیا اَر کہیں لاگیا۔ "

توں ساچی مینھ ۽ یا سائیکل بیجے سے؟"

منے کیسا۔ "توں کے سمجھے سے اک مینھ گھراں تے تیرے

تین بات کرن کھاتریو بہانہ کر کے آیا سوں۔۔۔۔۔ سوہرا

تیرا۔۔۔ دیکھیا نہیں اِسا۔"

یو چھٹ لا گیا۔ "کتنے پیسے لیوے گا؟"

منے کیہیا۔ "توں بھتا۔"

کہن لاگیا۔ "ساچی بھتاؤں۔۔۔۔۔"

منے کھپیا۔ "ہاں۔ بھتا دے۔"

پھیر کہن لا گیا۔ "ساچی ساچی بھتا دیوں؟"

میں بولیا۔ " لاگ دار! ایب بھتاوے بی گا اک نیوں ء
ترساندار هوے گا؟"

کہن لاگیا۔ "تین رپلی ملیں گی، اس کی۔"
یا بات سُن کے میرے تو گات مینھ آگ لاگ گی۔ میرے
ہاتھ، پیر آر ہونٹ کاننٹ لاگ گے، گسے مینھ۔
مئے کہیا۔ "رے چھوٹا موٹا کام کر کے پیٹ پالٹئے کمینٹ
ماٹس۔ مئے اپنی بے عجتی کی کوئے پھلکرنیں سے۔ پر تئے اپنی بے
ہودہ بات گیلیاں جو اس بے جُبان تے صدمہ دیا سے۔ اُس پے میں
تئے قیامت تئیں ماف نہیں کر سکا۔" نیوں کہہ کے، میں سائیکل پے
بیٹھیا۔ آر جو ر جو ر تے پیڈل مار کے سائیکل چلاٹ لاگیا۔

ایبے بس بیس ایک ہاتھ گیا ہوں گا۔ جب مئے ایک دم
نیوں لاگیا جنٹوں دھرتی اُچھل کے میرے مونھ نیں آلاگی ہو۔ امبر
میرے سر پے تے ہٹ کے میری لاتاں کے کیچ مینھ کو لنگ گیا ہو۔
آر آسے پاسے کھڑی بلڈنگ اپنی اپنی جگہ بدل کے دوسری اوڑ چلی گئی
ہوں۔ جد میرے ہوش ٹھکانے آئے تو دیکھیا اک مینھ پلاٹھی ماریں
جمین پے بیٹھیا سوں۔ گھٹے ء دن تے میں نیوں جمین پے بیٹھیا کوئی

تھا تو آج یو تمنا بھی پوری ہوگی۔ میرے آسے پاس کچھ ماٹس کٹھے ہو گے تھے۔ جوٹسے مئے دیکھ دیکھ کے ہاٹسٹ لاگ رے تھے۔ شیا می وادکان تھی جرے مڑی ہاٹ پہلاں مئے سائیکل بیچن کی ناکام کوسس کری تھی۔ جد مئے چاروں پاسے دیکھیا تو بیرا پٹیا اک سائیکل کا اگلا پہیہ سائیکل تے نیارا ہو کے سرڑک کی دوسرے اوڑ پڑیا تھا۔ آر باقی سائیکل میرے دھورے پڑی تھی۔ مئے ترنت اپنا آپا سنبھالیا۔ جو پہیہ سائیکل تے نیارا ہو گیا تھا۔ اُس تے ایک ہاتھ مینھ ٹھایا۔ باقی سائیکل دوسرے ہاتھ مینھ پکڑی آر چال پڑیا۔ جو کام مئے کریا و ایک بس نیوں ء ہونٹ آلی بات تھی، ساچی پوچھو، تو ایب اس سائیکل تے میرا من اوٹھ لیا تھا۔

جد میں یہ ساری چیج ٹھا کے چال پڑیا تو مئے اپنے آپ تے پوچھیا۔ "ماٹس۔۔۔۔۔ یوتوں کے کر رہیا سے؟۔ کڑے جاوے سے؟ تیرا ارادہ کے سے؟ مینھ دوپہیے تنے کیوں ٹھارا کھے سین۔"

ان سارے سوالاں کا جواب بس یو ملیا۔ اک دیکھیا جاوے گا۔ توں پہلاں اورے تے تو لکڑ۔ ساری دنیا کے ماٹس تنے دیکھن لاگ رے سین۔ اپنا سر اونچا رکھ آر چالدارہ۔ جوٹسے ہاٹسے سین،

انہاں نیں ہاٹس دے۔ اس ڈھال کے گھٹیا لوگ ہر قوم آر ہر
دیش مینھ پائے جاویں سیں۔ آکھر ہو کے گیا؟ ایک ایکسڈنٹ۔ سچے
کھتے ناں دیکھ، بس چالدارہ۔

ماٹساں کی اُولی سولہ بات بی سُنٹ لاگ رہیا تھا۔
ایک بولیا۔ "رے بھائی، ایب گتہ تھوک دے۔"
ایک اور بولیا۔ "اے بے ہیا سائیکل۔ توں گھراں چال۔
تے تو مینھ بھتاؤں گا۔"

ایک باپ اپنے چھورے کی آنگلی پکڑیں جاوے تھا۔
میرے کاہنی دیکھ کے بولیا۔ "دیکھ بیٹا! یا سے سرکس آلی سائیکل۔
اس کے دونوں پہیے نیارے نیارے ہو سیں۔"

پر میں چالدا گیا۔ تھوڑی دیر مینھ، میں بسا ست تے دور لکڑ
آیا۔ ایب میری چال مینھ ایک ارادہ پایا جاوے تھا۔ میرا من جو
پاچھلے کئی گھنٹیاں تے کوئے پھیسلہ لین کی اُدھیر بٹن مینھ تھا آر گتے مینھ
کچکی کھاٹ لاگ رہیا تھا۔ ایب بوہت عہکا سا لاگے تھا۔ میں
چالدا گیا۔ چالدا گیا۔ نیوں میں دریا کے نیڑے پوہنچ گیا۔ پل پے کھڑیا
ہو کے منے دونوں پہیے ایک ایک کر کے اتنی بے پروائی گیلیاں دریا

مینھ گیر دیتے جٹوں کوئے کھٹ گیر ٹ آئے ڈبے مینھ کھٹ گیر دا ہو۔ پھیر
واپس گام کاہنی چال پڑیا۔

سب تے پہلاں میں، مرجا ساب کے گھراں گیا۔ کوڑ
کھڑکانے۔ مرجا ساب بولیا۔ "بھیترا آجیا۔"

منے کہیا۔ "ناں یار۔ توں ء باہر نین آجیا۔ میں تیرے برے
گیانی ار اللہ لوگ ماٹس کے گھراں بنا وجو کریں کیوکر آسکوں سوں۔"
جب مرجا ساب باہر آیا تو منے اپنی گوجھی مینھ تے واسائیکل
کے پیچ کسٹ آلی چابی کاڈھی ار اُس کے ہاتھ مینھ پکڑادی۔ جوٹسی
اُس نین سائیکل گیلیاں مچھت مینھ میرے تے دی تھی۔

میں بولیا۔ "مرجا ساب! ایب اس چابی گیلیاں توں ء کچھ
ٹھیک کرلے۔ میرے تو ایب یا کسے کام کی رہی نیں۔"

گھراں پوہنج کے منے علم کیمیا کی اُس کتاب پے پھیر دھیان
لایا جو منے بارھویں جماعت مینھ پڑھی تھی۔

سیرے جو آنکھ میری کھلی

(پطرس بخاری کے مضمون کا ہریاٹوی ترجمہ)

نجمہ عثمان

گادڑ کی موت آوے، شہر کا ہنی بھا جے۔ میرا بخت جا گیا اک ایک
 دن اپنے پڑوسی لالہ کریا شنکر جی بے چارے تے باتا باتا میںھ کہہ
 دیا۔ "بھائی امتحان کے دن تھوڑے رہ گے۔ تیں سیرے سیرے
 اٹھے سے۔ منے بھی جگا دیا کر۔" وا بھائی تو لاگے باٹ میںھ ء تھا۔
 اگلے دن، اس نیں تو لیا اللہ کا نام اُردے دھما دھم میرے کو اڑ پیٹے
 شروع کر دیے۔ مڑی ہاٹ تو منے لا گیا، میں نیند میںھ سوں۔ ایسے تے
 کے فکر، آنکھ کھل گی تو لا حول ولا پڈھ لیوں گا۔ پروا بمباری تو تیز
 ہوندی گئی۔ لے بھائی۔ جب کمرے کی چاروں کاندھ ہالٹ لاگ
 گی۔ گھرے پے دھیر یا گلاس ناچنٹ لا گیا۔ ار کاندھ پے لٹکیا کیلینڈر

پروینہ حضرت کے مجالِ جے اڑے تے حال لیں۔ "اے میرے خدا، کوٹسی بری گھڑی تھی؟ یوبندہ سوئے ہوئے نیں جگاوے سے اک مردے کی چتا جلاوے سے۔" نیوں تو حضرت عیسیٰ بھی کوئی کردے ہونگے۔ ماٹھی سو واجِ مینھ "قم" کہہ دیندے ہونگے۔ زندہ ہو گیا تو اس کی مرضی۔ نہیں تو نیوں ء چھوڈ دیندے ہونگے۔ وینھ کے مردے کے پاچھے لٹھ لے کے پڑ جاندے ہونگے۔ توپ تو کوئی لے کے چڈھائی کردے ہونگے۔؟ یو میرے پے ہو یا کوئی اک کو اڑ کھول دیوں۔ بسترے مینھ تے اٹھن واسطے بھی تو گھٹے ء لارے لپے لاٹے پڑیں سیں۔ اس دکھ کا اندازہ تو وینھ ء کر سکیں سیں جو مہارے دکھ

مینہ شریک ہوں۔ آخر کار لیمپ جلایا تو اس کی روشنی کو اڑاں تے
باہر گئی تو طوفان تھم گیا۔

منے کھڑے ہو کے کھڑکی مینہ کو دیکھیا تو اسمان تاریاں تے بھریا پڑیا
تھا۔ سوچیا، آج تویر پاڑ کے ءرھوں گا اک یو سورج کس پاسے
تے لکڑے سے۔ میں اورے دھورے کھڑکی مینہ چکر کاٹڈا رھیا پر
اسی کوئے نشانی بھی نوریر کے ٹیم نظر نہیں آئی۔ جن کا ذکر بڈے
بوڈھیاں پے سٹں راکھیا تھا۔ تو بھائی فکر سی لاگ گی اک آج سورج
گہن تو نہیں لاگ گیا۔

کچھ پلے کوئی پڑی تو پڑوسی تے روکا ماریا۔ "بھائی او۔۔۔۔" جواب
آیا۔ "ہاں"

میں بولیا۔ "آج یو کے بٹی، اندھیرا اندھیرا سا ہے۔" تین بجے کا سٹ
کے میرا تو سانس اوپر کا اوپر ارتلے کاتلے۔۔۔ منے حیران ہو کے
پوچھیا۔ "کے کہیا سے تئے؟ تین بجے سیں؟" بولیا: "تین تو کوئی۔۔۔
ساڑھے سات منٹ اوپر ہو رے سیں تین تے۔" بولیا: ارے

بھوتی کے، طرم خان، چبل، کت ء منے تیرے سے سیرے جگاں
 کا کپہا تھا یونیوں کپہا تھا کہ سرے تے سوٹ ء نہ دیے۔ تین بجے
 جاگٹا کت کی شرافت سے۔ ؟ تنے میں کوئے ریلوے گارڈ سمجھ راکھیا
 سوں۔ تین بجے اٹھن آٹا ہوندا تو بابو میرے صدقے واری جاندا۔
 اونے بے وقوف آدمی۔ تین بجے اٹھ کے بھلا میں زندہ رہ سکوں
 سوں؟ سونے کا چچھ مونھ مینھ لے کے پیدا ہويا سوں۔ کوئے ماڑی
 بات کوئی۔ لا حول ولا قوۃ۔ "جی تو چاہ رہیا تھا اک اس کے دو چار
 ریپٹے دھروں۔ فیر جی مینھ آیا، کے ساری دنیا تے ٹھیک کرٹ کا منے
 ٹھیکہ کے راکھیا سے۔ منے تو اپنے کام تے غرض ہوئی چاہیے۔ بس
 لیمپ بجھایا ار بڑ بڑ کر دیا ہويا سو گیا۔ ار فیر روز کی طریوں، بھلے
 ماٹساں جیوں دس بجے اٹھیا۔ بارہ بجے لگ مونھ ہاتھ دھوئے۔ ار
 چار بجے چاء پی کے ٹھنڈی سڑک پے سیر واسطے لکڑ گیا۔ سورج ڈھلے
 ہاسٹل واپس آیا۔ جوانی کا جو رتو ابٹی جگہ۔۔ شام کا جی نیں کھراب

کرٹ آلا وقت۔ ہوا بھی گھٹی سوہٹی چال ری تھی۔ دل بھی مڑا
عاشقانہ ہو رہیا تھا۔ میں اپنے آپ مینہ گم، گاندا ہویا کمرے مینہ بڑیا کہ
بلانیں زلف جاناں کی اگر لیتے تو ہم لیتے

اتنی سی دیر مینہ پڑوسی کی واج آئی۔۔۔ "مسٹر۔۔۔۔۔"
میں بس چٹکی بجاٹ لا گیا تھا۔ بس فیر انگلی اوٹھے کی اوٹھے ۽ رک
گی۔ ارکان واج کاہنی لاگ گے۔ بولے۔ "یوتیں گان لاگ رہیا
سے؟" (گھٹنا جور "تیں" پے تھا)

منے کیہا: "میں بھلا کس قابل۔ خیر فرماؤ۔"

بولے۔ میں تنگ ہو رہیا سوں۔"

بس فیر میرے اندر جو گان کی روح جاگی تھی۔ ایک دم پھڑک گی۔
دل نیں کیہا۔ او بے کار آدمی۔۔ دیکھ لے پڈھٹ آٹے لوگ نیوں
پڈھیں سیں۔ اللہ تے دعا مانگی۔ "اللہ پاک۔ ایب میں بھی خوب
جی لا کے پڈھوں گا۔ منے ہمت دے پڈھٹ کی۔" آنجھو صاف کر
کے ارجی کرڑا کر کے بیچ کے سیا مھی بیٹھ گیا۔ داند بھینچ لئے۔ ٹائی

کھول دی۔ کیمج کی بانھ اوپر چڑھالی۔ پر سمجھ کچھ نی آئی کے کروں تو کروں کے۔ سامنے رنگ برنگی کتاباں کا ڈھیر لاگ رہیا تھا۔ ان میں تے پڑھوں کوٹسی۔ فیرفصلہ کریا اک پھلوں ساری کتاباں نیں ترتیب گیلیاں دھریلوں فیرفڈھٹا شروع کروں گا۔ بڈی کتاب ایک کاہنی دھری۔ چھوٹی دوسری کاہنی۔ ایک پنے پے ساری کتاباں کے صفحے گن کے لکھ لئے۔ ار 15 اپریل تک کے دن بھی۔ جب ورقے دناں پے تقسیم کرے تو ساڈے پانچ سو جواب آیا۔

پر ہم پریشان ہوٹ آئے دن تو پیدا کوئی ہوئے تھے۔ پھلے تو جی میںھ تھوڑا ملال آیا۔ اک سیرے تین بجے اٹھ کے پڑھنا چائیے تھا۔ فیرف نیند پوری نہ ہوٹ کے مسنلیاں پے غور کریا۔ فیرف اپنے پے لعنت بھیجی۔ آخر کار اس نتیجے پے پوھنچیا اک بھای تین بجے اٹھنا تو نری فضول حرکت سے۔ ہاں، پانچ، چھ، سات بجے جاگٹا ٹھیک سے۔ صحت بھی ٹھیک رہوے گی۔ ار امتحان کی تیاری بھی بلاناغہ ہو جے گی۔

"ہم خُرماء ہم نواں" یو تو منے بیرا سے اک سیرے جلدی اٹھن
 واسطے رات نیں جلدی سوٹا پڑے سے۔ روٹی باہرتے کھا آیتھا۔
 بسترے پے لوٹ گیا۔ ایک دم جی مینھ آیا اک لالہ جی تے سیرے
 اٹھان کا کہہ دیوں۔ نیوں تو میں آپ بھی جس کام نیں کرن کا سوچ
 لیوں سوں فیر کر کے ءرھوں سوں پر فیر بھی اس تے کہن مینھ
 ہرج ء کے سے۔ ڈردے ڈردے روکا ماریا۔ "لالہ جی۔۔۔ او لالہ
 جی۔" پلٹ کے اونھان نیں دوھڑسی ماری۔۔۔۔۔ "یس۔۔۔۔۔"
 میں تو گھٹا ء ڈر گیا اک لالہ جی روس گے۔ ماٹھی سی، میمنٹی سی واج
 مینھ کیہا۔ "لالہ جی۔ سیرے تنے گھٹی ء تکلیف ہوئی جیاں کھاتر مینھ
 شکر گزار سوں۔ تڑکے نیں جے منے چھ بچے۔۔۔۔۔ میرا مطلب جس
 وقت چھ بچے سیں۔ اس وقت ٹھادیو تو مہربانی۔ لالہ جی سٹیا کے
 ناں۔" ترنت جواب آیا۔ "سٹ لیا بھائی سٹ لیا۔ چھ بچے ٹھادیوں
 گا۔" میں بولیا: "بوھت اچھا۔"

توبہ سے۔ اللہ کسے کا محتاج ناں کرے۔ لالہ جی تو بوہت سیدھے
 لکڑے۔ اگلے دن سیرے چھ بجے کو اربجاٹا شروع کر دیئے۔ ان کا
 جگانا تو بس اینویس ء تھا۔ میں تو سُنا پورا ہوں کی باٹ مینھ تھا۔ ویئھ
 ناں جگاندے تو ایک آدھ منٹ مینھ آپے اُٹھ جاندا۔ خیر مئے ان
 تتیں شکریہ بولیا ار اس نیں بھی نیوں قبول کریا کہ کو اڑاں پے گو لہ
 باری بند کردی۔ اس کے بعد کے ہو یا۔ اس بارے مینھ ناں ء پوچھو
 تو ٹھیک سے۔ کسے ایک بات پے بات ہوندی تو میں قسم ٹھا سکوں
 سوں اک منے آنکھ کھول لی تھی۔ اریو بھی یاد سے اک منے ایک
 سچے مسلمان کی طریاں کلمہ شہادت پڈھ لیا تھا۔ اریو بھی یاد سے،
 اٹھن تے پہلے ایک دو بریاں مسکوڑے بھی مارے تھے۔ اس کے
 بعد کی کاروائی کا کوئے بیرانی۔

کے بیرا سوڑھ تاردی تھی اک مونھ پے اوڈھ لی تھی۔ یا شاید کھانسی
 کرمی تھی اک لائبے خراٹے لئے تھے۔ خیر اس بات کا پورا یقین سے
 اک دس بجے میں جاگ لیا تھا۔ پریو بات کوئی یاد اک لالہ جی کے

جگان کے بعد اراٹھن تے پھلاں میں سوؤں تھا اک پڈھوں تھا۔
 منے لاگے میں پڈھوں تھا۔۔۔۔۔ ناں، سوؤں تھا۔۔۔۔۔ چھوڈو
 جی، یو تو نفسیات کا مسئلہ سے۔ اپنا اس تے کے کام۔۔۔۔۔ کے
 بیرالالہ جی نیں جگایا دس بجے ہو۔ ارنیوں بھی ہو سکے سے اک
 اس دن چھ ۷ دیر تے بجے ہوں۔ ناں بھئی۔ آپاں اللہ کے کاماں
 مینھ کوئے دخل نہیں دے سکدے۔ پر سارے دن دل مینھ یو بات
 کھٹکدی رھئی کہ بھائی قصور تیرا اپنا سے۔ بھائیو۔ مھاری شرافت تو
 چیک کرو۔ صرف شک نیں لے کے میں سارا دن بھیتر کی واج سنڈا
 رھینا۔ ار اپنے آپ نیں کو سدا رھینا۔ پر لالہ جی گیلیاں خوب ہاٹس
 ہاٹس کے باتاں کری۔ شکریہ بھی بولیا۔ صرف اس واسطے کہ ان کا
 جی میری اوڈتے خراب ناں ہو۔ خوب ۷ خوش خوش رھینا کہ بھائی
 تیری بڈی مھربانی سے منے آج سیرے کا سوھٹا ار روح نیں معطر
 کرن آلا بخت دیکھیا۔ ار خوب پڈھائی کری نیں تو روف کع طریقوں
 دس بجے اٹھیا کردا۔

لالہ جی۔ سبیرے سبیرے بندے کا دماغ کتنا تیز کام کرے سے۔ جو یاد کرو اسے بخت یاد ہو جے سے۔ بھائی ساب۔ اللہ میاں نیں سبیرے کا بخت بھی خوب ء بنایا سے۔ سبیرے کی بجائے سبیرے سبیرے شام ہو جاندی تو سارے دن کا بیڑا غرق ہو جاندا۔ لالہ جی نیں میرے اس چھوڈو پروگرام کا جواب نیوں دیا۔ بولے۔ "فیر کالھ تے چھ بچے جگا دیا کروں؟" میں ایک دم بولیا۔ "ہاں ہاں۔ یو بھی بھلا کوئے پوچھن کی بات سے۔" شام نیں ء اگلی سبیر واسطے دو کتاب نیاری کر کے دھردی۔ کرسی کھاٹ کے دھورے سرکالی۔ سردی کا کوٹ ار مفلر کرسی کے کڑپے لٹکا دیا۔ ٹوپا ار دستا نے بھی دھورے دھر لئے۔ دیا سٹائی ٹھوہن واسطے سرھائے تے ہاتھ ماریا۔ تین بریاں آیت الکرسی پڑھی ار جی مینھ خوب سوہنے منصوبے بٹا کے سو گیا۔

سبیرے نیں لالہ جی کے کوڑ کھڑکاں کی دیر تھی۔ منے پٹ دئے سی آٹکھاں کھول لی۔ بڈا سا جگرا کر کے سوڑھ کے مورے مینھ کوگڈ

مارنگ بولیا رنیوں کھانسی کری جٹوں میں جا گیا بیٹھی اسوں۔ بس فیر
 لالہ جی مطمئن ہو کے چلے گئے۔ ایک دم اٹھ کے بیٹھن پے منے
 اپنے آپ تے گھٹی ءداد دی۔ دل کے سمجھایا اک سبیرے اٹھتا تو
 بڈی بات کوئی۔ دل بولیا:۔۔ ہاں تو۔ اور کے۔ تیں تو اینویں
 ڈرے تھا۔ "منے سوچیا۔" ہاں یار۔ تیں ٹھیک کہوے سے۔ جے
 میں نیستی نیں اپنے دھورے ناں آن دیندا تو اس کی کے مجال تھی کہ
 میرے دھورے آندی۔ اس وقت بھی لاہون ینھ نیستی کے
 مارے لاکھوں لوگ پھپھارے ہوں گے۔ ایک میں سوں اک اپنے
 کام واسطے جا گیا بیٹھی اسوں۔ مھارے بھیتے تو گن کوٹ کوٹ کے
 بھرے پڑے سین۔

سوچدے سوچدے ناک نیں تھوڑی سردی لاگی تو سوڑھ تھوڑی سی
 اوپر سرکالی۔۔ بوہت خوب یار۔۔۔۔۔

آج تو ینھ بڈے صحیح وقت پے جاگی اسوں۔ بس تھوڑے دن ینھ
 عادت پکی ہو جے فیر قرآن مجید بھی روف پڑھیا کروں گا۔ مذہب تو

سب سے پھلاں ہووے سے۔ ہم تو آئے دن کافر ہوندے جارے
 ساں۔ نیوں سمجھاں ساں اک آپے سارے کام کر لیاں گے۔ بے
 چارہ اکبر تو ساری عمر کہندا کہندا مر گیا پر مہارے کان پے جوم لگ نا
 سر لائی۔ (سوڑھ کا ناں تیں آگی) تو آج فیر میں جاگ ء گیا سیرے
 سیرے۔ مطلب کلج لاگن تے چار گھنٹے پیمھاں۔ میرے تو نیوں پلے
 کوئی پردی اک کلج سات بجے کیوں شروع ہووے سے۔ (سوڑھ سر
 پے) بھائی بات اصل ینھ یو سے کہ نئی تھذیب مہاری پرائی اقدار کا
 گل گھوٹن لاگ ری سیں۔ پھلی روٹی توڑیں سیں۔ (آنکھ بند ہوٹن
 لاگ گی) اچھا ایہ چھ بجے سیں تو اس کا مطلب ہو یا کہ لگاتار تین
 گھنٹے پڑھیا جاسکے سے۔ پر سوال یو سے اک پھلے کوٹسی کتاب
 پڑھوں۔ شیکسپیر یا ورڈزور تھ؟ منے لاگے شیکسپئر ٹھیک رہوے گا۔
 اس کی کتاباں ینھ اللہ کی عظمت ار بڈائی بھی دیکھے سے۔ ار سبرے
 سیرے اللہ کی یاد تے اچھی ہو ر کے چیز ہو سکے سے۔ فیر خیال آیا کہ
 اس قسم کے و اہیات خیالاں گیل دن کا شروع کرنا اچھی بات

"اوتے لالہ جی۔ تے یاد کوئی۔ مئے تیرے تے گڈ مارنگ بولیا تھا۔
میں تو پھیلاں تے ء جا گیا بیٹھیا تھا۔ بولے۔" بھائی اس کے بعد

گاوے۔۔۔۔۔ او میرے پیارے جاگ جا۔۔۔

سپنا میرے اعصاب پے چھا جے ارجب میں آنکھ کھولوں تو سارا
اندھیرہ ٹھیب ہوے۔ مست ہو کے آنکھ کھلیں ارفیر آنکھاں
انکھاں مینھ بات ہووے۔ ارنیوں گیت گاندے ہوئے سیر گھٹی
چمک دار ہو جے۔

"سانوری صورت تیری من کو بھائے"

ارفیر ایک دوسرے نیں دیکھ کے سراں جیاں۔ پر مہارے نصیب
کت تھے۔ پیلھے، مسٹر مسٹر ارفیر کو اڑاں گیل دھما دھم شروع
ہو جے سے ارفیر چار گھنٹے بعد کالج کا گھڑیاں داغ پے جا کے لاگے
سے۔ بھائی جی۔ سکون ان چار گھنٹیاں مینھ بھی کوئی۔ کدے گڑوی
گرٹ کی واج۔ کدے دیگچے الٹ کی۔ کواڑ بند ہون کی۔ کتاباں
جھاڑ کی۔ کرسیاں کے سرکاٹ کی واج۔ کھنگھارٹن ارکھاٹسی کی
واج۔ تونیوں لاگے سے ٹھہری گائی جاری ہو۔ ایب بندی آپے
اندازہ کر سکے سے۔ ان سارے غل غپاڑیاں مینھ سُر کی کتنی گنجائش
ہوے۔

موت مئے نظر آوے سے
جب اپٹے کاھنی دیکھوں سوں۔